

EL SANTO EVANGELIO SEGÚN SAN LUCAS

Dedicatoria a Teófilo

1 Hua ga'li ni tsínj gahuin ruhua garun rian yanj xi'í si daj gahuin scanij né'. ²Ni garun ni sij nuguan' daj daj rún' digyán ni tsínj guini'i daran' si gui'yaj Jesús asij sini yan. Ni ga'mi ni sí' si-nuguan' Yan'anj rian ni ngüi, gui'yaj Jesús. Ni gunun ni únj nuguan' digyán ni tsínj daj. ³Hué dan ni gan'anj xacaj sa' man'anj cuenta xi'í daran' si gahuin asij gaxi'i si-nuguan' Jesús. Ni gani ruhuāj sisi dugu'naj huin garünj 'ngo yanj gaya re' huín re' Teófilo, tsínj sa' nin' ruhua. Ni huin ruhuāj nata' nica yyāj da' go'ngo ni nuguan' xi'í daran' ni nuguan' gahuin daj. ⁴Ngaa ni ga'ue gahuin yya ruhua re' sisi xanga' nuguan' digyán ni sij rián re'.

Anuncio del nacimiento de Juan

⁵Ni ngaa gane rey Herodes estado Judea, ni nne 'ngo chrej gu'naj Zacarías. Ni nico' sij xi'nin' gu'naj Abías. Ni nica sij gu'naj Elisabet huin unj da'ni si'ni chrej Aarón gane sí' asij ná. ⁶Ni hua nica niman nungüej nica tsínj daj rian Yan'anj. Ni dagahuin sa' nungüej nica sij

daran' sun a'nin' Señor rian né'. Ni nitaj gaquin' da'ui nungüej sij mánj. ⁷Sani nitaj da'nij nungüej sij si yatin Elisabet. Ni achij nungüej sij nej.

⁸Ni ngaa natúj xi'nin' nico' Zacarías gui'yaj sun ni sij rian Yan'anj, ⁹ni hua 'ngo güi guiri' ní'yanj Zacarías gatúj sí' chruhua si-nuhui Yan'anj gutin' sí' siquij gaca-á'. Daj si da'nga' daj hua ducuánj nicaj ni sij. ¹⁰Ni da hua gue aca siquij daj, ni achínj jni'yaj daran' ni ngüi rian Yan'anj mán ne' xe'. ¹¹Ngaa ni gurugüi' 'ngo ángel 'na' rian Señor rian Zacarías. Ni niquin' ángel daj ne' ra'a sa' nna aca siquij. ¹²Ni ngaa guini'i Zacarías ángel daj, ni gan'anj ruhua sij. Ni ducu guxu'ui' sij nej. ¹³Sani gataj ángel:

—Zacarías, si guxu'ui' re' mánj. Daj si hua gunun Yan'anj nuguan' gachínj jni'yáj re' rian sij. Ni ga'nga 'ngo da'nij re' guinicaj nica re' Elisabet. Ni dugu'naj re' lij daj Juan. ¹⁴Ni gahuin nia' ruhua man'an re'. Ni ngaa ga'nga lij daj, ni gahuin nia' ruhua nico ni ngüi. ¹⁵Ni gahuin achij da'nij re' rian Yan'anj. Ni si go'o sij vino nga nnee xunaj mánj.

Ni asij nun sij riqui nni sij, ni ga'na' Espíritu Santo rian sij. ¹⁶Ni ganani ruhua nico ni tsínj israelita xi'í si-gaquin' ni sij. Ni nanico' ni sij Dan'anj ni sij, gui'yaj da'níj re'. ¹⁷Hua sini da'níj re' táj dian sini yan ga'mi sij si-nuguan' Yan'anj rian ni ngüi. Ni da rucu ga'na' man'an Señor. Ni daj rún' hua nucuaj si-nuguan' tsínj gu'naj Elías asij ná, ni da'nga' daj ga'mi da'níj re'. Ni gan'anj na'mi ruhua' yún ni ngüi nga ni da'níj ni sí', gui'yaj sij. Ni gahuin chrún ni ngüi nunun. Ni gache ni sí' si-chrej ni ngüi hua nica niman rian Yan'anj, gui'yaj sij nej. Ni hué ducuánj daj gui'yaj xugüi sij rian ni ngüi sisi nahuin ra'a ni sij man'an Señor. —Daj gataj ángel gunun Zacarías.

¹⁸Ngaa ni nachínj snan'anj Zacarías ángel. Ni gataj sij:
—Daj gahuin yya ruhuaj xi'í si-nuguan' re' si hua achí nga nicáj nej. —Gataj Zacarías rian ángel daj.

¹⁹Ngaa ni gataj ángel daj:
—Huéj huin Gabriel tsínj niqin' rian Yan'anj. Ni ga'níj man'an Yan'anj ga'náj ga'mi nga re'. Ni gatā nuguan' sa' nan rián re'. ²⁰Yyaj ni rian nun guxuman ruhuá re' nuguan' ga'mi rián re', ni gahuín re' 'ngo tsínj si ga'ue ga'mi da ga'nga lij daj. Ni gahuin yya daj rún' gatā gunún re' güi gani Yan'anj. —Daj gataj ángel gunun Zacarías.

²¹Da hua gue da ni mán ni ngüi xe' ana'uij ni sij si gahui Zacarías chruhua nuhui. Ni nachínj snan'anj ni sij man'an dugüi' ni sij un sin huin, ni gahuin ran sí' gahui sí' chruhua nuhui daj. ²²Ngaa ni ngaa gahui sij xe', ni na'ue ga'mi sij nga

ni ngüi mánj. Ngaa ni xacaj ni ngüi cuenta sisi gurugüi' 'ngo rasun guini'i sij chruhua nuhui, gui'yaj Yan'anj. Ni maan si digyán ra'a yun sij si na'ue ga'mi sij.

²³Ngaa gachin güi gui'yaj sun Zacarías rian Yan'anj chruhua nuhui, ni guinan' sij ducúa sij. ²⁴Ngaa síj ni guiri' nica sij Elisabet 'ngo lij. Ni un'un' yahui nun gahui unj ducúa unj. ²⁵Ni gataj unj gunun man'an unj: “Ni gui'yaj Yan'anj 'ngo sinduj riánj. Ni güi yyaj ni si guiri'ij si-na'áj rian ni ngüi ga mánj.” Daj gani ruhua man'an unj.

Anuncio del nacimiento de Jesús

²⁶Ngaa guisíj huatan' yahui gunun riqui Elisabet, ni ga'níj Yan'anj ángel gu'naj Gabriel gan'anj sí' 'ngo xuman' gu'naj Nazaret ngaj rian estado Galilea. ²⁷Ni guisíj ángel daj rian nne 'ngo yun'unj xana yan gu'naj-á' María. Ni hua guisíj gahuin yya xacaj 'ngo tsínj gu'naj José man'an ún'. Ni huin sí' da'níj da'ni si'ni rey David. ²⁸Ngaa ni gatúj ángel daj rian nne ún'. Ni gataj sij:

—Hua sa' nné re' ní'. Gui'yaj Yan'anj sinduj rián re'. Ni achéj Señor nga re'. Sa' man'an re' scanij ni yun'unj xana, gui'yaj Yan'anj. —Gataj ángel gunun María.

²⁹Sani ngaa guini'i unj ángel, ni gani huíj ruhua unj xi'í nuguan' ga'mi sí'. Ni nachínj snan'anj unj man'an unj un sin huin ruhuaj gata nuguan' daj únj. ³⁰Ngaa ni gataj ángel:

—María, si guxu'uí' re' mánj. Gahuin nia' ruhua Yan'anj, gui'yáj re'. Ni hua gui'yaj Yan'anj 'ngo

sinduj rián re'. ³¹Yyaj ni guiri' re' 'ngo lij gunun riquí re'. Ni ga'nga 'ngo lij sno'o rián re'. Ni dugu'naj re' lij daj Jesús. ³²Ni gahuin sij 'ngo tsínj huin achij nin' ruhua. Ni gu'naj sij da'níj Yan'anj achij nne xata'. Ni ga'ui' Yan'anj achij xanga' daj sun guinicaj sij rún' guinicaj sun xi sij David. ³³Ni da'nga' daj gui'yaj Yan'anj sisi guinicaj niganj nin' sij sun rian ni da'níj Jacob, huin ni sí' ni tsínj israelita. Ni nitaj si hua si ganahuij sun nicaj sij mánj. —Daj gataj ángel daj gunun María.

³⁴Ngaa ni nachínj snan'anj María ángel. Ni gataj unj:

—Asa' ga'ue guiri' man'ānj lij sisi nitaj tsínj sno'o nne ngāj únj. —Gataj María gunun ángel daj.

³⁵Ni gataj ángel gunun María:

—Ga'na' Espíritu Santo rián re'. Ni ga'na' si-fuerza Yan'anj achij rián re'. Xi'í daj guruj re' 'ngo lij sa' nin'. Ni da'níj Yan'anj gu'naj lij guruj re' daj. ³⁶Ni dugüí' re' Elisabet huin 'ngo yun'unj achij. Sani guisíj huatan' yahui nun riqui ún'. Ni ataj ni ngüi sisi 'ngo yun'unj xana yatin huin ún'. ³⁷Nitaj 'ngo si huaj sisi si ga'ue gui'yaj Yan'anj mánj. —Gataj ángel daj gunun María.

³⁸Ngaa ni gataj María:

—Huēj huin 'ngo yun'unj xana 'yaj sun rian Señor. Xi'í daj ni ga'ue gui'yaj Yan'anj ngāj daj rún' gatáj re' gunünj. —Daj gataj María gunun ángel.

Hué dan ni gahui ángel daj rian María.

María visita a Elisabet

³⁹Ni hué ni güi daj ni naxuman María. Ni gahui unj gan'anj yoo

unj 'ngo xuman' ngaj estado Judea. Ni hua dacuj rian gachin unj. ⁴⁰Ni gan'anj unj ducua Zacarías. Ni gatúj unj chruhua hue'. Ni gataj unj gunun Elisabet:

—Hua sa' nné re' ní'. —Daj gataj María.

⁴¹Ni ngaa gunun Elisabet nuguan' ga'mi María, ngaa ni güéj lij riqui ún'. Ngaa ni ga'na' Espíritu Santo rian ún'. ⁴²Ni nucuaj ga'mi ún' rian María. Ni gataj ún':

—Gahuin 'ueé man'án re' scanij ni yun'unj xana, gui'yaj Yan'anj. Ni gahuin 'ueé lij guchruj re', gui'yaj Yan'anj nej. ⁴³Ni un sin huínj si ga'na' ni'yaj nni Señor riānj huín re' únj. ⁴⁴Daj si hué gue hora gunünj nuguan' ga'mí re' riānj, ni gahuin nia' ruhua lij nun riquij. Ni güéj lij nej. ⁴⁵Ni hua 'ueé rián re' xi'í si guxuman ruhua re' si-nuguan' Yan'anj sisi gahuin yya daj rún' gataj Yan'anj gunún re' aj. —Daj gataj Elisabet rian María.

⁴⁶Ngaa ni gataj María nuguan' nan: A'mi sa' 'ueé nimānj rian Señor.

⁴⁷Ni gahuin niā' ruhua nimānj ni'í nimānj Yan'anj huin si nacaj man'ānj.

⁴⁸Daj si acay Yan'anj cuenta xi'tj huínj 'ngo yun'unj xana niqui 'yaj sun rian Yan'anj.

Ni asij güi yyaj ni ga'mi sa' niganj ni ngüi xi'í si hua 'ueé riānj.

⁴⁹Daj si gui'yaj Yan'anj nucuaj 'ngo nuguan' nico ngāj.

Ni sa' nin' ruhua hua si-xugüi Yan'anj anj.

⁵⁰Ni niganj huin 'i ruhua Yan'anj ni'ya daran' ni ngüi unun rianj.

- ⁵¹ Nĭ gui'yaj sun nucuj Yan'anj.
Nĭ gunucuj gui'yaj gana
Yan'anj rian ni tsĭnj nne.
Nĭ ganahuij nuguan' gani nne
ruhua ni sij.
- ⁵² Nĭ guiri Yan'anj ni tsĭnj huin
achij huin ni tsĭnj huin rey
rian hua nucuj nne ni sĭ'.
Nĭ gahuin achij ni tsĭnj niqiu,
gui'yaj Yan'anj.
- ⁵³ Nĭ gara sa' riqui ni ngüi achin
xi'na, gui'yaj Yan'anj.
Nĭ rani Yan'anj ni xuru'ue nan'
yun ni sij.
- ⁵⁴ Nĭ chracuij Yan'anj ni tsĭnj
israelita, huin ni sij ni tsĭnj
unánj guitsi rianj.
Nĭ nun guini'yun ruhua Yan'anj
gahuin 'i ruhuaj guini'ya ni
tsĭnj daj.
- ⁵⁵ Nĭ da'nga' daj hua gataj yya
Yan'anj gunun Abraham nga
ango xi né'.
Nĭ xi'f daj huin 'i ruhua Yan'anj
ni'ya né' nġanj xi'f si huin né'
ni da'nġj da'nġ si'nġ Abraham.

Daj gataj María.

⁵⁶ Nĭ hua'nij yahui guna María
ducuá Elisabet. Rún' sĭj nġ nan' ún'
ducuá ún'.

Nacimiento de Juan el Bautista

⁵⁷ Nĭ ngaa guisġj güi ga'nga da'nġj
Elisabet, nġ ga'nga 'ngo lij sno'o,
gui'yaj ún'. ⁵⁸ Nĭ ngaa gunun ni
dugüi' ún' sisi nġn' ruhua gahuin 'i
ruhua Yan'anj ni'ya ún', nġ gahuin
niġ' ruhua ni sij xi'f ún'. ⁵⁹ Ngaa
guisġj lij itunġj güi, nġ ga'na' ni tsĭnj
guta' da'nga' nnee lij daj. Nĭ huin
ruhua ni sij dugu'naj ni sij lij rún'
gu'naj chre-é' Zacarías. ⁶⁰ Sanġ gataj
nni lij daj:

—Sġ ga'ue mánj. Si-xugüi lij nan
huin Juan. —Daj gataj nni lij.

⁶¹ Ngaa nġ gataj ni sij:
—Nġ a 'ngo ni dugüi' re' nitaj si
gu'naj da mánj. —Gataj ni sij.

⁶² Ngaa nġ nachġnj snan'anj ra'a yun
ni sij chrej lij daj sisi guini'i ni sij daj
dugu'naj sĭ' lij daj. ⁶³ Ngaa nġ gachġnj
chrej lij daj 'ngo ruguechra' le garun
sĭ'. Nġ garun sĭ': "Juan gu'naj si-xugüi
lij." Daj garun sĭ'. Nġ gahuin yan'anj
ruhua daran' ni sij xi'f nuguan' daj.
⁶⁴ Ngaa nġ 'ngo hora nġ ga'ue ga'mi
Zacarías. Nġ gaxi'i sĭ' ga'mi sa' 'ueé sĭ'
rian Yan'anj. ⁶⁵ Nġ gara yan'anj ruhua
daran' ni ngüi nne nichrun' xi'f si
guiran' Zacarías. Nġ gunun daran' ni
ngüi mán nin' gachra' ni dacan estado
Judea xi'f ni nuguan' daj. ⁶⁶ Nġ ga'nġj
daran' ni ngüi gunun ni nuguan' daj
chruhua cúj niman ni sij. Nġ nachġnj
snan'anj ni sij ni man'an dugüi' ni sij.
Nġ gataj ni sij: "Nġ un tsĭnj gahuin lij da
únj." Gataj ni sij. Daj du'ua ni sij xi'f si
gui'yaj sa' 'ueé Yan'anj nga lij daj.

Profecía de Zacarías

⁶⁷ Nġ ga'na' 'ueé Espíritu Santo
rian chrej lij daj huin tsĭnj gu'naj
Zacarías. Nġ gataj sij:

⁶⁸ Ga'mi sa' né' rian Señor huin
Dan'anj ni tsĭnj israelita.
Daj si ga'na' ni'yaj sij ni tsĭnj
nico' sij.

Nġ ga'na' naġaj sij ni sĭ'.

⁶⁹ Nġ ga'nġj Yan'anj 'ngo tsĭnj
nucuj ga'na' naġaj yun' huin
sĭ' 'ngo da'nġ si'nġ David.
Nġ David huin 'ngo tsĭnj gunánj
guitsi rian Yan'anj.

⁷⁰ Nġ da'nga' daj gataj ni tsĭnj
ga'mi si-nuguan' Yan'anj,
gui'yaj Yan'anj asġj ngaa ná.

- ⁷¹ Nì nacaj Yan'anj né' rian ni tsínj unun' nga né' nga rian daran' ni tsínj nun huin xan' ruhua ni'yaj né' nej.
- ⁷² Nì da'nga' daj gahuin 'i ruhua Yan'anj ni'ya ni xi né' daj rún' gataj yya sij rian ni sí'.
Nì nanun ruhua Yan'anj daj gui'yaj yya sij nuguan' sa' nga ni sí' nej.
- ⁷³⁻⁷⁴ Nì ga'mi nica yya Yan'anj rian xí' Abraham sisi gahuin ní'nij né' rian ni tsínj unun' nga né', gui'yaj Yan'anj.
Nгаа nì si guxu'ui' né' gui'yaj sun né' rian Yan'anj.
- ⁷⁵ Nì gahuin sa' niman né' rian Yan'anj.
Nì gahuin nica niman né' daran' güi guiman né'.
- Daj gataj Zacarías.
- ⁷⁶ Nгаа nì gaxi'i Zacarías ga'mi sij rian da'níj sij. Nì gataj sij:
Nì gahuin so' 'ngo tsínj ga'mi sini si-nuguan' Yan'anj achij nne xata' asij nun ga'na' man'an Señor.
Nì gui'yaj xugüi re' si-chrej man'an Señor.
- ⁷⁷ Nì digyán so' rian ni ngüi nico' Señor sisi nicaj sij niman nico xi'l si-gaquin' ni sí'.
Nгаа nì ga'ue xacaj ni sí' cuenta sisi nacaj Yan'anj ni sí'.
- ⁷⁸ Nì da'nga' daj gahuin si huin 'i nín' ruhua Yan'anj ni'ya né'.
Nì daj rún' xiguin 'yaj güi ne' nigan', nì da'nga' daj guixiguin chruhua niman né', gui'yaj Yan'anj nгаа ga'na' Señor ne' xata' rian né' aj.
- ⁷⁹ Nì guixiguin rian ni ngüi mán rian rumi' huin ni ngüi xu'ui' xi'l si gahui' ni sij.

Nгаа nì gahuin din'inj rian né' gache né', gui'yaj Yan'anj.
Daj gataj Zacarías rian da'níj sij.
⁸⁰ Nгаа nì gachij lij daj. Nì gahuin nucuaj niman sij. Nì gane sij quij quilyanj naco da' güi gaxi'i sij nata' sij si-nuguan' Yan'anj rian ni tsínj israelita.

Nacimiento de Jesús

2 Hué ni güi daj nì ga'nin' rey gu'naj Augusto César sun rian ni tsínj mán nín' gachra' chruhua xungüi sisi nachi nicaj ni sij 'ngo yanj censo. ² Nì tsínj gu'naj Cirenio gahuin gobernado gane sí' estado Siria nгаа gui'yaj sini yan ni sij yanj censo daj. ³ Nì gan'anj daran' ni ngüi xánj ni sij guta' ni sij si-xugüi ni sij rian yanj.

⁴ Nгаа nì gahui José xuman' Nazaret xuman' ngaj estado Galilea. Nì gachin sij xuman' Belén, xuman' ngaj estado Judea huin rian ga'nga rey David. Daj si huin Jesús da'níj da'ni si'ni sí'. ⁵ Nì gan'anj guta' nuguan'an sij si-xugüi sij nгаа María rian yanj. Nì huin ruhua nungüej sij xacaj nungüej sij dugüi' sij. Nì nun riqui man'an ún'. ⁶ Nì nгаа gane nungüej sij xuman' Belén, nì guisíj güi ga'nga lij, gui'yaj María. ⁷ Nì ga'nga 'ngo lij xahua', gui'yaj María huin-ín' lij sno'o. Nì chri'yanj ún' atsij lij daj. Nì ga'níj ún' chruhua rio xa xucu si nitaj si hua ní'nij 'ngo lugua guna nungüej sij chruhua mesón.

Los ángeles y los pastores

⁸ Nì nichrun' xuman' Belén daj, nì mán ni tsínj dugumi dán ni sij xachij. ⁹ Nгаа nì gurugüi'

'ngo si-ángel Yan'anj rian ni sij. Ni guixiguin 'ngo yan'an ganicaj xi'níj ni sij, gui'yaj Yan'anj nej. Ni ducu guxu'ui' ni sij. ¹⁰Saní gataj ángel gunun ni sij:

—Si guxu'ui' ni é re' mánj. Daj si nica 'ngo nuguan' sa' 'nāj rian ni é re'. Ni gahuin nia' nin' ruhua daran' ni ngüi, gui'yaj nuguan' nan. ¹¹Yyaj ni ga'nga 'ngo lij xánj David huin sij Cristo. Ni ganacaj sij ni ngüi. Ni huin sij Señor nej. ¹²Ni hué nan huin 'ngo da'nga' si daj ga'ue nari' ni é re' lij daj. Ni nari' ni é re' lij daj chruhua riq xa xucu. —Gataj ángel gunun ni tsínj dugumi xachij daj.

¹³Ni hué 'ngo hora gue daj, ni gurugüi' nico ni ángel mán xata' nichrun' rian ángel daj. Ni ga'mi sa' ni sij rian Yan'anj. Ni gataj ni sij:

¹⁴Ga'mi sa' 'ueé né' rian Yan'anj achij nne xata'.

Ni gahuin din'inj chruhua ni ngüi huin ni ngüi hua sa' niman.

Daj gataj ni ángel daj.

¹⁵Ni ngaa nan' ni ángel xata', ni gaxi'i ga'mi ni tsínj dugumi xachij gataj ni sij gunun ni dugüi' ni sij:

—Gan'anj né' xuman' Belén guini'i né' si gahuin daj rún' gataj Señor gunun né'. —Daj gataj ni sij.

¹⁶Hué dan ni gan'anj yoo ni sij, ni nari' ni sij María nga José. Ni nari' ni sij lij nun-ún' chruhua riq xa xucu. ¹⁷Ni ngaa guini'i ni sij lij, ngaa ni nata' ni sij nuguan' ga'níj Yan'anj rian ni sij xi'í lij rian ni ngüi mán yu'uj daj. ¹⁸Ni gahuin yan'anj ruhua daran' ni ngüi gunun nuguan' nata' ni tsínj dugumi xachij daj. ¹⁹Ni ga'níj María daran' nuguan' daj chruhua cúj niman unj. Ni gani sa'

ruhua unj xi'í si gui'yaj sa' Yan'anj nga unj. ²⁰Hué dan ni guinan' ni tsínj dugumi xachij daj. Ni ga'mi sa' 'ueé ni sij rian Yan'anj xi'í daran' ni nuguan' gunun ni sij nga si guini'i ni sij. Daj si rún' gataj ángel, ni da'nga' daj gahuin daran' anj.

Presentación de Jesús en el templo

²¹Ni ngaa gachin itunj güi, ni guta' ni sij da'nga' nnee lij daj. Ni dugu'naj ni sij lij Jesús si hua gataj ángel rian María sisi da'nga' daj gu'naj lij daj asij nun gahuin guiri' ún' lij daj.

²²Ni ngaa guisij ni güi ganahuin sa' María rún' ataj nica si-lej Moisés, ni nicaj nungüej sij lij gan'anj sij xuman' Jerusalén naga'ui' nungüej sij lij daj rian Señor. ²³Ni da'nga' daj gui'yaj nungüej sij si hua nica yya rian si-lej Señor sisi go'ngo da'níj ni ngüi israelita tsínj xahua' gahuin si'yaj Señor. ²⁴Ni gan'anj ga'ui' nungüej sij xucu rian Yan'anj daj rún' ga'nin' si-lej Señor sun rian ni tsínj israelita. Ni ga'ue ga'ui' ni sij huij xu'man, asi ga'ue ga'ui' ni sij huij gucu nej.

²⁵Ni ngaa daj nne 'ngo tsínj gu'naj Simeón xuman' Jerusalén. Ni 'ngo tsínj 'yaj nica huin sij. Ni nico' 'ueé sij Yan'anj nej. Ni ana'uij sij si ganani ni ngüi israelita, gui'yaj Yan'anj. Ni nne Espíritu Santo nga sij nej. ²⁶Ni hua gataj Espíritu Santo rian tsínj daj sisi si gahu' sij da guini'i yya sij tsínj sa' ga'nij Señor rian ni ngüi. ²⁷Ni ga'níj Espíritu Santo gan'anj sij nuhui nico. Ni nicaj José nga María lij Jesús gatúj nungüej sij chruhua nuhui

nej. Ní huin ruhua nungüej sij guí'yaj nungüej sij xi'í Jesús daj rún' ga'nin' si-ley Yan'anj sun rian ni tsínj israelita. ²⁸ Ngaa ní gana'yanj Simeón lij Jesús. Ní ga'mi sa' 'ueé sij rian Yan'anj. Ní gataj sij:

²⁹ Yyaj ní guisíj yya daj rún' gatáj re' riánj.

Ngaa ní ga'ue riqui re' sisi gahui' din'in huínj 'ngo tsínj 'yaj sun rián re', Señor.

³⁰ Daj si hua guini'inj sisi ga'na' tsínj ganacaj ni únj.

³¹ Ní guí'yáj re' daj rian daran' ni ngüi man chruhua xungüi nan.

³² Ní daj rún' huin 'ngo yan'an xiguín, da'nga' daj gahuin lij nan rian ni ngüi 'na' anéj chrej.

Ní ga'mi sa' ni ngüi xi'í ni únj, ni tsínj israelita, guí'yaj sij nej.

Daj si nico' ni únj man'án re'.

Daj gataj Simeón gunun Yan'anj.

³³ Ní gahuin yan'anj ruhua José nga María si gataj Simeón xi'í lij Jesús. ³⁴ Ngaa ní gachínj jni'yaj Simeón rian Yan'anj sisi gahuin 'ueé rian anin' sij, guí'yaj Yan'anj. Ní gataj sij gunun María huin unj nni Jesús:

—Ngaa gachij lij nan, ní gunun' nico ni ngüi israelita xi'í sí'. Ní ga ni'ya ni sij nej. Saní guxuman ruhua ango da'aj ni sij ni'yaj ni sij sí'. Saní ga'mi xi'í ni tsínj unun' nga sí' xi'í sí'. ³⁵ Da'nga' daj ga'ue guini'i né' daj hua niman nico ni ngüi, guí'yaj sí'. Ní ducu guiran' niman man'án re' sayun xi'í sij nej. —Gataj Simeón gunun María.

³⁶ Ní nne 'ngo yun'unj xana achij ga'mi si-nuguan' Yan'anj, gu'naj ún'

Ana. Ní huin ún' da'níj tsínj gu'naj Fanuel. Ní huin sí' xi'nin' gu'naj Aser. Ní achij nin' ruhua ún'. Ní hua le xacaj ún' tsínj sno'o. Ní gane nungüej nica ún' ichij yo', ní gahui' sí'. ³⁷ Ní gahuin ún' yun'unj mmij gan'anj xia gan'anj yo'. Ní nitaj si 'yaj ún' gahui ún' chruhua nuhui. Ní nugüi nigan' guí'yaj sun ún' rian Yan'anj. Ní guí'yaj ún' ayuno. Ní gachínj jni'yaj ún' rian Yan'anj nej. ³⁸ Ní hué gue hora daj guisíj ún'. Ní gaxi'í ún' naga'ui' ún' si guruhua Yan'anj. Ní ga'mi ún' xi'í lij Jesús rian daran' ni ngüi man ana'uij sisi nacaj Yan'anj ni ngüi man xuman' Jerusalén.

El regreso a Nazaret

³⁹ Ní ngaa guisíj dagahuin nungüej nica José daran' si ga'nin' si-ley Señor rian ni ngüi israelita, ngaa ní nan' nungüej sij xánj sij xuman' Nazaret, huin xuman' ngaj estado Galilea. ⁴⁰ Ní gachij lij Jesús. Ní gahuin nucuaj sij. Ní gahuin chrun sa' sij si sica' chra sij. Ní guí'yaj Yan'anj sinduj rian sij.

El niño Jesús en el templo

⁴¹ Ní daran' yo' huan'anj nungüej nica José guí'yanj pascua xuman' Jerusalén. ⁴² Ní ngaa guisíj Jesús xuhuij yo', ngaa ní gan'anj anin' sij guí'yanj daj si da'nga' daj hua si-costumbre ni sij. ⁴³ Ngaa guisíj gachin guí'yanj, ní huaj nan' José nga María nasíj nungüej sij ducuá sij. Ní gunáj tsin' Jesús xuman' Jerusalén. Saní nun xacaj nungüej sij cuenta. ⁴⁴ Ní rian gani ruhua nungüej sij sisi huaj Jesús scanij ni dugüi' sij, ní gachéj nungüej sij

nugüi. Hué dan ni nano' nungüej sij scanij ni dugüil'ij. ⁴⁵Ni ngaa na'ue nari' nungüej sij Jesús, ni nanicaj ruhua' yún sij Jerusalén nano' nungüej sij. ⁴⁶Ni gachin hua'nij güi da nari' nungüej sij Jesús chruhua nuhui, nne sí' dani ni tsínj digyán ley unun sí' si a'mi ni sij. ⁴⁷Ni gahuin yan'anj ruhua daran' ni sij ngaa gunun ni sij nuguan' sa' ga'mi Jesús. Daj si chrún sa' sí', ruhua ni sij. ⁴⁸Ni ngaa guini'li chre nga nni, ni gan'anj ruhua nungüej sij. Ni gataj nni Jesús gunun sí':

—Da'ní', ni un sin huin, ni lyáj so' nánj únj. Chré so' nga man'anj nano' únj so'. Ni huéj ta' ata' niman nungüej únj chré so' nano' únj so' aj. —Daj gataj nni Jesús.

⁴⁹Sani gataj Jesús:

—Ni un sin huin ni nano' nungüej é re' yúnj únj. Nun ni'li nungüej é re' sisi hua nian guiyaj súnj si-sun chré a'. —Daj gataj Jesús.

⁵⁰Sani nun gara da'nga' ruhua nungüej nica sij si gataj Jesús.

⁵¹Ngaa ni nanicaj Jesús nan' sí' nga nungüej sij xuman' Nazaret. Ni dagahuin sí' daran' si ataj nungüej sij. Ni ga'nij nni Jesús ni nuguan' sa' daj cúj niman unj. ⁵²Ni gachij Jesús gahuin sij tsínj. Ni gahuin chrún sa' sij. Ni garan' ruhua Yan'anj ni'ya sij. Ni garan' ruhua ni ngüi ni'yaj ni sij Jesús nej.

Predicación de Juan el Bautista

3 Ni ngaa guisj xinun' yo' ga'nin' rey gu'naj Tiberio César sun, ni huin tsínj gu'naj Poncio Pilato gobernado estado Judea. Ni tsínj gu'naj Herodes ga'nin' sun estado Galilea. Ni jnánj

sij Felipe ga'nin' sun estado Iturea nga Traconite. Ni ga'nin' tsínj gu'naj Lisantias sun estado Abilinia. ²Ni nungüej chrej a'nin' huin Anás nga Caifás. Ni hué ni güi daj, ni riqui Yan'anj si-nuguan'anj rian tsínj gu'naj Juan ngaa gachéj sí' riqui quij quiyanj naco huin sí' da'nj Zacarías.

³Ni gachéj Juan daran' yu'uj ngaj nichrun' du'ua xinéj nnee gu'naj Jordán. Ni gataj sij gunun ni ngüi sisi ganani ruhua ni sij xi'í si-gaquin' ni sij. Ni nanico' ni sij Yan'anj. Ni gata' nnee ni sij. Ngaa ni ga'ue guinicaj Yan'anj niman nico xi'í si-gaquin' ni sij nej. Daj gataj Juan.

⁴Ni da'nga' daj gahuin daj rún' ataj nuguan' garun tsínj gu'naj Isaías 'ngo tsínj ga'mi si-nuguan' Yan'anj xanga' asij ná. Ni hué nan huin si garun sí':

Unun né' si-nane 'ngo tsínj a'mi nucuaj 'ngo yu'uj quiyanj naco aj.

Ni ataj sí' sisi nagui'yaj xugüi né' si-chrej Señor.

Ni nagui'yaj nica né' niman né' xi'í si ga'na' Señor rian né'.

⁵Ni nagui'yaj nica né' rian atúj ga'man.

Ni ga'ne né' dacan sisi nahuin nica chrej daj.

Ni nagui'yaj nica né' chrej cuyu daj nej.

Ni nagui'yaj ta né' rian chrej quij hua ta nej aj.

⁶Ni guini'li daran' ni ngüi man chruhua xungüi daj nacao Yan'anj né'.

Daj garun Isaías xi'í Juan asij ná.

⁷Ni guisj nico ni ngüi rian Juan xi'í si huin ruhua ni sij gata' nnee ni

sij, guí'yaj Juan. Ní gataj sí' gunun ni sij:

—Da'níj xucuáj huin a ni é re' aj. Ní un tsínj gataj chrún rian a ni é re' sisi gunánj a ni é re', ni ganani a ni é re' rian castigo nico, guí'yaj Yan'anj únj. ⁸Sisi hua yya gahuin sa' niman án re', ngaa ní gan'anj guí'yaj á re' daj rún' 'yaj ni ngüi gahuin sa' niman anj. Ní si gani ruhua á re' sisi xi'í si da'níj Abraham huin a ni é re', ngaa ní nitaj gaquin' da'ui a ni é re' mánj. Daj si atā gunun a ni é re' sisi yej ngaj nan, ní ga'ue guí'yaj Yan'anj da'níj Abraham. ⁹Ní a hua chrún gaga' hacha ga'nij sij ya'a siu ni chrún. Ní daj rún' 'yaj 'ngo tsínj nga gaga' hacha, ní da'nga' daj guí'yaj Yan'anj nga daran' chrún nitaj si ayu chruj sa' chra. Ní ga'nij Yan'anj ni chrún daj gaca-á' rian yan'an. —Gataj Juan gunun ni ngüi.

¹⁰Ngaa ní nachínj snan'anj ni ngüi Juan. Ní gataj ni sij:

—Daj guí'yaj únj, ruhuá re' únj. —Daj gataj ni sij.

¹¹Ní gataj Juan:

—Tsínj nun huíj atsij, ní ga'ui' sij gunun tsínj nitaj si-gan'. Ní tsínj nicaj si xa sij, ní ga'ui' sij xa tsínj nitaj si nicaj xa aj. —Daj gataj Juan.

¹²Ní gahuin nichrun' go'ngo ni tsínj a'nej san'anj pesto si gata' nnee ni sij. Ní nachínj snan'anj ni sij Juan. Ní gataj ni sij:

—Maestro, daj guí'yaj ni únj, ruhua á re' únj. —Gataj ni sij.

¹³Ní gataj Juan:

—Si ga'nej xacan ni é re' san'anj mánj. Daj rún' a'nin' ley sun da'nga' daj ga'nej a ni é re' san'anj rian ni ngüi aj. —Gataj Juan gunun ni sij.

¹⁴Ní hué daj nachínj snan'anj ni snado Juan nej. Ní gataj ni sij:

—Daj guí'yaj ni únj, ruhuá re' únj. —Gataj ni sij.

Ní gataj Juan:

—Si guí'yaj fuerza á re' sisi ga'ui' ni ngüi san'anj rian án re' mánj. Ní si ga'ui' yun ni é re' gaquin' ni ngüi güenda si guíri ni é re' si'yaj ni sij mánj. Ní gahuin nia' ruhua á re' nga du'ue ni é re' nej. —Daj gataj Juan gunun ni snado.

¹⁵Ní gani ruhua ni ngüi sisi si ruhua, ní Juan huin Cristo. Xi'í daj ní ana'uij ni sij sisi gataj Juan un tsínj huin man'an sí'. ¹⁶Xi'í daj, ní gataj Juan gunun daran' ni ngüi daj:

—Hua yya duguata' nnee man'anj nga nnee ni é re'. Saní ga'na' ango tsínj duguata' nnee Espíritu Santo niman án re', ní nga yan'an nej. Hué tsínj daj nicaj sun nico daj nga si nicaj sun man'anj. Ní na'aj yānj nachij nni correa 'nij dacánj sij xi'í si huin achij nin' sij. ¹⁷Ní hua da'a sij pala si nagui'yaj sa' sij riqui strigo. Ní gahui coj riqui-í'. Ní nara sa' sij strigo chruhua guru. Saní gari yan'an sij coj gaca-á' niganj nin'. Ní strigo daj huin ni ngüi sa' rian Yan'anj. Ní coj daj huin ni ngüi nun aráj xina si-nuguan' Yan'anj nej aj. —Daj gataj Juan gunun ni sij.

¹⁸Ní hué ducánj nan huin si ga'mi sa' Juan ango ni nuguan' sa' 'na' rian Yan'anj gunun ni ngüi.

¹⁹Ní chran' Juan tsínj gu'naj Herodes huin sí' gobernado xi'í si xacaj sí' nica jnánj sí' Felipe huin ún' Herodías. Ní chran' Juan Herodes xi'í ango rasun quij guí'yaj sí' nej. ²⁰Hué dan ní nata' man'an

Herodes ango gaquin' rian ni gaquin' gui'yaj sij daj. Daj si garij sij Juan ducuaga' nej aj.

El bautismo de Jesús

²¹ Nĭ ngaa achin gari Herodes Juan ducuaga', nĭ gata' nnee ni ngüi, gui'yaj Juan. Asĭj nĭ duguata' nnee Juan man'an Jesús nej. Diaj hua guę achĭnj jni'yaj Jesús rian Yan'anĭj, nĭ naxi'nĭj xata'. ²² Nĭ 'na' guinĭj Espĭritu Santo rian Jesús. Nĭ rún' hua 'ngo xu'man hua Espĭritu Santo ga'na' rian sij. Nĭ gunun ni sij ga'mi Yan'anĭj xata'. Nĭ gataj-á':

—Hué re' huin da'nĭ 'lĭ ruhuāj. Nĭ hua niā' ruhuāj ni'yā so'. —Daj gataj Yan'anĭj gunun Jesús.

Genealogía de Jesús

²³ Nĭ 'ngo si yo' ico chi' huaj Jesús ngaa gaxĭ'i sij gui'yaj sun sij si-nuguan' Yan'anĭj. Nĭ Jesús huin da'nĭj José, ruhua ni ngüi. Nĭ José huin da'nĭj Elĭ. ²⁴ Nĭ Elĭ huin da'nĭj Mataj. Nĭ Mataj huin da'nĭj Levĭ. Nĭ Levĭ huin da'nĭj Melqui. Nĭ Melqui huin da'nĭj Jona. Nĭ Jona huin da'nĭj José. ²⁵ Nĭ José huin da'nĭj Matĭas. Nĭ Matĭas huin da'nĭj Amós. Nĭ Amós huin da'nĭj Nahúm. Nĭ Nahúm huin da'nĭj Esli. Nĭ Esli huin da'nĭj Nagai. ²⁶ Nĭ Nagai huin da'nĭj Maat. Nĭ Maat huin da'nĭj Matĭas. Nĭ Matĭas huin da'nĭj Semei. Nĭ Semei huin da'nĭj Josec. Nĭ Josec huin da'nĭj Judá. ²⁷ Nĭ Judá huin da'nĭj Jonán. Nĭ Jonán huin da'nĭj Resa. Nĭ Resa huin da'nĭj Zorobabel. Nĭ Zorobabel huin da'nĭj Salatiel. Nĭ Salatiel huin da'nĭj Neri.

²⁸ Nĭ Neri huin da'nĭj Mequi. Nĭ Mequi huin da'nĭj Adi. Nĭ Adi

hain da'nĭj Cosam. Nĭ Cosam huin da'nĭj Elmadam. Nĭ Elmadam huin da'nĭj Er. ²⁹ Nĭ Er huin da'nĭj Jesús. Nĭ Jesús huin da'nĭj Eliezer. Nĭ Eliezer huin da'nĭj Jorim. Nĭ Jorim huin da'nĭj Matat. ³⁰ Nĭ Matat huin da'nĭj Levĭ. Nĭ Levĭ huin da'nĭj Simeón. Nĭ Simeón huin da'nĭj Judá. Nĭ Judá huin da'nĭj José. Nĭ José huin da'nĭj Jonam. Nĭ Jonam huin da'nĭj Eliaquim. Nĭ Eliaquim huin da'nĭj Melea. ³¹ Nĭ Melea huin da'nĭj Mena. Nĭ Mena huin da'nĭj Matata. Nĭ Matata huin da'nĭj Natán. ³² Nĭ Natán huin da'nĭj David. Nĭ David huin da'nĭj Isaí. Nĭ Isaí huin da'nĭj Obed. Nĭ Obed huin da'nĭj Booz. Nĭ Booz huin da'nĭj Sala. Nĭ Sala huin da'nĭj Naasón.

³³ Nĭ Naasón huin da'nĭj Aminadad. Nĭ Aminadad huin da'nĭj Amin. Nĭ Amin huin da'nĭj Arni. Nĭ Arni huin da'nĭj Esrom. Nĭ Esrom huin da'nĭj Fares. Nĭ Fares huin da'nĭj Judá. ³⁴ Nĭ Judá huin da'nĭj Jacob. Nĭ Jacob huin da'nĭj Isaac. Nĭ Isaac huin da'nĭj Abraham. Nĭ Abraham huin da'nĭj Taré. Nĭ Taré huin da'nĭj Nacor. ³⁵ Nĭ Nacor huin da'nĭj Serug. Nĭ Serug huin da'nĭj Ragau. Nĭ Ragau huin da'nĭj Peleg. Nĭ Peleg huin da'nĭj Heber. Nĭ Heber huin da'nĭj Sala. ³⁶ Nĭ Sala huin da'nĭj Cainán. Nĭ Cainán huin da'nĭj Arfaxad. Nĭ Arfaxad huin da'nĭj Sem. Nĭ Sem huin da'nĭj Noé. Nĭ Noé huin da'nĭj Lamec. ³⁷ Nĭ Lamec huin da'nĭj Matasalén. Nĭ Matasalén huin da'nĭj Enoc. Nĭ Enoc huin da'nĭj Jared. Nĭ Jared huin da'nĭj Mahalaleel. Nĭ Mahalaleel huin da'nĭj Cainán. Nĭ Cainán huin da'nĭj Enós. ³⁸ Nĭ Enós

huin da'níj Set. Ní Set huin da'níj Adán. Ní Adán huin da'níj Yan'anj xanga' aj.

Tentación de Jesús

4 Ní nara sa' Espíritu Santo niman Jesús. Ngaa ní gahui sij du'ua xinéj gu'naj Jordán. Ní gan'anj sij quij qui'yanj naco, gui'yaj Espíritu Santo. ²Ní huj xia yya güi gui'yaj fuerza sichre sisi gui'yaj Jesús gaquin'. Ní a 'ngo xico' nun xa sij ni güi daj. Ní ngaa guisíj gunucuj sij huj xia güi daj, ní achin xi'na riqui sij aj. ³Ngaa ní gataj sichre gunun Jesús:

—Sisi xanga' re' huín re' da'níj Yan'anj, ní nagui'yaj re' si ganahuin yej nan chrachrúnj xa re' stoj. —Daj gataj sichre gunun Jesús.

⁴Saní gataj Jesús:

—Ataj si-nuguan' Yan'anj sisi sé urin chrachrúnj gui'yaj si ga ní'na' ni ngüi mánj. Saní ga ní'na' xanga' ni ngüi gui'yaj daran' ni nuguan' 'na' rian Yan'anj. —Daj gataj Jesús gunun sichre.

⁵Hué dan ní nicaj sichre Jesús gan'anj-án' chra 'ngo quij xacan. Ní riqui urin hora digyán sichre daran' xuman' ngaj chruhua xungüi rian Jesús. ⁶Ní gataj sichre gunun Jesús:

—Ríquij daran' ni sun nan guinicaj man'án re'. Ní gahuin 'ueé nin' re', gui'yā xi'í si gahuin achíj re' rian daran' ni xuman' nan. Daj si hua nahuin ra'áj daran' nan, gui'yaj Yan'anj. Ní un tsínj rian garan' ruhuáj, ní ga'uuj daran' nan anj. ⁷Ngaa ní sisi guiniquin' ráj dacoj re' riánj, ní guinicó' re' yünj, ngaa ní daran' nan gahuin si'yáj re', gui'yā. —Daj gataj sichre gunun Jesús.

⁸Ní gataj Jesús:

—Guxun man'án re' riánj Satanás. Daj si gataj si-nuguan' Yan'anj: Ganiquin' ráj dacoj né' rian Señor huin Dan'anj né'. Ní dagahuin né' rian urin Yan'anj.

Da'nga' daj gataj si-nuguan' Yan'anj. —Daj gataj Jesús gunun sichre.

⁹Hué dan ní nicaj sichre Jesús gan'anj-án' xuman' Jerusalén. Ní gahui Jesús chra nuhui nico, gui'yaj sichre. Ní gataj sichre:

—Sisi yya huín re' da'níj Yan'anj, ngaa ní güej re' nica' nánj. ¹⁰Daj si gataj si-nuguan' Yan'anj:

Ga'nin' Yan'anj sun rian ni ángel sisi ga'na' dugumi ni sí' man'án re'.

¹¹Ngaa ní guinij re' rian ra'a ni ángel sisi sí garij re' dacó' re', gui'yaj yej.

Da'nga' daj gataj si-nuguan' Yan'anj. —Gataj sichre gunun Jesús.

¹²Ngaa ní gataj Jesús:

—Gataj si-nuguan' Yan'anj: “Sì xacaj so' cuenta sisi xanga' si-nuguan' Señor huin Dan'anj so' mánj.” Daj gataj si-nuguan' Yan'anj. —Gataj Jesús gunun sichre.

¹³Ní ngaa guisíj ganahuj gatsij sichre niman Jesús, ní guxun-ún' man'an-án' rian Jesús 'ngo ni güi.

Jesús principia su ministerio

¹⁴Hué dan ní nanicaj Jesús gan'anj sij estado Galilea. Ní gahuin nucuj niman sij xi'í si-sun Yan'anj, gui'yaj Espíritu Santo. Ní guisíj nuguan' xi'í Jesús rian daran' ni xuman' ngaj yu'uj daj. ¹⁵Ní da' go'ngo yu'uj huaj sij, ní digyán sij rian ni ngüi chruhua si-nuhui ni

tsínj israelita. Nì ga'mi sa' 'ueé ni ngüi xi'í Jesús.

Jesús en Nazaret

¹⁶Ngaa nì nan' Jesús xuman' Nazaret rian gachij sij. Ngaa nì güi naránj ruhua ni ngüi, nì gatúj sij chruhua nuhui daj rún' gu'yun sij gui'yaj sij. Nì ganiquin' sij gaya sij si-nuguan' Yan'anj. ¹⁷Nì ga'ui' 'ngo tsínj daj yanj garun tsínj gu'naj Isaías gaya Jesús. Nì Isaías huin 'ngo tsínj ga'mi si-nuguan' Yan'anj asij ná. Nì na'nj sij rian yanj. Nì nari' sij 'ngo yu'uj rian a'mi nica yya si-nuguan' Yan'anj:

¹⁸Nne Espíritu Santo ngāj.

Nì xi'í daj ga'nin' Yan'anj sun riánj sisi gan'anj ga'mi nuguan' sa' rian ni ngüi yacorán'.

Nì ga'nj Yan'anj gan'anj ga'mi nga ni tsínj nani ruhua sisi gahuin nia' ruhua ni sij, gui'yā.

Nì ga'nj Yan'anj gan'anj ga'mi nga ni tsínj nun ducuaga'.

Ngaa nì gahui ni sí'.

Nì gan'anj gui'yā si naxi'ni rian ni ngüi duri.

Nì ga'nj Yan'anj gan'anj gui'yā si ga ní'nij rian ni ngüi ran' sayun 'yaj si quij hua.

¹⁹Nì ga'nj Yan'anj gan'anj ga'mi nuguan' sa' rian ni ngüi sisi yo' yyaj, nì huin nia' ruhua Yan'anj ga'na' nācaj-á' ni ngüi man chruhua xungüi.

Da'nga' daj gataj yanj daj gaya Jesús.

²⁰Ngaa nì naránj Jesús rian yanj daj. Nì ga'ui' sij rian tsínj dugumi yanj chruhua nuhui. Nì gan'anj

gane sij. Nì ni'yaj sa' daran' ni tsínj nne chruhua nuhui rian Jesús. ²¹Nì gaxi'i sij ga'mi sij. Nì gataj sij:

—Hué güi nan huin si guisij gahuin yya nuguan' garun Isaías si gayā rian ni é re' aj. —Daj gataj Jesús.

²²Ngaa nì ga'mi sa' daran' ni sij xi'í Jesús. Nì gahuin yan'anj ruhua ni sij nga nuguan' 'ueé ga'mi sí'. Nì nachínj snan'anj ni sij dugüi' ni sij. Nì gataj ni sij:

—Sé da'nj José huin sí' a'. —Daj gataj ni sij.

²³Xi'í daj nì gataj Jesús:

—Xanga' yya gataj ni é re' nuguan' nan gunünj: “Gui'yaj gono'ó re' man'án re' huín re' tsínj 'yaj gono'o.” Nì gataj ni é re' sisi daj rún' gui'yā si sa' nico xuman' Capernaum, nì da'nga' daj gui'yā xánj né' nan nej aj. —Daj gataj Jesús.

²⁴Ngaa nì gataj ruhua' yún Jesús:

—Ataj yyaj gunun a ni é re' sisi nitaj si a'mi sa' ni tsínj rian 'ngo tsínj a'mi si-nuguan' Yan'anj sisi huin ni sij ni tsínj xanj.

²⁵Nì huin yya atā gunun a ni é re' sisi guimán nico ni ngüi mmij rian nne ni tsínj israelita ni yo' gane tsínj gu'naj Elías yu'uj daj asij ná. Nì nun gaman' hua'nij yo' táj nej. Nì ducu ga xi'nā nín' gachra' yu'uj daj. ²⁶Sani nun ga'nj Yan'anj gan'anj Elías chracuij sí' ni ngüi mmij guimán Israel. Sani gan'anj sí' ne' xe' rian 'ngo ngüi mmij gane xuman' Sarepta rian gu'naj Sidón.

²⁷Nì guimán nico ni ngüi ga'nan' xi'i nni scanij ni tsínj israelita ngaa gane Eliseo huin sí' 'ngo tsínj ga'mi si-nuguan' Yan'anj yu'uj daj asij ná.

Sani nun ganahuin ni a 'ngo ni sij mánj. Sani ganahuin tsínj gu'naj Naamán huin sij 'ngo tsínj 'na' ango yu'uj gu'naj Siria, gui'yaj Eliseo. — Daj gataj Jesús gunun ni tsínj man chruhua nuhui daj.

²⁸Ni ngaa gunun ni sij nuguan' ga'mi Jesús, ni ducu ga'man ruhua ni sij ni'yaj ni sij Jesús. ²⁹Ni naxuman ni sij guiri ni sij chruhua xuman' Jesús. Ni gan'anj ni sij chra 'ngo quij xacan rian gui'yaj ni sij xánj ni sij. Ni huin ruhua ni sij duguéj ni sij Jesús ne' nica'. ³⁰Sani gachin Jesús dani ni sij gan'anj sí' nánj.

Un hombre que tenía un espíritu inmundo

³¹Hué dan ni gan'anj Jesús xuman' Capernaum huin xuman' ngaj estado Galilea. Ni yu'uj daj gaxi'i Jesús digyán sij rian ni ngüi ni güi naránj ruhua ni sí'. ³²Sani gahuin yan'anj ruhua ni ngüi daj digyán sij rian ni sí'. Daj si si-nuguan' sij nicaj sun.

³³Ni nne 'ngo tsínj nun nane xi'i chruhua niman chruhua nuhui. Ni gaguáj nucuj sí'. Ni gataj sí':

³⁴—Dunáj re' ni únj. Ni un sin huin ni diguj re' nga ni únj huin re' Jesús Nazareno únj. Ni 'na' re' duguanj ni'yáj re' ni únj ní'. Ni hua ni'inj re' si huin re' tsínj sa' nin' chruhua niman 'na' rian Yan'anj xanga' nej aj. —Gataj nane xi'i daj gunun Jesús.

³⁵Ngaa ni ga'mi huee Jesús rian nane xi'i daj. Ni gataj sij:

—Dínj gane du'ua so'. Ni gahui so' chruhua niman sí'. —Daj gataj Jesús.

Ngaa ni naxiru' tsínj daj dani ni ngüi, gui'yaj nane xi'i daj. Ni gahui-í' chruhua niman tsínj daj. Ni nitaj 'ngo si gahuin gui'yaj nane xi'i tsínj daj ga mánj. ³⁶Ni gan'anj ruhua daran' ni sij. Ni gataj ni sij gunun ni dugüi' ni sij:

—Ni un nuguan' huin nuguan' nan únj. Nicaj nucuj tsínj nan sun. Ni a'nin' sí' sun rian ni nane xi'i. Ni ahui-í' chruhua niman ni ngüi, 'yaj sí'. —Daj gataj ni sij nej aj.

³⁷Ni nuna ni ngüi nin' gachra' rian ni xuman' xi'i Jesús si gui'yaj sa' sí'.

Jesús sana a la suegra de Pedro

³⁸Ngaa ni gahui Jesús chruhua nuhui daj. Ni gatúj sij chruhua ducua Simón. Ni a'nan' nni chej Simón. Ni ducu nun gachi' ún'. Ni ga'mi yaco ni sij xi'i yun'unj a'nan' daj rian Jesús. ³⁹Ngaa ni ga' nitu Jesús rian yun'unj xana daj. Ni ga'nin' sij sun sisi guxun anéj xi'i daj rian ún'. Ni hué 'ngo hora daj, ni xi'nej gachi' daj nachica ún'. Ni gaxi'i man'an ún' gui'yaj xugüi ún' si xa ni tsínj daj.

Muchos sanados al ponerse el sol

⁴⁰Ni ngaa gatúj güi, ni nicaj ni sij daran' ni ngüi a'nan' gal' rian xi'i ga'na' ni sij rian Jesús. Ni guta' sí' ra'a sí' rian daran' ni ngüi daj. Ni nahuin daran' ni sij, gui'yaj sí'. ⁴¹Ni gahui nane xi'i chruhua niman nico ni ngüi a'nan' daj. Ni gaguáj ni nane xi'i gahui daj. Ni gataj ni sij:

—Hué re' huin da'nj Yan'anj xanga'. —Daj gataj ni nane xi'i daj.

Sani ga'mi huee Jesús rian ni nane xi'i. Ni nun ga'uej ruhua sij ga'mi

ni nanē xī'i daj. Daj si ni'i-ín' si hué Jesús huin Cristo, tsínj 'na' nacaj ni ngüi.

Jesús recorre Galilea predicando

⁴²Ni ngaa guixiguin ango güi, ni gahui Jesús xuman' daj gan'anj sij yu'uj rian nitaj ni ngüi mán. Sani nano' ni ngüi sij. Ni guisíj ni sí' rian nne sij. Ni nun ga'uej ni sí' sisi gan'anj Jesús rian ni sí'.

⁴³Sani gataj Jesús gunun ni sí':

—Hua nian gan'ān ango ni xuman' ga'mī nuguan' sa' xi'í si nicaj sun Yan'anj rian ni ngüi si da'nga' daj ga'níj Yan'anj yünj ga'nāj. —Gataj Jesús gunun ni ngüi.

⁴⁴Ngaa ni huaj Jesús ga'mi sa' sij si-nuguan' Yan'anj chruhua si-nuhui ni tsínj israelita nne estado Galilea.

La pesca milagrosa

5 Ni 'ngo güi niquin' Jesús du'ua laguna xachij gu'naj Genesaret. Ni gada'ui ni ngüi rian sij si huin ruhua ni sí' gunun ni sí' si-nuguan' Yan'anj. ²Ni guini'i Jesús niquin' huíj riō chéj rian nnee du'ua laguna daj. Ni hua gahui ni tsínj da'a xucuj ruhua nungüej-é' na'nin' ni sí' nnánj. ³Ngaa ni gatúj Jesús chruhua 'ngo riō huin si-riō Simón. Ni gachínj sij rian Simón sisi guxun sí' doj riō daj gan'anj-án' doj rian laguna daj. Ngaa ni gan'anj gane Jesús. Ni hué asij yu'uj daj gaxi'i sij digyán sij nuguan' sa' rian ni ngüi mán du'ua laguna daj. ⁴Ni ngaa guisíj ga'mi Jesús rian ni ngüi, ni gataj sij gunun Simón:

—Nícaj re' riō gan'anj re' rian gunun dani nnee. Ni dínj re' nnánj

chruhua nnee guida'á re' xucuj. — Daj gataj Jesús.

⁵Sani gataj Simón:

—Maestro, hua gui'yaj sun ni únj nigan'. Sani ni a 'ngo xucuj nun ga'ue guida'a únj mánj. Sani xi'í si gataj man'án re' sisi dínj ruhua' yún únj nnánj, ni da'nga' daj gui'yaj únj nánj. —Daj gataj Simón.

⁶Ni ngaa gui'yaj ni sij daj, ni ducu guida'a ni sij xucuj da' xi'nin' nnánj, gui'yaj xucuj. ⁷Ni gui'yaj ra'a ni sij dugüi' ni sij, ni tsínj man chruhua ango riō sisi ga'na' ni sí' chraçuij ni sí' ni sij. Ni ga'na' ni sí'. Ni gara daran' ni sij xucuj chruhua nungüej riō. Sani ducu gara chruhua nungüej-é' da' doj, ni naga' nungüej-é' daqui nnee. ⁸Ni ngaa guini'i Simón Pedro si gahuin, ni ganiquin' ráj dacoj sij ne' rian Jesús. Ni gataj sij:

—Guxun anéj re' man'án re' riānj si huinj 'ngo tsínj da'ui gaquin'. — Gataj Pedro gunun Jesús.

⁹Ni hué daj guxu'ui' daran' ni dugüi' Simón si hua yya guida'a ni sij nico xucuj. ¹⁰Ni gan'anj ruhua nungüej tsínj gu'naj Jacobo nga Juan huin nungüej sí' da'níj Zebedeo. Ni huin nungüej sí' tsínj nicaj dugüi' nga Simón nej. Sani gataj Jesús rian Simón:

—Si guxu'uí' re' mánj. Daj si asij acuan' ni daj rún' gui'yáj re' guida'á re' xucuj, ni da'nga' daj gui'yáj re' nga ni ngüi sisi guinico' sa' ni sij man'ānj. —Daj gataj Jesús.

¹¹Ni nicaj ni sij nungüej riō ga'na' ni sij rian yo'ój. Ni 'ngo dunáj ni sij daran'anj. Ni gaxi'i ni sij guinico' ni sij Jesús.

Jesús sana a un leproso

¹²Ni 'ngo güi nne Jesús 'ngo xuman'. Ni guisíj 'ngo tsínj a'nan' xi'i nnij rian sij. Ni ngaa guini'i sí' Jesús, ni ganiquin' ráj dacoj sí' rian Jesús. Ni ga' rian sí' da' rian yo'ój. Ni ga'mi yaco sí' rian Jesús. Ni gataj sí':

—Señor, sisi huin ruhuá re', ni ga'ue gui'yaj gono'ó re' yünj, ni xi'ne xi'i a'nānj. —Gataj tsínj a'nan' daj.

¹³Ngaa ni guta' Jesús ra'a sij chra tsínj daj. Ni gataj sij:

—Huin ruhuāj sisi ga sa' nnee cúj re' aj. —Daj gataj Jesús.

Ngaa ni 'ngo hora xi'nej xi'i a'nan' tsínj daj.

¹⁴Ngaa ni ga'nin' Jesús sun rian sí', ni gataj sij:

—Si ganata' re' rian ni a 'ngo ni ngüi mánj. Maan si gan'anj re' digyán re' man'án re' rian chrej. Ni nicaj re' 'ngo xucu ga'ui' re' rian Yan'anj daj rún' ga'nin' Moisés sun güenda gahuin-ín' 'ngo da'nga' sisi hua ganahuín re'. Ngaa ni xacaj ni chrej cuenta sisi hua ganahuín re', gui'yaj man'ānj. —Daj gataj Jesús.

¹⁵Sani guixi'ni nuguan' xi'í si sa' gui'yaj Jesús. Ni nahuin yu' nico ni ngüi huin ruhua gunun si-nuguan' sij. Ni ruhua ni sij si ganahuin xi'i a'nan' ni sij, gui'yaj Jesucristo nej. ¹⁶Sani guxun anéj Jesús man'an sij rian ni ngüi. Ni gan'anj sij 'ngo yu'uj nitaj ni ngüi mán gachínj jni'yaj sij rian Yan'anj.

Jesús sana a un paralítico

¹⁷Ni 'ngo güi nne Jesús digyán sij rian ni ngüi. Ni nne ni tsínj

fariseo nga ni tsínj digyán ley nga sij nej. Ni 'na' ni sí' ni xuman' ngaj estado Galilea nga estado Judea nej, xuman' Jerusalén nej. Ni ganahuin ni ngüi a'nan', gui'yaj Jesús nga si-fuerza man'an Señor huin Yan'anj.

¹⁸Hué dan ni guisíj go'ngo ni tsínj ata ni sij 'ngo tsínj nare' dacoj rian 'ngo chrun xéj. Ni nano' ni sij daj gatu ni sij chruhua hue' guruj ni sij tsínj a'nan' daj rian Jesús. ¹⁹Sani rian man nin' ruhua ni ngüi, ni nun ga'ue guiri' ni sij rian gachin ni sij nga tsínj daj. Ngaa ni gahui ni sij chra hue'. Ni ga'nej ni sij teja. Ni dunij ni sij nanaj rian chrun xéj tsínj a'nan' daj. Ni gurúj ni sij tsínj daj dani ni ngüi rian Jesús.

²⁰Ni ngaa guini'i Jesús sisi xuman ruhua ni sij ni'yaj ni sij sí', ni gataj sí' gunun tsínj a'nan' daj:

—Jnān, nicā 'ngo niman nico rian si-gaquin' so' nānj. —Gataj Jesús.

²¹Ngaa ni gaxi'i gani ruhua ni tsínj fariseo nga ni tsínj digyán ley nuguan' nan nga ni dugüi' ni sij:

—Ni un sin huin tsínj nan, ni a'mi quij sij rian Yan'anj únj. Urin Yan'anj ga'ue guinicaj niman nico rian si-gaquin' ni ngüi aj. —Da'nga' daj gani ruhua ni tsínj daj.

²²Sani xacaj Jesús cuenta daj gani ruhua ni sij. Ni gataj sij:

—Ni un sin huin ni ani ruhua á re' nuguan' da únj. ²³Hua huij nuguan' ga'ue gatā gunun tsínj nan. Asi ga'ue gatā gunun sij: “Nicā 'ngo niman nico rian xi'í si-gaquin' re'.” Asi ga'ue gatā gunun sij: “Nāchica re' gache re'.” Nan huin huij nuguan' ga'ue gatā gunun sij. ²⁴Ni huin ruhuāj sisi xacaj á re' cuenta sisi nicaj sünj rian xungüi nan huinj

da'níj ni ngüi. Ní ga'ue guinicā 'ngo niman nico xi'í si-gaquin' ni ngüi aj. —Daj gataj Jesús gunun ni sij.

Ngaa nī gataj Jesús gunun tsínj nare' dacój daj:

—Atā gunun man'án re' sisi nachica re', nī nacaj re' chrun xéj. Ní güij nan' ducúa re' nánj. —Daj gataj Jesús gunun tsínj daj.

²⁵Ní 'ngo hora da nī nachica tsínj daj rian daran' ni ngüi. Ní nacaj sij chrun xéj taj sij daj. Ní nan' sij ducúa sij. Ní ga'mi sa' 'ueé sij rian Yan'anj.

²⁶Ní gan'anj ruhua ni ngüi mán yu'uj daj ga'mi sa' ni sij rian Yan'anj. Ní guxu'ui' ni ngüi daj. Ní gataj ni sij:

—Yyaj nī guini'i né' 'ngo si sa', gui'yaj Yan'anj. —Daj gataj ni ngüi daj gunun dugüi' ni sij.

Llamamiento de Leví

²⁷Hué dan nī gahui Jesús ne' chrej xe'. Ní guini'i sij 'ngo tsínj a'nej pesto. Ní gu'naj sí' Leví. Ní nne sí' rian mesa a'nej sí' pesto. Ngaa nī gataj Jesús gunun sí':

—Guinico' re' man'ánj gan'anj né'. —Daj gataj Jesús.

²⁸Hué dan nī naxuman sí', nī dunáj sí' daran' si nicaj sí'. Ní guinico' sí' Jesús gan'anj sí'.

²⁹Ngaa nī gui'yaj Leví gui'yanj nico ducúa sí' xi'í Jesús. Ní man nico ango ni tsínj a'nej pesto nga ango ni ngüi nej. Ní nne daran' ni sij rian mesa xa ni sij nga Jesús.

³⁰Sani gaxi'i ga'mi quij ni tsínj fariseo nga ni tsínj digyán ley. Ní gataj ni sij rian ni tsínj nico' Jesús:

—Ní un sin huin nī xa ni é re' go'o ni é re' nga ni tsínj 'yaj gaquin' nej únj. —Daj gataj ni sij.

³¹Ngaa nī gataj Jesús:

—Nitaj si ní'yanj ni ngüi hua sa' 'ngo tsínj 'yaj gono'o mánj. Sani ni ngüi a'nan' ní'yanj 'ngo tsínj gono'o aj. ³²Sé si 'náj gaquin ni ngüi hua sa' mánj. Sani ga'náj gaquin ni ngüi 'yaj gaquin' sisi ganani ruhua ni sij xi'í si-gaquin' ni sij. —Gataj Jesús gunun ni sij.

La pregunta sobre el ayuno

³³Ngaa nī gataj ni sij gunun Jesús:

—Ní un sin huin nī nico' huaj 'yaj ni tsínj nico' Juan ayuno únj. Ní achínj jni'yaj nín' ruhua ni sij rian Yan'anj. Ní hué daj 'yaj ni tsínj fariseo nej. Sani ni tsínj nico' man'án re', nī ya'yoj xa ni sij go'o ni sij aj. —Daj gataj ni sij.

³⁴Ngaa nī gataj Jesús:

—Daj rún' 'yaj 'ngo tsínj xacaj yun'unj xana da'nga' daj 'yā. Ní ngaa gahuin gui'yanj xacaj 'ngo tsínj daj yun'unj xana, nī si ga'ue gui'yaj tsínj gan'anj gui'yanj daj ayuno mánj. ³⁵Sani hua 'ngo güi ngaa guida'a ni tsínj quij tsínj xacaj yun'unj xana daj. Hué dan nī gui'yaj ni tsínj nico' man'ánj ayuno aj. —Daj gataj Jesús gunun ni sij.

³⁶Hué dan nī nani Jesús 'ngo nuguan' digyán sij rian ni sij. Ní gataj sij:

—Ní a 'ngo né' si ga'ue ga'nin' né' du'ua atsij naca, nī nara né' du'ua atsij re'e mánj. Sisi da'nga' daj gui'yaj né', nī guere' atsij naca da, gui'yaj né' nánj. Ní da'nga' daj si ga'ue ga 'ueé atsij re'e daj, gui'yaj né' nga atsij naca da mánj. ³⁷Ní si ga'ue ga'nij né' vino naca chruhua nnij re'e. Daj si tsitsi' nnij daj gui'yaj vino naca da nej. Hué dan nī 'ngo guere'

vino nga nnij nej. ³⁸Hué dan n̄i hua n̄ian ga'n̄ij né' vino n̄aca chruhua nnij n̄aca. Ngaa n̄i 'ngo mán sa' vino nga nnij. N̄i daj rún' huin vino n̄aca daj huin si-nuguan'ānj. ³⁹N̄i ngaa go'o ni sij vino gachij, n̄i nitaj si huin ruhua ni sij go'o ni sij vino n̄aca. Daj si: "Vino gachij huin si sa' go'o ni sij", ataj ni sij nej aj. Xi'í daj na'uej ruhua ni é re' guinico' ni é re' si-ducuan̄j huin nuguan' n̄aca. —Daj gataj Jesús gunun ni sij.

Los discípulos recogen espigas en el día de reposo

6 N̄i 'ngo güi naránj ruhua ni ngüi, n̄i achéj Jesús riqui nnaa strigo. Ngaa n̄i rocoj ni tsínj nico' Jesús ca strigo. N̄i dixá ra'a ni sij ca. N̄i gahui strigo, n̄i xa ni sij. ²Ngaa n̄i nachínj snan'an̄j ni tsínj fariseo ni sij. N̄i gataj ni sí':

—N̄i un sin huin n̄i 'yaj á re' da únj. N̄i na'uej si-ley Yan'an̄j sisi gui'yaj né' sun daj güi naránj ruhua né' mánj. —Daj gataj ni sij.

³Ngaa n̄i gataj Jesús:

—Hua gaya á re' si gui'yaj xi' David ní'. Daj si 'ngo güi ngaa gachin xi'n̄a riqui ni dugüi' sij, ⁴n̄i gatúj sij chruhua ducúa Yan'an̄j. N̄i xacaj sij si-chrachrunj Yan'an̄j. N̄i xa sij. N̄i ga'ui' si xa ni tsínj man nga sij nunj si urin chrej ga'ue xa chrachrúnj daj. —Daj gataj Jesús.

⁵N̄i gataj ruhua' yún Jesús:

—N̄i nicaj súnj rian ni güi naránj ruhua né' huinj da'n̄ij ni ngüi. —Gataj Jesús gunun ni tsínj fariseo.

El hombre de la mano seca

⁶Ango güi naránj ruhua ni ngüi, n̄i gatúj Jesús chruhua si-nuhui ni

tsínj israelita. N̄i gaxi'i sij digyán sij rian ni tsínj daj. N̄i yu'uj daj n̄i nne 'ngo tsínj hua naco anéj chrej ra'a sa' sí'. ⁷N̄i naga'naj ni tsínj digyán ley nga ni tsínj fariseo sisi ganahuin tsínj daj, gui'yaj Jesús güi naránj ruhua ni ngüi. Daj si huin ruhua ni sí' ga'mi gaquin' ni sí' xi'í Jesús. ⁸Sani guini'i Jesús si ani ruhua ni sí'. Ngaa n̄i gataj Jesús rian tsínj daj:

—Naxuman so', n̄i guiniquin' so' dani ni únj. —Daj gataj Jesús.

Ngaa n̄i naxuman tsínj daj. N̄i ganiquin' sij.

⁹N̄i gataj Jesús gunun ni tsínj naga'naj daj:

—Nachínj snan'ān 'ngo nuguan' a ni é re'. A'uej si-ley Yan'an̄j sisi gui'yaj sa' né' güi naránj ruhua né' ní'. Asi sa' gui'yaj quij né', ruhua á re' ní'. N̄i a'uej si-ley Yan'an̄j sisi n̄acaj né' 'ngo tsínj ruhua gahui' ní'. Asi sa' gahui' sij, ruhua á re' sa'. —Daj gataj Jesús.

¹⁰N̄i ni'yaj Jesús rian daran' ni tsínj mán ganicaj xi'n̄ij sij. N̄i gataj sij gunun tsínj daj:

—Ducua so' ra'a so'. —Gataj Jesús.

N̄i ducua sí' ra'a sí'. N̄i ganahuin ra'a sí'. ¹¹Sani ducu ga'man ruhua ni tsínj naga'naj daj. N̄i gaxi'i ni sij diga'mi dugüi' ni sij sisi daj gui'yaj xi'i ni sij nga Jesús.

Elección de los doce apóstoles

¹²N̄i 'ngo ni güi daj gan'an̄j Jesús riqui 'ngo quij. N̄i gachínj jni'yaj sij n̄igan' n̄in' rian Yan'an̄j. ¹³N̄i ngaa guixiguin, n̄i gaquínj sij ni tsínj nico' sij ga'na'. N̄i naciui sij xuhuij ni sí'. N̄i dugu'naj sij ni tsínj daj apóstol. N̄i nuguan' daj huin ruhuaj

gata tsínj a'mi si-nuguan' Jesús rian ni ngüi. ¹⁴Ni 'ngo ni sij huin Simón. Ni dugu'naj Jesús Pedro sí' nej. Ni angó sí' huin jnánj Pedro, tsínj gu'naj Andrés. Ni ángó ni sí' huin Juan nej, Felipe nej, Bartolomé nej, ¹⁵Mateo nej, Tomás nej, Jacobo, da'níj Alfeo nej. Ni ángó sí' huin Simón huin sí' tsínj gu'naj Celote nej. ¹⁶Ni ángó sí' huin Judas, tsínj huin jnánj Jacobo. Ni ángó sí' huin Judas, tsínj digyán chrej rian ni tsínj ga'ná' guida'a Jesús.

Jesús atiende a una multitud

¹⁷Ni nanij Jesús riqui quij nga xuhuj ni apóstol. Ni ganiquin' sij rian hua ta. Ni nahuin yu' nico ni tsínj nico' rucu sij nga nico ni ngüi 'na' estado Judea nga xuman' Jerusalén nej, ni ngüi man du'ua nnee yan'anj huin nungüej xuman' gu'naj Tiro nga Sidón nej. Ni guisíj ni ngüi daj rian nne Jesús si gahuin ruhua ni sij gunun ni sij si-nuguan' sí'. Ni gahuin ruhua ni sij ganahuin ni sij sisi xi'nej xi'i a'nan' ni sij, gui'yaj Jesús. ¹⁸Ni ganahuin ni ngüi yaco ran' 'yaj ni nané xi'i, gui'yaj Jesús. ¹⁹Ni gahuin ruhua ni ngüi ganun ra'a ni sij man'an Jesús xi'í si nicaj fuerza sí'. Ni ganahuin daran' ni sij, gui'yaj sí'.

Bienaventuranzas y ayes

²⁰Ngaa ni nachica Jesús rian sij ni'yaj sij ni tsínj nico' sij. Ni gataj sij:

—Hua 'ueé rian án re' si huin ni é re' ni ngüi yaco ran'. Daj si gane niganj ni é re' rian nicaj sun Yan'anj.

²¹'Hua 'ueé rian ni é re' si huin ni é re' ni ngüi achin xi'ná riqui yyaj.

Daj si guiri' a ni é re' si xa nico ni é re', gui'yaj Yan'anj.

'Ni hua 'ueé gui'yaj Yan'anj rian án re' si huin a ni é re' ni ngüi aco. Daj si ga'nga' ni é re', gui'yaj Yan'anj.

²²'Ni hua 'ueé rian án re' si nun huin xan' ruhua ni ngüi ni'yaj ni sij ni é re', sisi ri nini ni sij ni é re' nej, sisi a'mi quij ni sij rian xi'í ni é re' nej, sisi a'mi quij ni sij xi'í si-xugüi ni é re' xi'í si nico' ni é re' man'anj, huinj da'níj ni ngüi. ²³Ngaa ni güi guiran' a ni é re' daj, ni ducu gahuin niá' ruhua á re'. Ni güej a ni é re' gahuin niá' ruhua á re' xi'í si gui'yaj sa' 'ueé Yan'anj nga á re' ngaa nan' ni é re' xata'. Ni hué daj gui'yaj quij ni xi ni tsínj 'yaj quij daj nga ni tsínj ga'mi si-nuguan' Yan'anj asij ná.

²⁴'Saní ducu niqúi niman ni é re' huin ni é re' ni tsínj xuru'ue. Daj si urin xungüi nan guiri' ni é re' si huin niá' ruhua ni é re'.

²⁵'Ni ducu niqúi niman ni é re' ni tsínj gara ran riqui yyaj. Saní ne' rucu ni gachin xi'ná riqui ni é re'.

'Ni ducu niqúi niman ni é re' ni tsínj a'nga' acuan'. Saní ne' rucu ni nani ruhua á re'. Ni gaco ni é re' nej.

²⁶'Ni ducu niqúi niman ni é re' ngaa a'mi sa' ni ngüi xi'í ni é re'. Ni da'nga' daj ga'mi ni xi ni ngüi daj rian ni tsínj gataj sisi a'mi ni sí' si-nuguan' Yan'anj xanga'. Saní tsínj digya' yun'unj huin ni sí'. —Daj gataj Jesús.

El amor hacia los enemigos; la regla de oro

²⁷Ni gataj ruhua' yún Jesús:
—Saní atá gunun a ni é re' sisi gahuin 'i ruhua á re' ni'yaj á re' ni

ngüi unun' nga á re'. Nì guì'yaj sa' á re' nga ni tsínj nun huin xan' ruhua ni'yaj á re' nej. ²⁸Nì ga'mi sa' a ni é re' rian ni ngüi a'mi nuguan' quij rian án re'. Nì gachinj jni'yaj á re' rian Yan'anj sisi guì'yaj Yan'anj sinduj rian ni ngüi a'mi quij rian án re' nej. ²⁹Nì sisi hua 'ngo tsínj ga'ui' anéj chrej rián re', nì ga'nin' ruhuá re' danicaj re' ga'ui' sí' anéj chrej rián re' nej. Sisi ga'nej 'ngo tsínj si-reto re', nì ga'nin' ruhuá re' si ga'nej sij si-gató re' nánj. ³⁰Gara xiná re' ga'ui' re' si achínj ni ngüi rián re'. Nì sisi ga'nej ni ngüi 'ngo si'yáj re', nì si nachínj re' si'yáj re' mánj. ³¹Nì daj rún' huin ruhua ni é re' guì'yaj sa' ni ngüi nga ni é re', nì da'nga' daj guì'yaj sa' man'an ni é re' nga ni sij.

³²Nì sisi 'i ruhua ni é re' ni'yaj ni é re' urin ni ngüi 'i ruhua ni'yaj man'án re', ngaa nì si gani ruhua á re' sisi naru'ue Yan'anj rian án re' mánj. Daj si da ni tsínj 'yaj gaquin', nì 'i ruhua ni sij ni'yaj ni sij ni tsínj 'i ruhua ni'ya ni sij. ³³Nì sisi guì'yaj sa' re' rian urin ni ngüi 'yaj sa' nga man'án re', ngaa nì un sin huin nì naru'ue Yan'anj rian án re', ruhua á re' únj. Daj si 'yaj sa' ni ngüi 'yaj gaquin' rian ni dugüi' ni sij. ³⁴Nì sisi chracuìj re' san'anj rian urin ni ngüi ga'ue naru'ue rián re', ngaa nì sé 'ngo nuguan' huin mánj. Nì un sin huin nì naru'ue Yan'anj rian án re', ruhua á re' únj. Daj si da'nga' daj 'yaj ni tsínj 'yaj gaquin', chracuìj ni sij san'anj rian ni dugüi' ni sij. Nì ana'uìj ni sij si nahuín ra'a ni sij.

³⁵Hué dan nì gahuín 'i ruhua á re' ni'yaj á re' ni ngüi unun' nga á re'. Nì guì'yaj sa' á re' rian ni ngüi nej. Nì chracuìj a ni é re' rasun ni ngüi.

Nì si gana'uìj ni é re' si nariqui ruhua' yún ni sij rian án re' mánj. Ngaa nì man'an Yan'anj guì'yaj 'ueé nin' nga á re'. Nì gahuín a ni é re' da'níj Yan'anj achij nne xata'. Daj si 'yaj sa' Yan'anj nga ni ngüi nitaj si acaj cuenta si 'yaj sa' Yan'anj rian ni sij. Nì hué daj 'yaj sa' Yan'anj nga ni ngüi xi'i nej. ³⁶Nì gahuín 'i ruhua ni é re' ni'yaj á re' ni ngüi daj rún' 'i ruhua chrej ni é re' nne xata' ni'ya yun' nej aj.

El juzgar a los demás

³⁷'Si ga'ui' a ni é re' gaquin' dugüi' a ni é re' mánj. Asíj nì si ga'ui' Yan'anj gaquin' a ni é re'. Nì si gataj ni é re' sisi da'ui dugüi' ni é re' gaquin' mánj. Ngaa nì nitaj si gataj Yan'anj si da'ui man'an án re' gaquin' nej. Guínicaj ni é re' 'ngo niman nico rian ni dugüi' ni é re', ngaa nì Yan'anj guínicaj 'ngo niman nico rian xi'f man'an ni é re' nej. ³⁸Ga'ui' ni é re' rian ni ngüi, ngaa nì Yan'anj riqui rian án re' nej. Nì daj rún' 'yaj 'ngo tsínj sa' ruhua du'uej 'níj, nì ara sa' sij rio, nì da'nga' daj guírion sa' Yan'anj rio riqui-f' rian né' ga'nij né' chruhua xinánj né'. Nì guì'yaj ran Yan'anj rio. Nì naganan'-án' rio daj. Nì gara sa' Yan'anj rio daj nej. Nì daj rún' 'yaj ni é re' nga dugüi' ni é re', nì da'nga' daj guì'yaj Yan'anj nga ni é re' nej. —Daj gataj Jesús gunun ni sij.

³⁹Ngaa nì nani Jesús 'ngo cuento digyán sij rian ni tsínj nico' sij. Nì gataj sij:

—Nì ga'ue digyán tsínj duri daj chrej rian ango tsínj duri gan'anj nungüej sij ruhua á re' ní'. Sì ga'ue mánj. Gan'anj nungüej sij, sani

guinij nungüej sij chruhua 'ngo yu'uj nánj. ⁴⁰Nitaj si huin rian 'ngo tsínj 'na' gahuin chrún daj nga tsínj digyán rian sij. Sani sisi gahuin chrún sa' sij, ngaa ni gahuin sij rún' huin tsínj digyán rian sij. ⁴¹Ni un sin huin ni ni'yáj re' sisi nun daru chrún rundij rian jnánj re' únj. Sani nitaj si ni'yáj re' si nun 'ngo caj rundij rian man'án re'. ⁴²Ni sisi nitaj si acáj re' cuenta si nun 'ngo caj rián re', ni asa' ga'ue gataj re' rian jnánj re': "Guiniquin' acuán re', ni guirij daru chrún rundij rián re' aj." Ni sisi daj atáj re', ni tsínj digya' yun'unj huin re'. Guiri siní re' caj nun rian man'án re' aj. Ngaa ni ga'ue guini'yaj sa' re' guiri re' daru chrún rian jnánj re' aj. —Daj gataj Jesús gunun ni sij.

Por sus frutos los conoceréis

⁴³Ngaa ni gataj ruhua' yún Jesús: —Ni chrún sa', ni si ga'ue gayu chrúj nitaj si hua sa' mánj. Ni chrún nitaj si hua sa', ni si ga'ue gayu chrúj hua sa' chraj mánj. ⁴⁴Ngaa ni'yaj né' daj hua si ayu chra' 'ngo chrún daj, ni ni'i né' un chrún huin-ín'. Si ga'ue ga'ne né' higo riqui ni coj tanj mánj. Ni si ga'ue naran' né' uva riqui coj yatan mánj. ⁴⁵Ni 'ngo tsínj sa', ni a'mi sí' nuguan' sa' xi'í si nara sa' sí' nuguan' hua sa' chruhua niman sí'. Sani tsínj quij hua, ni a'mi sí' nuguan' quij xi'í si nara sí' nuguan' quij chruhua niman sí'. Daran' ni nuguan' nara né' chruhua nimún', ni hué ni nuguan' daj ahui du'ó' a'mí'. —Daj gataj Jesús.

Los dos cimientos

⁴⁶Ngaa ni gataj ruhua' yún Jesús:

—Ni un sin huin ataj ni é re' sisi Señor huinj, sani nitaj si dagahuin a ni é re' si atā gunun a ni é re' únj. ⁴⁷Yyaj ni gatā gunun a ni é re' daj hua 'ngo tsínj 'na' riánj. Ni unun sí'. Ni dagahuin sí' si atā gunun sí' nej. ⁴⁸Huin sí' rún' huin 'ngo tsínj gui'yaj hue'. Gánj gunun sini yan sí' gunun nin' ruhua. Ni gune' sí' daqui hue'-é' rian huej. Hué dan ni ducu gahui nane. Ni gara xinéj nnee. Ni ga'ui' nucuaj nnee daj rian hue'. Sani nun guisiqui' hue' daj. Daj si gahuin ran sa' hue'-é' gune' sí' rian huej. ⁴⁹Ni hua ango tsínj unun si-nuguan'ánj. Sani nun digahuin sí' si atā gunun sí'. Ni tsínj daj huin rún' huin 'ngo tsínj gui'yaj hue' rian yo'ój chru. Sani nun ganj gunun sí' rian gune' sí' daqui hue'. Ngaa ni gara xinéj nnee. Ni ga'ui' nucuaj nnee daj rian hue'. Ngaa ni 'ngo ganatúj ó'. Ni 'ngo guere' hue'-é' da aj. Daj hua tsínj nun unun si-nuguan'ánj. —Gataj Jesús gunun ni tsínj nico' sij.

Jesús sana al siervo de un centurión

7 Ngaa guisij ga'mi Jesús rian ni ngüi daj, ni gan'anj sij xuman' Capernaum. ²Ni yu'uj daj nne 'ngo snado centurión. Ni a'nan' 'ngo simoso capitán daj. Ni ruhua gahui' sí'. Ni 'i ruhua sij ni'yaj sij si-moso sij. ³Ni ngaa gunun centurión daj si a'mi ni ngüi xi'í Jesús, ni ga'nij sij go'ngo ni tsínj huin achij man scanij ni tsínj israelita, gan'anj gachinj jni'yaj ni sí' rian Jesús sisi ga'na' gui'yaj gono'o Jesús si-moso centurión daj. ⁴Ni ngaa guisij ni sij rian Jesús, ni ga'mi yaco ni sij. Ni gataj ni sij:

—Hua nian chracuij re' centurión daj. ⁵Daj si 'i ruhua sij ni'yaj sij né' huin né' ni tsínj israelita. Ni hué sij gui'yaj si-nuhui né' nej. —Gataj ni sij gunun Jesús.

⁶Ngaa ni gan'anj Jesús nga ni sij. Ni ngaa ruhua gahuin nichrun' Jesús guisij sij hue', ni ga'níj centurión daj gan'anj go'ngo ni tsínj nicaj dugüi' nga sij, gataj ni sí' gunun Jesús:

—Señor, si gahuin ruhuá re' mánj. Daj si sé tsínj sa' huin tsínj daj, ataj sij. Xi'í daj ni si gatúj re' chruhua ducua' sij, ataj sij mánj. ⁷Ni xi'í si sé tsínj sa' huin sij ruhua sij, ni nun guisij ruhua sij guchi' sij rián re', ataj sij. Maan si ga'nin' re' sun, ni ganahuin si-moso sij, gui'yáj re', ataj sij. ⁸Daj si hua tsínj a'nin' sun rian sij. Ni hué sij a'nin' sun rian ni snado nej. Ni ngaa a'níj sij 'ngo snado gan'anj sí', ni huán'anj sí'. Ni ngaa ataj sij ga'na' 'ngo sí', ni 'na' sí' nej. Ni ngaa a'níj sij si-moso sij gui'yaj sun sí', ni hué daj gui'yaj sun sí' nej. —Daj gataj ni dugüi' centurión daj gunun Jesús.

⁹Ni ngaa gunun Jesús nuguan' gataj tsínj daj, ni gan'anj ruhua sij. Ni guini'yaj sij rian ni tsínj nico' sij. Ni gataj sij:

—Xanga' atā gunun a ni é re' sisi nun nari'ij 'ngo tsínj israelita xuman ruhua rún' xuman ruhua tsínj centurión nan mánj. —Daj gataj Jesús.

¹⁰Ni ngaa nanicaj ni tsínj nicaj dugüi' nga centurión daj gan'anj ni sij ducua' sí', ni xacaj ni sij cuenta sisi hua ganahuin moso daj.

Jesús resucita al hijo de la viuda de Naín

¹¹Hué daj sij ni gan'anj Jesús 'ngo xuman' gu'naj Naín. Ni huaj ni tsínj

nico' sij nicaj dugüi' ni sí' nga nico ni ngüi huaj ni sí' nej. ¹²Ni ngaa huaj guisij sij du'ua xuman' daj, ni guini'i sij si huaj gachin' ni ngüi xanj daj 'ngo níman. Ni tsínj gahui' daj huin urin da'níj yun'unj mmij. Ni huaj nin' ruhua ni ngüi xanj nga yun'unj mmij da nej. ¹³Ni gani yaco ruhua Señor ni'i sij yun'unj mmij daj. Ni gataj sij:

—Si gacó so' mánj. —Gataj Jesús gunun ún'.

¹⁴Ngaa ni gan'anj nichu Jesús. Ni ganun ra'a sij chrun xéj. Ni guiniquin' ni tsínj ata níman. Ni gataj Jesús gunun tsínj gahui' daj: —Tsínj sno'o. Nachica re'. —Daj gataj Jesús.

¹⁵Ngaa ni nachica tsínj gahui' daj gane sí'. Ni gaxi'i sí' ga'mi sí'. Ni naga'ui' Jesús man'an sí' ra'a nni sí'.

¹⁶Ni ngaa guini'i ni ngüi si gui'yaj Jesús, ni guxu'ui' daran' ni sij. Ni gaxi'i ni sij ga'mi sa' ni sij rian Yan'anj. Ni gataj ni sij:

—Gurugüi' 'ngo tsínj huin achij a'mi si-nuguan' Yan'anj scanij né'. —Daj gataj ni sij.

Ni gataj ni sij nej:

—Ni 'na' ni'yaj Yan'anj ni ngüi nico' man'an Yan'anj. —Gataj ni sij gunun ni dugüi' ni sij.

¹⁷Ni gaxa'ni nuguan' xi'í si gui'yaj Jesús nin' gachra' estado Judea nga ango ni xuman' ngaj nichrun' nga-á'.

Los mensajeros de Juan el Bautista

¹⁸Ni nata' ni tsínj nico' Juan si gui'yaj Jesús gunun man'an sí'. Ngaa ni gaquínj Juan huij tsínj nico' sí' ga'na' nungüej sij rian sí'. ¹⁹Ngaa ni ga'níj Juan gan'anj nungüej sij

nāchin' snan'anj nungüej sij Jesús. Nī nan huin nuguan' ga'nj Juan rian Jesús:

—Hué re' huin tsínj nācay ni ngüi ní'. Asī gana'uij únj si ga'na' ango tsínj sa'. —Da'nga' daj huin nuguan' ga'nj Juan rian Jesús.

²⁰Hué dan nī guisj nungüej sij rian Jesús. Nī gataj nungüej sij:

—Ga'nj Juan, tsínj duguata' nnee, ga'na' nāchin' snan'anj nungüej únj man'án re' sisi so' huin tsínj ga'na' nācay ni ngüi ní'. Asī gana'uij únj ango tsínj ga'na' sa'. —Gataj nungüej sij gunun Jesús.

²¹Nī hué gue hora daj, nī ganahuin nico ni ngüi a'nan', gui'yaj Jesús. Nī guiri sij nane xi'i niman ni ngüi nej. Nī naxiguin rian ni ngüi duri, gui'yaj sij nej.

²²Hué xi'í daj nī gataj Jesús gunun nungüej sij:

—Güij nungüej é re'. Nī nata' nungüej é re' gunun Juan si guini'i nungüej é re' nga si gunun nungüej é re' nej. Daj si xiguin ni'yaj ni ngüi duri. Nī chéj ni tsínj yacuan nej. Nī nahuin sa' ni ngüi a'nan' xi'í nnij nej. Nī naxi'nij chraquij ni tsínj so'o nej. Nī ganá'nij ni niman gahui' nej. Nī unun ni ngüi yaco ran' nuguan' sa' nej. ²³Nī hua 'uee rian 'ngo tsínj nitaj si nānicaj ruhua ni'yaj sij xi'ij. Daj gataj nungüej é re' rian Juan.

—Daj gataj Jesús rian nungüej tsínj daj.

²⁴Nī ngaa nānicaj nungüej sí' nan' nungüej sí' rian Juan, ngaa nī gaxi'i ga'mi sa' Jesús rian ni ngüi xi'í Juan. Nī gataj sí':

—Nī ngaa gan'anj ni é re' gunun ni é re' si-nuguan' Juan quij qui'yanj nāco, nī daj hua sij guini'i

ni é re', ruhua ni é re' únj. Daj rún' 'yaj riā ngaa xinunj 'yaj nane, nī da'nga' daj 'yaj sij, ruhua ni é re' ní'. ²⁵Nī sisi sé daj 'yaj sij, nī un sin huin nī gan'anj ni'yaj á re' rian huaj sij únj. Gan'anj ni'yaj á re' 'ngo tsínj nun atsij nīa' ní'. Sanī sé daj huin sij mánj. Ni'i ni é re' sisi ni tsínj nun atsij nīa' nga ni tsínj utin' nico san'anj, nī nne ni sí' ducua' ni rey. ²⁶Nī un sin huin nī gan'anj ni'yaj á re' rian nne sij únj. Asī 'ngo tsínj a'mi si-nuguan' Yan'anj ní'. Xanga' nī hué daj huin sij aj. Nī hua achij Juan daj nga daran' ango ni tsínj ga'mi si-nuguan' Yan'anj anj.

²⁷'Nī asij ná nī garun sa' 'ngo tsínj ga'mi si-nuguan' Yan'anj xi'í Juan. Nī gataj Yan'anj:

A'nī 'ngo tsínj guinīcay nuguan' guchi' sij.

Nī tsínj daj guītaj dian sini rián re' gan'anj sij.

Nī gui'yaj xugüi sij si-chréj re' aj. Daj gataj si-nuguan' Yan'anj.

²⁸'Nī atā gunun a ni é re' sisi scanij ni tsínj ga'nga, gui'yaj ni yun'unj xāna, nī nitaj si rugüi' 'ngo tsínj huin achij daj rún' huin man'an Juan tsínj duguata' nnee. Sanī tsínj hua lij nīn', nī huin achij sij rian nicaj sun Yan'anj daj nga man'an Juan ga. —Daj gataj Jesús gunun ni ngüi.

²⁹Nī ngaa gunun ni ngüi nga ni tsínj a'nej pesto si gataj Jesús, nī gataj ni sij sisi dugu'naj huaj gui'yaj Yan'anj. Daj si hua gata' nnee ni sí', gui'yaj Juan. ³⁰Sanī ni tsínj fariseo nga ni tsínj digyán ley, nī nun ga'uej ruhua ni sij gunun ni sij daj huin ruhua Yan'anj gui'yaj Yan'anj xi'í ni sij mánj. Daj si nun gata' nnee ni sij, gui'yaj Juan.

³¹ Ngaa n̄i gataj Jesús:

—Daj un sin huin gui'yā guiri' digyānj rian án re' daj hua ni ngüi mán acuan' nan únj. ³² Daj rún' 'yaj ni tsin' gan'anj gane rian yu'ue ngaa ducuj, n̄i agua ni dugüi', n̄i hué daj huin ni sij. N̄i ataj anin'inj: "A'yanj únj riā rian án re' saj. Sani nun guiran'anj a ni é re' mánj.

Garáj ni únj chra' snanga. Sani nun gaco ni é re' mánj." Hué daj ataj ni tsin' rian ni dugüi' ni tsin' anj.

³³ Daj si ga'na' Juan tsínj duguata' nnee, n̄i nun xa sij chrachrúnj, nun go'o sij nnee vino nej. N̄i xi'í daj ataj á re' sisi nun nane xi'í niman sij aj. ³⁴ Asíj n̄i ga'na' da'níj ni ngüi huin man'ānj. N̄i xāj, n̄i go'ōj aj. N̄i ataj ni é re' sisi huinj 'ngo tsínj xa nasa', go'o nasa'. N̄i huinj 'ngo tsínj nicağ dugüi' nga ni ngüi 'yaj gaquin' nga ni tsínj a'nej pesto nej, ataj á re' xi'ij nej. ³⁵ Sani sisi 'yaj sa' 'ngo tsínj daj, n̄i ga'ue guini'i né' sisi tsínj ni'i sa' huin sij. —Daj gataj Jesús gunun ni sij.

Jesús en el hogar de Simón el fariseo

³⁶ Ngaa n̄i gaquínj 'ngo tsínj fariseo xā Jesús nga man'an sí'. Ngaa n̄i gatúj Jesús ducúa sí' gan'anj gane sij rian mesa. ³⁷ N̄i nne 'ngo yun'unj xana 'yaj gaquin' xuman' daj. N̄i ngaa gunun ún' sisi nne Jesús ducúa fariseo daj xa sij, n̄i nicağ ún' 'ngo gaga' alabastro nun gasiti guin' daj. ³⁸ N̄i niquin' ún' ne' xi'í Jesús. N̄i aco ún'. N̄i ayanj nnee rian ún' aco ún' daj dacój Jesús. N̄i ane-é' dacój Jesús, 'yaj ún'. N̄i naruhui ún' huee chra' ún' dacój Jesús. N̄i jnaco dacój sí', 'yaj ún'. N̄i garun du'ua ún' dacój Jesús.

N̄i garij ún' gasiti guin' daj dacój sí' nej. ³⁹ N̄i ngaa guini'i tsínj fariseo, tsínj ducua daj si gui'yaj yun'unj xana daj, n̄i gani ruhua man'an sí': "Sisi xanga' yya huin Jesús 'ngo tsínj a'mi si-nuguan' Yan'anj, ngaa n̄i xacaj sí' cuenta sisi yun'unj xana 'yaj gaquin' huin ún', n̄i atsi ún' man'an sij." Da'nga' daj gani ruhua tsínj fariseo daj xi'í Jesús. ⁴⁰ Ngaa n̄i gataj Jesús gunun tsínj fariseo daj:

—Simón, nicā 'ngo nuguan' gatā gunun re'. —Gataj Jesús.

—Gataj so', Maestro. —Gataj tsínj ducua daj.

⁴¹ N̄i gataj Jesús:

—Huij ran' tsínj daj da'ui san'anj rian 'ngo xuru'ue. N̄i 'ngo sij 'yaj xiquínj un'un' ciento san'anj denario. N̄i ango sij 'yaj xiquínj huij xia chi' san'anj denario. ⁴² N̄i rian nun guiri' nungüej sij naru'ue sij rian xuru'ue daj, n̄i ga'nin' ruhua sí' si da'ui nungüej sij. Ngaa n̄i, daj hua go'ngo nungüej sij garan' doj ruhua ni'yaj xuru'ue daj, ruhuá re' únj. —Daj gataj Jesús.

⁴³ —Ani ruhuáj sisi tsínj da'ui nico daj, n̄i garan' doj ruhua sij ni'yaj sij xuru'ue. —Daj gataj Simón.

—Hué dan huin xanga' yya. —Daj gataj Jesús gunun Simón huin tsínj fariseo daj.

⁴⁴ Ngaa n̄i nicağ Jesús ni'yaj sij yun'unj xana daj. N̄i gataj sij gunun Simón:

—Xacaj re' cuenta si gui'yaj yun'unj xana nan ní'. Ngaa gatü chruhua ducúa re', sani nun riquí re' nnee na'nij dacō mánj. N̄i yun'unj xana nan, n̄i nnee gaco ún' daj na'ni ún' dacō. N̄i huee chra' ún' jnaco ún' dacō nej. ⁴⁵ Nun garun du'ua

re' man'ānj mánj. Sanĭ asij gatū ducúa re', nĭ nun duna ún' si garun du'ua ún' dacō. ⁴⁶Nĭ nun garĭj re' gasiti chrāj. Sanĭ yun'unj daj garĭj ún' gasiti guin' daj dacō. ⁴⁷Xi'í daj nĭ atā gunun re' sisi da'ui ún' nico gaquin'. Sanĭ nicā 'ngo niman nico xi'í ni gaquin' da'ui ún'. Daj si 'ĭ nĭn' ruhua ún' ni'yaj ún' yūnj. Sanĭ ngaa ani ruhua 'ngo tsĭnj daj sisi doj huin gaquin' da'ui sij, nĭ doj 'ĭ ruhua sij ni'yaj sij yūnj. —Daj gataj Jesús gunun Simón.

⁴⁸Ngaa nĭ gataj Jesús gunun yun'unj xāna daj:

—Nicā 'ngo niman nico xi'í si-gaquin' re'. —Daj gataj Jesús.

⁴⁹Nĭ nne ango ni tsĭnj rian mesa daj. Nĭ gaxi'í ni man'an ni sij nachĭnj snan'anj ni sij ni dugüi' ni sij. Nĭ gataj ni sij:

—Nĭ un tsĭnj huin tsĭnj nan, nĭ ga'tue guĭnicaj sij niman nico rian ni gaquin', ruhua á re' únj. —Daj gataj ni tsĭnj daj.

⁵⁰Sanĭ gataj Jesús rian yun'unj xāna daj:

—Hua nacaj Yan'anj man'án re' xi'í si guxuman ruhuá re' ni'yáj re' yūnj. Gahuin din'inj ruhuá re' nan' re' ducúa re'. —Daj gataj Jesús gunun ún'.

Mujeres que sirven a Jesús

8 Nĭ ngaa gachin doj nĭ gachéj Jesús daran' rian ni xuman' nga ni rancho nej ga'mi sa' sij xi'í si nicaj Yan'anj sun rian né'. Nĭ nicaj dugüi' ni xuhuij ni tsĭnj nico' sij nej. ²Nĭ huaj go'ngo yun'unj xāna nga sij nej. Nĭ hua guiri Jesús nane xi'í chruhua niman da'aj ni ngüi daj. Nĭ nahuin ango da'aj ni ún', gui'yaj sij

nej. Nĭ scanij ni ún', nĭ huaj María gu'naj ún' Magdalena. Nĭ hua guiri Jesús ichij nane xi'í chruhua niman ún'. ³Nĭ huaj yun'unj gu'naj Juana huin ún' nicā tsĭnj gu'naj Chuza huin sí' tsĭnj nicaj yun'unj ni moso 'yaj rey Herodes. Nĭ huaj yun'unj gu'naj Susana nga nico ango ni ngüi xāna nej. Nĭ chracuij ni ún' si'yaj ni ún' rasun gachin rian Jesús.

Parábola del sembrador

⁴Nĭ gahui nico ni ngüi man rian ni xuman' gan'anj ni'yaj ni sij Jesús. Nĭ nahuin yu' nico ni ngüi rian Jesús. Hué dan nĭ nani Jesús 'ngo cuento digyán sij rian ni ngüi. ⁵Nĭ gataj sij:

—Gahui 'ngo tsĭnj dagaman' can. Nĭ ngaa dagaman' sij, nĭ guĭnij doj can chruhua chrej. Nĭ gachin ni ngüi gurun ni sij. Nĭ naran' ni xataj xa xuj. ⁶Nĭ guĭnij doj can daj rian yo'ój yej rian nitaj nico yo'ój. Nĭ ngaa xira' can daj, nĭ ganacoj. Daj si nitaj si hua 'yo yo'ój daj. ⁷Nĭ gayu doj can scanij tanj. Nĭ xira' nuguan'an can daj nga tanj. Hué dan nĭ ganē coj daj, gui'yaj tanj. ⁸Nĭ gayu doj can ango yo'ój sa'. Nĭ guixira' can daj. Nĭ gachij man'an can. Nĭ gayu sa' can. Nĭ 'ngo coj daj gahui 'ngo ciento can. —Daj gataj Jesús nani sij cuento rian ni ngüi daj.

Ngaa nĭ ga'mi nucuj Jesús. Nĭ gataj sij:

—Sisi nun chraquij a ni é re', nĭ gunun a ni é re' nej aj. —Daj gataj Jesús.

⁹Ngaa nĭ nachĭnj snan'anj ni tsĭnj nico' Jesús. Nĭ gataj ni sij gunun sí':

—Nĭ un sin huin cuento nan ruhuaj gata únj. —Daj gataj ni sij.

¹⁰Ngaa n̄i gataj Jesús:

—Rian ni é re' riqui Yan'anj sisi guini'i ni é re' daj hua rian nicaj sun Yan'anj. Sani rian ni ngüi nitaj si nicaj dugüi' ngāj, n̄i nanij cuento hua ránj. Ngaa n̄i guini'yaj ni sij. Sani nun guini'i ni sij. N̄i gunun chraquij ni sij. Sani na'ue gara da'nga' ruhua ni sij.

¹¹Hué nan huin si ruhuaj gata cuento digyānj rian án re'. Daj rún' hua can daj, n̄i da'nga' daj hua si-nuguan' Yan'anj. ¹²N̄i can guinij du'ua chrej, n̄i rún' hua ni ngüi gunun nuguan' huaj. N̄i ga'na' sichre. N̄i ri sichre nuguan' sa' daj niman ni sij sisi nun guxuman ruhua ni sij ni'yaj ni sij Yan'anj. Daj si na'uej ruhua sichre si nacaj Yan'anj ni sij. ¹³N̄i can guinij rian yo'ój yej, n̄i rún' hua ni ngüi gunun nuguan' huaj. Daj si ngaa gunun ni sij nuguan' sa' daj, n̄i nahuin ra'a ni sij. N̄i gahuin nia' ruhua ni sij. Sani 'yaj ni sij rún' 'yaj 'ngo coj nitaj nico ya'a siü. Doj gue güi xuman ruhua ni sij ni'yaj ni sij Yan'anj. Daj si ngaa guiran' ni sij sayun, n̄i gahuin n̄ini ni sij rian Yan'anj anj. ¹⁴N̄i can guinij scanij tanj rún' hua ango ni ngüi gunun nuguan' huaj. N̄i huin ruhua ni sij guiri' ni sij rasun man chruhua xungüi nan. N̄i digya' yun'unj san'anj ni sij si nahuij ruhua ni sij gahuin xuru'ue ni sij. Ngaa n̄i nitaj si 'yaj sa' ni sij ga mánj. ¹⁵N̄i can guinij rian yo'ój sa' hué daj hua ango ni ngüi gunun nuguan'. N̄i ngaa gunun ni sij nuguan' sa' daj, n̄i gahuin n̄ica ruhua ni sij nga nuguan' daj. Daj si hua sa' niman ni sij. N̄i hua n̄ica niman ni sij nej. N̄i 'yaj sa' ni sij. N̄i

nitaj si duna ni sij si-chrej Yan'anj mánj. —Daj gataj Jesús.

Nada oculto que no haya de ser manifestado

¹⁶Ngaa n̄i gataj ruhua' yún Jesús: —N̄i ngaa arún' yan'an chra 'ngo candil, n̄i si gune' huí né' riqui chru nga riqui nna ganun yan'an daj. Sani guto' xata' rian mesa sisi guixiguin yan'an daj rian ni ngüi gatu chruhua hue' guini'i ni sij. ¹⁷Ngaa n̄i n̄i a 'ngo nuguan' naránj ni ngüi acuan', sani daran'anj narugüi'. N̄i nitaj a 'ngo nuguan' guixij huí ni ngüi acuan', sani guini'i daran' ni ngüi xiguin sa'. ¹⁸Ngaa n̄i ga cuidado ni é re' daj unun ni é re' ni nuguan' nan. Daj si ga'ui' Yan'anj rian tsínj unun. Sani ga'ne Yan'anj da gue nicaj ni tsínj na'uej ruhua gunun sa'. Daj si ani ruhua ni sij sisi ni' sa' ni sij. Sani sé daj huin mánj. —Daj gataj Jesús gunun ni sij.

La madre y los hermanos de Jesús

¹⁹Ngaa n̄i guisij nni Jesús nga ni jnánj sij rian sij. Sani nun ga'ue gahuin nichrun' anin' nni sí' rian man'an sij. Daj si man n̄in' ruhua ni ngüi rian Jesús. ²⁰Ngaa n̄i nata' 'ngo tsínj daj rian Jesús:

—Nni re' nga ni jnánj re' ana'uij niquin' ne' chrej xe' huin ruhua ni sij guini'i ni sij man'an re'. —Daj gataj tsínj daj.

²¹Ngaa n̄i gataj Jesús:

—Nni nga ni jnán huin ni ngüi unun si-nuguan' Yan'anj. N̄i 'yaj ni sij si ataj nuguan' daj. —Daj gataj Jesús.

Jesús calma la tempestad

²²Hué dan n̄i 'ngo güi daj, n̄i gahui Jesús chruhua 'ngo rió achéj

rian nnee. Nĭ gatúj ni tsínj nico' sij chruhua riō nej. Nĭ gataj Jesús gunun ni sí':

—Gan'anj né' anéj chrej du'ua laguna xachij nan. —Daj gataj Jesús.

Nгаа nĭ gan'anj ni sij. ²³Nĭ nгаа huaj ni sij, nĭ gatoj Jesús. Nĭ gahui 'ngo nane nucuaj xxi rian laguna daj. Nĭ gara nnee chruhua riō. Nĭ ruhua guĭnij riō daj chruhua nnee. ²⁴Nгаа nĭ gan'anj ni sij nachica ni sij Jesús. Nĭ gataj ni sij:

—Maestro, Maestro, ruhua gahui' né'. —Daj gataj ni sij gunun Jesús.

Nгаа nĭ nachica ni sij Jesús. Nĭ ga'mi huee sij rian nane nga rian nnee. Nгаа nĭ ganiquin' daran'anj. Nĭ gahuin din'inj rian laguna daj, guĭ'yaj Jesús. ²⁵Nгаа nĭ gataj Jesús gunun ni sij:

—Nĭ ũn sin huin nĭ na'ue guxuman ruhua á re' nĭ'yaj á re' man'ānj ũnj. —Daj gataj Jesús.

Nгаа ni guxu'ui' ni sij. Nĭ gan'anj ruhua ni sij. Nĭ gataj ni sij gunun ni dugüi' ni sij:

—Nĭ ũn tsínj huin tsínj nan ũnj. Nĭ nгаа a'nin' sí' sun, nĭ da' nane nga nnee dagahuin si-nuguan' sij. —Daj gataj ni sij.

El endemoniado gadareno

²⁶Nгаа nĭ guisĭj ni sij do'ój ni tsínj gadareno. Nĭ ngaj yo'ój daj anéj chrej du'ua laguna xachij daj rian estado Galilea. ²⁷Nĭ nanij Jesús riō daj. Nгаа nĭ ga'na' 'ngo tsínj 'na' xuman' daj rian Jesús. Nĭ guisĭj ga'ĭ yo' nĭn nane xĭ'i niman sij. Nĭ nitaj sí nĭn sij atsij. Nĭ nitaj si nne sij hue' mánj. Sanĭ nne sij chruhua ni yu'uj rian gachin' ni sij níman. ²⁸Nĭ nгаа

guini'i sij Jesús, nĭ gaguáj nucuaj sij. Nĭ ganiquin' ráj dacoj sij rian Jesús. Nĭ gataj sij gaguáj sij:

—Nitaj si huaj si diguáj re' ngāj huín re' Jesús da'nĭj Yan'anj achij nne xata' mánj. A'mi acōj rián re' sisi sĭ guĭ'yáj re' castigo man'ānj mánj. —Daj gataj sij gunun Jesús.

²⁹(Nĭ da'nga' daj gataj sij daj si hua ga'nin' Jesús sun rian nane xĭ'i sisi gahui nane xĭ'i daj niman sij. Nĭ hua guisĭj ga'ĭ yo' sisi guida'a nane xĭ'i tsínj daj. Nĭ anumi cadena ra'a sij nga dacój sij, guĭ'yaj ni ngüi. Sanĭ xi'nin' cadena, guĭ'yaj sij. Nĭ nicaj nane xĭ'i sij gan'anj-án' sij quij qui'yanj naco nej.)

³⁰Nгаа nĭ nachínj snan'anj Jesús sí'. Nĭ gataj sij:

—Daj gu'naj re' ũnj. —Gataj Jesús. Nĭ gataj man'an sí':

—Xi'nin' nico gu'nā aj. —Daj gataj sí' xi'ĭ si ga'ĭ nico nane xĭ'i gatúj chruhua niman sí'.

³¹Nĭ ga'mi yaco ni nane xĭ'i daj rian Jesús sisi sĭ ga'nij sí' gan'anj ni nane xĭ'i daj rian yan'an mánj.

³²Nĭ nichrun' xi'ĭ quij mán 'ngo xi'nin' xxi xacáj xa xuj. Nĭ ga'mi yaco ni nane xĭ'i rian Jesús sisi ga'nij sí' gan'anj gatu ni sij chruhua niman ni xacáj daj. Nгаа nĭ ga'uej ruhua Jesús sisi da'nga' daj guĭ'yaj ni nane xĭ'i daj. ³³Nгаа nĭ gahui ni nane xĭ'i chruhua niman tsínj daj. Nĭ gan'anj gatu ni sij chruhua niman ni xacáj da aj. Nгаа nĭ 'ngo gan'anj gue xi'nin' xacáj daj guĭnij xú' chra 'ngo huej. Nĭ guĭnij ni xuj chruhua laguna gahui' ni xú' chruhua nnee aj.

³⁴Nĭ nгаа guini'i ni tsínj dugumi ni xacáj si guiran' xú', nĭ gunánj ni

sij nan' ni sij xánj ni sij nga riqui quij. Ni nata' ni sij daj gahuin guiran' ni sij. ³⁵Hué dan ni gahui ni ngüi daj gan'anj guini'yaj ni sij un sin huin guiran' ni tsínj daj. Ni ngaa guisíj ni sij rian nne Jesús, ni guini'i ni sij tsínj guinun nane xi'i niman daj. Ni yyaj ni nne sij xi'í Jesús nun sij si-gan' sij, hua sa' ga'ue nani ruhua sij. Ni guxu'ui' ni ngüi guisíj daj. ³⁶Ni ni tsínj guini'i daj gahuin, ni ganani ni sij daj gahuin ngaa ganahuin sa' tsínj guinun ni nane xi'i, gui'yaj Jesús.

³⁷Hué dan ni gachínj jni'yaj daran' ni tsínj gadareno rian Jesús sisi gahui sí' gan'anj sí' xánj ni sij. Daj si guxu'ui' ni sij. Ngaa ni gahui Jesús chruhua rio achéj rian nnee. Ni gan'anj sij anéj chrej du'ua laguna daj. ³⁸Ngaa ni ga'mi yaco tsínj gunun ni nane xi'i rian Jesús sisi ga'uej sí' guinicaj dugüi' sí' nga sij gan'anj nungüej sij. Sani ga'níj Jesús nan' sí' ducua' sí'. Ni gataj sij: ³⁹—Güij nan' ducua' re', ngaa ni nata' re' gunun ni dugüi' re' daran' si sa' gui'yaj Yan'anj xi'í man'an re'. —Daj gataj Jesús gunun sij.

Ngaa ni gan'anj sij. Ni nata' sij rian daran' ni ngüi man xuman' daj xi'í si sa' gui'yaj Jesús rian sij.

La hija de Jairo; la mujer que tocó el manto de Jesús

⁴⁰Ni ngaa nanicaj Jesús, ni gahuin niá' ruhua ni ngüi nahuin ra'a ni sij man'an Jesús. Daj si ana'uij daran' ni sij sí'. ⁴¹Ngaa ni ga'na' 'ngo tsínj huin achij chruhua nuhui rian nne Jesús, gu'naj sí' Jairo. Ni ganiquin' ráj dacoj sí' xi'í Jesús. Ni ga'mi yaco sí' rian Jesús sisi gan'anj sij ducua'

sí'. ⁴²Daj si hua urin da'ni xana sí'. Ni síj 'ngo si xuhuij yo' huaj ún'. Ni doj ni gahui' ún'.

Ni ngaa huaj Jesús, ni ducu guru'man ni ngüi xi'níj sí' ganicaj ni sij rian huaj sí'.

⁴³Ni scanij ni ngüi daj, ni niquin' 'ngo yun'unj xana a'nan' si guisíj xuhuij yo' uráj tun ún'. Ni gutin' ún' daran' si nicaj ún' nga ni tsínj gono'o. Sani nun ga'ue ganahuin ún', gui'yaj a 'ngo ni sij. ⁴⁴Ngaa ni gan'anj nichí ún' scanij ni ngüi guisíj ún' rucú Jesús. Ni ganun ún' chra' ra'a ún' du'ua si-gan' sí'. Ngaa ni 'ngo hora, ni ganiquin' si uráj tun. ⁴⁵Ngaa ni gataj Jesús:

—Daj hua á re' ganun ra'a si-gan'anj únj. —Daj gataj Jesús.

Sani ni a 'ngo ni sij nun ganun si-gan' Jesús, ataj ni sij. Ngaa ni gataj Pedro nga ni tsínj man nga sij:

—Man nin' ruhua ni ngüi rián re'. Ni chráj ra'a daran' ni sij man'an re'. Ngaa ni un sin huin ni nachínj snan'anj re': “Daj hua ngüi ganun ra'a man'an únj.” Daj gataj ni sij gunun Jesús.

⁴⁶Sani gataj Jesús:

—Ganun yya 'ngo ngüi man'anj. Daj si ni'inj sisi nahuin ngüi, gui'ya. —Daj gataj Jesús.

⁴⁷Ni ngaa guini'i yun'unj xana daj sisi na'ue guixij huí ún', ni nagonánj ún' ga'na' ún' ganiquin' ráj dacoj ún' rian Jesús. Ni nata' yya ún' gunun sij rian daran' ni ngüi un xi'i huin ganun ra'a ún' si-gan' Jesús. Ni nata' ún' sisi 'ngo hora, ni nahuin ún', gui'yaj sij.

⁴⁸Ngaa ni gataj Jesús gunun ún': —Xica'uij, ganahuin re', gui'yaj si guxuman ruhua re' ni'yáj re' man'anj.

Ni dínj gahuin nimán re' gan'anj re' aj. —Daj gataj Jesús gunun ún'.

⁴⁹Ni hua gue a'mi Jesús, ni ga'na' 'ngo tsínj 'yaj sun rian tsínj nicaj sun nuhui daj. Ni gataj sí' gunun sij: —Guisíj gahui' da'ni xana re'.

Nгаа ni si garasun re' rian Maestro mánj. —Daj gataj sí' gunun Jairo.

⁵⁰Sani gunun Jesús si gataj sí'. Ni gataj sij:

—Si guxu'ui' re' mánj. Maan si guxuman yya ruhua re' ni'yaj re' man'anj. Ngaa ni ganahuin sa' da'níj re'. —Daj gataj Jesús.

⁵¹Ni ngaa gatúj Jesús chruhua hue', ni nun ga'uej sij sisi gatu ni ngüi nga sij. Ni maan Pedro nga Jacobo nej, Juan nej, nungüej nica Jairo nej, ga'uej Jesús gatu chruhua hue' nga sij. ⁵²Ni ducu aco ni ngüi. Ni aguáj ni sij nej. Sani gataj Jesús:

—Si gaco ni é re' mánj. Sé si gahui' tsin' xana mánj. Sani si ato nánj. —Daj gataj Jesús gunun ni sij.

⁵³Sani ga'nga' naco ni sij guini'i ni sij man'an Jesús. Daj si guini'i ni sij sisi hua gahui' yya tsin' daj.

⁵⁴Sani guida'a Jesús ra'a tsin' daj. Ni ga'mi nucuaj sij. Ni gataj sij:

—Tsin' xana, ataj snan'an gunun so' sisi nachica so'. —Daj gataj Jesús gunun tsin' daj.

⁵⁵Ngaa ni ganánij tsin' xana daj. Ni hué hora 'ngo nachica unj. Ni ga'nin' Jesús sun sisi ga'ui' ni ngüi xa tsin' daj.

⁵⁶Ni ducu gan'anj ruhua nungüej nica Jairo. Sani ga'nin' Jesús sun sisi si nata' nungüej sij nuguan' daj rian ni a 'ngo ngüi mánj.

Misión de los doce discípulos

9 Hué dan ni gaquínj Jesús sisi nahuin yu' ni xuhuij ni

tsínj nico' sij rian sij. Ni ga'ui' sij sun rian ni sí' sisi guinicaj ni sí' sun rian ni nane xi'i. Ni hué daj ga'ui' sij fuerza sisi ganahuin ni ngüi a'nan', gui'yaj ni sí' nej. ²Ni ga'níj Jesús sisi gan'anj ga'mi ni sí' nuguan' sa' xi'i si nicaj sun Yan'anj rian ni ngüi. Ni gataj Jesús sisi ganahuin ni ngüi a'nan', gui'yaj ni sij nej. ³Ni gataj Jesús:

—Gayun ni é re' gan'anj ni é re'. Ni si ga'ue guinicaj ni é re' rutsi nej, xinánj nej, chrachrúnj nej, san'anj nej, gan'anj ni é re' mánj. Ni si ga'ue guinicaj ni é re' atsij naduna ni é re' gan'anj ni é re' mánj. ⁴Ni ngaa gatu ni é re' chruhua 'ngo hue', ngaa ni gunaj ni é re' hue' daj da síj gahui ni é re' gan'anj ni é re' xuman' daj. ⁵Ni sisi hua 'ngo yu'uj na'ue ni sij nahuin ra'a ni sij a ni é re', ngaa ni nagunan' a ni é re' yo'ój chru dacój ni é re' ngaa gahui ni é re' yu'uj daj. Ni hué-é' huin 'ngo ducúanj digyán ni é re' rian ni sij sisi nun gui'yaj sa' ni sij. —Daj gataj Jesús.

⁶Hué dan ni gahui ni tsínj nico' Jesús gan'anj ni sij daran' ni xuman'. Ni nata' ni sij nuguan' sa'. Ni nin' gachra' ganahuin ni ngüi a'nan', gui'yaj ni sij nej.

Muerte de Juan el Bautista

⁷Ni gunun rey Herodes daran' si gui'yaj Jesús. Ni nun nari' ruhua sij si gui'yaj sij. Daj si gataj go'ngo ni ngüi sisi ganánij Juan scanij ni níman. ⁸Ni gataj ango ni sij sisi hué Jesús huin tsínj ga'mi si-nuguan' Yan'anj gu'naj Elías. Ni gataj ango da'aj ni sij sisi ganánij 'ngo tsínj ga'mi si-nuguan' Yan'anj gane sí' asij ná. ⁹Ni gataj rey Herodes:

—Ga'nin' ni sij chra Juan, gui'yā. Ngaa ni un tsínj huin tsínj da únj. Daj si unúnj ga'i nuguan' xi'f sij. —Daj gataj Herodes.

Ni huin ruhua Herodes guini'i sí' man'an Jesús.

Alimentación de los cinco mil

¹⁰Ni ngaa nanicaj ni tsínj nico' Jesús, ni gataj ni sij daran' si gui'yaj ni sij rian Jesús. Hué dan ni nicaj Jesús ni sij gan'anj sí' 'ngo quij qui'yanj naco nichrun' xuman' Betsaida. ¹¹Ni ngaa guini'i ni ngüi, ni guinico' ni sij man'an sí'. Ni ga'mi sa' sí' nga ni sij. Ni ga'mi sí' rian ni sij sisi daj nicaj sun Yan'anj rian ni sij. Ni ganahuin ni ngüi a'nan', gui'yaj sí' nej. ¹²Ni ngaa ruhua guini, ni ga'na' ni xuhuij ni tsínj nico' Jesús. Ni gataj ni sij:

—Gana'nij re' ni ngüi gan'anj ni sij ni xuman' nga ni rancho ngaj nichrun' sisi nari' ni sij rian gane ni sij nga si xa ni sij. Daj si rian mán né' nitaj ni ngüi mán mánj. —Daj gataj ni sij gunun Jesús.

¹³Ngaa ni gataj Jesús:

—Ga'ui' man'an án re' si xa ni sij nánj. —Daj gataj Jesús.

Sani gataj ni sij:

—Urin si nicaj únj huin un'un' chrachrúnj nga huij gue xucuaj. Sani nun ni'i únj sisi huin ruhua re' gan'anj guiran únj si xa daran' ni ngüi nan. —Daj gataj ni sij.

¹⁴Ni síj 'ngo si un'un' mil tsínj mán yu'uj daj. Ngaa ni gataj Jesús gunun ni tsínj nico' sij:

—Gui'yaj á re' si gane ni ngüi rian yo'ój. Ni nahuin chre' da huij xia chi' da huij xia chi' ngüi gane go'ngo yu'uj, gui'yaj á re'. —Daj gataj Jesús.

¹⁵Ni da'nga' daj gui'yaj ni sij. Ni gan'anj gane daran' ni ngüi, gui'yaj ni sij. ¹⁶Ngaa ni guida'a Jesús un'un' chrachrúnj nga huij xucuaj daj. Ni ni'yaj sij xata'. Ni naga'ui' sij si guruhua Yan'anj. Ngaa ni gura' da'aj sij ni chrachrúnj ga'ui' sij ra'a ni tsínj nico' sij sisi naga'ui' ni sí' ra'a ni ngüi aj. ¹⁷Ni xa daran' ni ngüi. Ni gara ran riqui ni sij. Ngaa ni ganacaj ni sij daso gunaj. Ni nara ni sij xuhuij xuguti nga ni daso daj.

La confesión de Pedro

¹⁸Ni 'ngo güi ngaa achínj jni'yaj nini urin Jesús rian Yan'anj, ni man ni tsínj nico' sij nga man'an sij. Ngaa ni nachínj snan'anj Jesús ni sí'. Ni gataj sij:

—Ni un tsínj huinj ataj ni ngüi, ruhua á re' únj. —Daj gataj Jesús.

¹⁹Ngaa ni gataj ni sí':

—Ataj da'aj ni ngüi sisi hué re' huin Juan, tsínj duguata' nnee. Ni ataj ango ni sij sisi hué re' huin tsínj gu'naj Elías. Ni ataj ango ni sij sisi hué re' huin 'ngo tsínj ga'mi si-nuguan' Yan'anj asij ná. Ni ganá'nij tsínj daj nahuin sí' man'án re' aj. —Daj gataj ni sij gunun Jesús.

²⁰Ngaa ni gataj Jesús:

—Ni un tsínj huinj, ruhua man'an án re' únj. —Daj gataj Jesús.

Ngaa ni gataj Pedro:

—Hué re' huin Cristo, tsínj 'na' rian Yan'anj anj. —Daj gataj Pedro.

Jesús anuncia su muerte

²¹Sani ga'nin' Jesús nico sun rian ni sij sisi si nata' ni sij nuguan' nan rian ni a 'ngo ni ngüi mánj.

²²Ni gataj sí':

—Hua nian sisi guiran'anj nico sayun, huinj da'níj ni ngüi. Ni

danicaj ni tsínj huin achij nej, ni chrej huin rian nej, ni tsínj digyán ley man'ánj. Ni dagahui' ni sij man'ánj. Sani xiráj hua'nij güi, ni gana'ní. —Daj gataj Jesús gunun ni sij.

²³Ngaa ni gataj Jesús gunun daran' ni sij:

—Sisi hua 'ngo tsínj huin ruhua nico' yünj, ngaa ni dunaj sij si-chrej man'an sij. Ngaa sij ni ya'voj gata sij rugutsi guinico' sij yünj anj.

²⁴Ni tsínj na'uej ruhua gahui' sij ngāj, ni ga ni'ya sij. Sani tsínj ga'ue gahui' xi'í man'ánj, ni gane niganj sij nga Yan'anj anj. ²⁵Ni sisi gui'yaj gana 'ngo tsínj daj daran' si man chruhua xungüi gahuin si'yaj sij, ngaa ni un sin huin si huin-ín' sisi ga ni'ya man'an sij únj. ²⁶Ni sisi hua 'ngo tsínj na'aj ni'yaj yünj nga si-nuguan'ánj, ngaa ni gahuin na'a nga sij ngaa ga'na' yünj nga ni ángel sa' chruhua xungüi nan. Ni gahuin 'ueé nungüej chrē. Ni huinj da'níj ni ngüi. ²⁷Ni xanga' atā gunun a ni é re' sisi nitaj si gahui' da'aj ni ngüi mán yu'uj nan da' guini'i ni sij ga'na' guinicaj sun Yan'anj anj. — Daj gataj Jesús.

La transfiguración

²⁸Ni ngaa guisíj 'ngo si tunj güi si ga'mi Jesús ni nuguan' nan, ni nicaj sij Pedro nga Juan nej, Jacobo nej. Ni gahui sij chra 'ngo quij gachinj jni'yaj sij rian Yan'anj. ²⁹Ni ngaa achínj jni'yaj sij, ni naduna rian sij. Ni nahuin gatsi nin' si-gan' sij. Ni nahuin aca si-gan' sij nej. Ngaa ni gurugüi' huij tsínj daj. ³⁰Ni ga'mi nungüej tsínj daj nga sij huin nungüej sí' Moisés nga Elías. ³¹Ni

'ueé nin' ruhua gurugüi' nungüej sí'. Ni ga'mi nungüej sí' nga Jesús xi'í si gahui' sij xuman' Jerusalén gahui sij chruhua xungüi nan. ³²Ni 'na' nnej rian ni dugüi' Pedro. Sani nun gatoj ni sij. Ni guini'i ni sij sisi xiguin si-gan' Jesús. Ni hué daj guini'i ni sij nungüej tsínj niquin' nga Jesús nej. ³³Ni ngaa gaxi'i gahui anéj nungüej tsínj daj rian Jesús, ni gataj Pedro gunun Jesús: —Sa' mán né' yu'uj nan Maestro. Ngaa ni gui'yaj únj hua'nij hue' recoj le. Ni 'ngo man'án re'. Ni angoj Moisés. Ni ángo Elías. —Daj gataj Pedro.

Sani nun ni'i sij si ataj sij mánj.

³⁴Ni ngaa a'mi Pedro, ni nasíj 'ngo nga guiran-án' rian ni sij. Ni guxu'ui' ni sij si 'ngo nasíj nga daj rian ni sij. ³⁵Ni scanij nga daj gunun ni sij 'ngo nane gataj-á':

—Tsínj nan huin da'ní 'i ruhuāj. Gunun a ni é re' si ataj sí'. —Daj gataj Yan'anj gunun ni sij.

³⁶Ni ngaa ganahuij ga'mi Yan'anj, ni gunáj urin Jesús nga ni tsínj nico' sí'. Ni dínj gane du'ua ni sij ni güi daj nun nata' ni sij si guini'i ni sij gunun ni a 'ngo ni ngüi mánj.

Jesús sana a un muchacho endemoniado

³⁷Ni ango güi ngaa nanij ni sij chra quij, ni mán nin' ruhua ni ngüi 'na' nari' dugüi' nga Jesús.

³⁸Ni niquin' 'ngo tsínj daj scanij ni ngüi. Ni gaguáj sí'. Ni gataj sí': —Maestro, achínj jni'yā rián re' sisi guini'yaj re' da'ní. Daj si urin sij nicā. ³⁹Ni da'a 'ngo nane xi'i man'an sij. Ni hora aguáj sij. Ni guida'a xi'i yaquij, 'yaj nane xi'i daj da ahui yatan' du'ua

sij. Nĭ na'uej ruhua nane xĭ'i daj gahuin ane rian da'nĭ. ⁴⁰Nĭ ga'mi yacōj rian ni tsĭnj nicó' re' sisi guĭri ni sij nane xĭ'i niman da'nĭ. Sanĭ nun gunucuaj ni sij guĭri ni sij mánj. — Daj gataj tsĭnj daj gunun Jesús.

⁴¹Ngaa nĭ gataj Jesús:

—Ni ngüi man yyaj, nĭ na'ue guxuman ruhua ni é re' nĭ'yaj ni é re' man'anj. Nĭ xi'i niman án re'. Nĭ na'ue gunucuā gane nigān nga ni é re' mánj. Nĭ na'ue gunucuā si-chrej ni é re' nĭganj mánj. Nĭcaj re' da'nĭj re' ga'na' re' riānj anj. —Daj gataj Jesús.

⁴²Nĭ ngaa gahuin nĭchrun' tsin' daj, nĭ ganatúj sij, gui'yaj nane xĭ'i daj. Nĭ guida'a xi'i yaquij, gui'yaj nane xi'i nej. Sanĭ ga'mi huee Jesús rian nane xi'i daj. Nĭ ganahuin tsin', gui'yaj Jesús. Nĭ naga'ui' Jesús tsin' daj rian chrej sij. ⁴³Nĭ gahuin yan'anj ruhua daran' ni ngüi xi'í daj hua nucuaj Yan'anj anj.

Jesús anuncia otra vez su muerte

Nĭ ngaa hua gue gahuin yan'anj ruhua ni sij, nĭ gataj Jesús gunun ni tsĭnj nico' sij:

⁴⁴—Gunun sa' á re' ni nuguan' ga'mi nan. Huēj huin da'nĭj ni ngüi. Nĭ naga'ui' ni sij man'anj ra'a ni tsĭnj. —Daj gataj Jesús gunun ni tsĭnj nico' sij.

⁴⁵Sanĭ na'ue gara da'nga' ruhua ni sij si gataj Jesús. Daj si na'ue gunun sa' ni sij, gui'yaj nuguan' daj. Nĭ xu'ui' ni sij gachinj snan'anj ni sij Jesús xi'í nuguan' daj.

¿Quién es el mayor?

⁴⁶Ngaa nĭ gaxĭ'i ni tsĭnj nico' Jesús ga'mi ni sij un tsĭnj huin achij

scanij ni sij. ⁴⁷Nĭ ni'i Jesús daj ani ruhua niman ni sij. Ngaa nĭ guida'a Jesús ra'a 'ngo tsin'. Nĭ gani sij tsin' daj xi'nĭj sij. ⁴⁸Nĭ gataj sij gunun ni sí:

—Nĭ un tsĭnj nahuin ra'a tsin' nan xi'í si nicaj dugüi' sij ngāj, nĭ nahuin ra'a sij man'anj nej. Nĭ tsĭnj nahuin ra'a man'anj, nĭ nahuin ra'a sij Yan'anj. Daj si Yan'anj huin si ga'nĭj ga'nāj. Nĭ tsĭnj nico' da rucu scanij ni é re', nĭ hué tsĭnj daj huin tsĭnj huin achij. —Daj gataj Jesús gunun ni sij.

El que no es contra nosotros, por nosotros es

⁴⁹Hué dan nĭ gataj Juan gunun Jesús:

—Maestro, guini'i ni únj 'ngo tsĭnj a'mi si-xugüi' re'. Nĭ hué da guiri sij nane xĭ'i chruhua niman ni ngüi. Sanĭ nitaj si chéj sij nga ni únj. Ngaa nĭ xi'í daj nun ga'uej únj sisi gui'yaj sij daj. —Daj gataj Juan.

⁵⁰Ngaa nĭ gataj Jesús:

—Ga'nin' ruhuá re' sisi hué daj gui'yaj tsĭnj daj. Daj si tsĭnj nitaj si unun' ngo', nĭ chracuĭj sij yun' anj. —Daj gataj Jesús gunun Juan.

Jesús reprende a Jacobo y a Juan

⁵¹Nĭ ngaa achin doj güi guĭnan' Jesús xata', nĭ 'ngo gani ruhua sij gan'anj sij xuman' Jerusalén. ⁵²Nĭ ga'nĭj sij go'ngo tsĭnj gan'anj sini rian sij. Nĭ gan'anj ni sí' xuman' rian man ni tsĭnj samaritano sisi gui'yaj xugüi ni sí' rian guna ni dugüi' Jesús. ⁵³Sanĭ nun nahuin ra'a ni tsĭnj samaritano Jesús. Daj si hua ni'i ni sí' sisi huaj Jesús xuman' Jerusalén. ⁵⁴Nĭ guini'i huĭj tsĭnj

nico' Jesús si guiyaj ni tsínj daj. Ni gu'naj nungüej sij Jacobo nga Juan. Ni gataj nungüej sij gunun Jesús:

—Señor, huin ruhuá re' sisi ga'nin' nungüej únj yan'an gayu xata' gaca ni tsínj man nan daj rún' guiyaj tsínj gu'naj Elías asij ná ní'. —Daj gataj nungüej sij gunun Jesús.

⁵⁵Sani nanicaj Jesús chran' sí' nungüej sij. Ni gataj sí':

—Nun ni'i nungüej é re' daj hua niman nungüej é re'.

⁵⁶Sé si 'nāj sisi guere' niman ni ngüi guiyā huinj da'níj ni ngüi. Sani 'nāj nacā ni sij. —Daj gataj Jesús. Ngaa ni gan'anj ni sij ango xuman'.

Los que querían seguir a Jesús

⁵⁷Ni ngaa huaj ni sij chrej, ni gataj 'ngo tsínj daj gunun Jesús:

—Señor, huin ruhuāj guinicōj man'án re' ni a gan'anj re' aj. —Daj gataj sij.

⁵⁸Ngaa ni gataj Jesús:

—Hua huej nun xune aj. Ni hua si-gaca' xataj chéj xata' nun xú'. Sani nitaj rian guna da'níj ni ngüi huinj mánj. —Daj gataj Jesús gunun tsínj daj.

⁵⁹Ngaa ni gataj Jesús gunun ango tsínj daj:

—Guinico' re' man'anj. —Daj gataj Jesús.

—Señor, duná re' sisi gan'anj sinij gachinj chrē aj. —Daj gataj sij.

⁶⁰Ngaa ni gataj Jesús:

—Ga'nin' ruhuá re' si gachin' ango ni sij níman. Daj si rún' huin níman huin ni sij. Sani gan'anj man'án re' ga'mi re' nuguan' sa' xi'f si nicaj sun Yan'anj rian né'. —Daj gataj Jesús.

⁶¹Ngaa ni gataj ango tsínj daj gunun Jesús:

—Señor, huin ruhuāj guinicōj man'án re', sani duna síní re' sisi gan'anj gatā gunun ni dugüi'ij. —Daj gataj sij gunun Jesús.

⁶²Sani gataj Jesús gunun sij:

—Nitaj si ní'yanj tsínj da'a nne ngaa ni'yaj sij rucú sij. Ni da'nga' daj na'ue guiyaj sun sa' 'ngo tsínj rian nicaj sun Yan'anj ngaa ni'yaj sij rucú sij. —Daj gataj Jesús gunun tsínj daj.

Misión de los setenta

10 Hué daj sīj ni nacui Señor ya'nij xia chi' ran' tsínj nico' sij. Ni ga'níj sij huij huij ran' ni sí' guitaj dian sini yan gan'anj ni sí' go'ngo ni xuman' daj nej. ²Ni gataj sij gunun ni tsínj daj:

—Rún' huin strigo huin ni ngüi achin gunun si-nuguan' Yan'anj. Ni rún' huin tsínj a'nin' strigo huin ni tsínj a'mi si-nuguan' Yan'anj. Nico nin' ruhua strigo ngaj achin ga'nin' ni sij. Ngaa ni gachinj jni'yaj á re' rian Yan'anj sisi ga'nij man'an sí' ni tsínj guiyaj sun gan'anj ga'nin' ni sij si-strigo sí'. ³Ni a'ní gan'anj ni é re' rún' gan'anj ni xachij 'nij scanij ni stuj huee. ⁴Ni si nicaj á re' nnánj nga nnij nun san'anj nej, canj nej, gan'anj án re' mánj. Ni si guiniquin' a ni é re' ga'mi a ni é re' nga ni tsínj narí' a ni é re' chrej nej mánj.

⁵Ni ngaa gatu a ni é re' 'ngo hue', ni gataj sini yan ni é re' rian ni ngüi nne chruhua hue' daj: “Gahuin din'inj ruhua ni é re'.” Daj gataj ni é re'. ⁶Ni sisi yu'uj daj nne 'ngo tsínj a'mi sa'aj, ngaa ni gahuin din'inj ruhua sij daj huin ruhua ni é re'. Sani sisi nitaj 'ngo tsínj a'mi sa'aj yu'uj daj, ngaa ni nanicaj

nuguan' sa' ga'mi ni é re' rian án re'. ⁷Gunan án re' hue' nne tsínj sa' daj. Ni xa á re' go'o a ni é re' si riqui ni ngüi daj. Daj si ni tsínj 'yaj sun, ni hua si-chrej ni sij si ga du'ue ni sij. Si gan'anj án re' go'ngo ni hue' mánj. ⁸Ni ngaa huaj guisij a ni é re' 'ngo xuman' rian ráj xina ni ngüi ni'i ni sij a ni é re', ni xa á re' si riqui ni sij aj. ⁹Jnahuin a ni é re' ni ngüi a'nan' si guiman ni sij yu'uj daj. Ni gataj á re' gunun ni sij: "Hua gahuin nichrun' ga'na' nicaj sun Yan'anj rian ni é re'." Daj gataj ni é re'.

¹⁰Sanj sisi huaj guisij a ni é re' 'ngo xuman', ni nun ráj xina ni ngüi ni'yaj ni sij a ni é re', ngaa ni gahui a ni é re' chruhua cayu, ni gataj á re' gunun ni ngüi mán xuman' daj: ¹¹"Nagunan' ni únj yo'ój yaj man xánj án re' guta dacój ni únj. Ni da'nga' daj 'yaj ni únj xi'í si na'ue gunun a ni é re' si-nuguan' ni únj. Sanj gunun sa' ni é re' sisi hua gahuin nichrun' ga'na' rian nicaj sun Yan'anj rian ni é re'." Hué daj gataj á re' gunun ni ngüi man xuman' daj. ¹²Ataj snan'an gunun a ni é re' sisi güi nagui'yaj yya Yan'anj si-gaquin' ni ngüi, ngaa ni huaj gahuin ni ngüi xuman' daj castigo si guiran' ni ngüi xi'i guimán xuman' Sodoma asij ná. —Daj gataj Jesús gunun ni tsínj nico' sij.

Ayes sobre las ciudades impenitentes

¹³Ngaa ni gataj Jesús:

—Ducu niqui niman ni é re' ni ngüi mán xuman' Corazín nga xuman' Betsaida. Ni nun gui'yā si sa' xuman' Tiro nga xuman' Sidón rún'

gui'yā xuman' Corazín nga xuman' Betsaida. Sanj sisi hua gui'yā si sa' daj, ni hua nani ruhua ni ngüi man Tiro nga Sidón xi'í si-gaquin' ni sij ná. Ni hua gunun ni sij atsiy naya'. Ni hua gane ni sij rian yaj digyán ni sij sisi hua yya nanicaj ruhua ni sij xi'í si-gaquin' ni sij. ¹⁴Hué dan ni güi nagui'yaj yya Yan'anj si-gaquin' ni ngüi, ngaa ni huaj guiran' ni é re' castigo si guiran' ni ngüi xi'í guimán xuman' Tiro nga xuman' Sidón asij ná. ¹⁵Ni atā gunun a ni é re' huin a ni é re' ni ngüi man xuman' Capernaum sisi nne nin' ruhua ni é re'. Xi'í daj ani ruhua ni é re' sisi hua 'ueé nin' ruhua xánj án re' rún' hua xata' hua xánj án re', ruhua á re'. Sanj gan'anj án re' rian man ni ngüi gahui', gui'yā. —Daj gataj Jesús.

¹⁶Ngaa ni gataj Jesús gunun ni tsínj nico' sij:

—Ni ngüi unun si ataj á re', ni hué daj gunun ni sij si-nuguan'anj nej. Sanj sisi danicaj ni ngüi ni é re', ni hué daj danicaj ni sij man'anj nej. Ni ni ngüi danicaj man'anj, ni hué daj danicaj ni sij Yan'anj nej. —Daj gataj Jesús.

Regreso de los setenta

¹⁷Hué dan ni nanicaj hua'nij xia chi' ni tsínj gan'anj daj. Ni hua nia' ruhua ni sij. Ni gataj ni sij gunun Jesús:

—Señor, ni da' ni nane xi'i dagahuin rian ni únj ngaa a'mi únj si-xugüi man'an re'. —Daj gataj ni sij.

¹⁸Ngaa ni gataj Jesús:

—Daj rún' yoō ahui du'ui xata', ni da'nga' daj guini'inj 'na' guinij

sichre Satanás xata' aj. ¹⁹Hua riquij si gahuin nucuaĵ á re' si gurun a ni é re' rian xucuáj nga xiquin nej. Ni si ĵi gui'yaj xi'í xú' rian án re' mánj. Ni ga'ue gui'yaj gana ni é re' rian si-fuerza sichre Satanás. Ni nitaj si guiran' a ni é re', gui'yaj a 'ngo ni nuguan' quij nan mánj. ²⁰Ni hua yya dagahuin ni nane xi'í si ataj á re'. Sani ĵi gahuin nia' ruhua ni é re' xi'í si unun ni nane xi'í si ataj á re' mánj. Sani gahuin nia' ruhua á re' si hua nica si-xugüi a ni é re' ta rian yanĵ xata', 'yaj Yan'anĵ. —Daj gataĵ Jesús rian hu'a'nij xia chi' ni tsínj daj.

Jesús se regocija

²¹Hué hora daj ni gahuin nia' ruhua Jesús, gui'yaj Espíritu Santo. Ni gataĵ sij gunun Yan'anĵ:

—A'mi sa'áj rián re' huín re' chrē nne xata'. Ni nicáj re' nin' sun xata' nga rian xungüi nica' nej. Ni a'mi sa'áj rián re' xi'í si digyán re' nuguan' sa' nan rian ni tsínj nitaj si huin achij. Ni garij huí re' nuguan' sa' nan rian ni tsínj ni'í sa' nga ni tsínj chrūn ga'í nuguan' nej. Ni da'nga' daj garan' ruhuá re' gui'yáj re' huín re' chrē nne xata'. —Daj gataĵ Jesús gunun Yan'anĵ.

²²Ngaa ni gataĵ Jesús gunun ni ngüi:

—Riqui chrē daran' ni rasun riānj. Ni a 'ngo ni ngüi nun ni'í daj hua man'anĵ huinj da'níj Yan'anĵ. Sani urin chrē ni'í aj. Ni ni a 'ngo ni ngüi nun ni'í daj hua chrē. Sani urinj ni'í daj hua chrē si huinj da'níj Yan'anĵ. Ni un ngüi rian garan' ruhuāĵ digyānj, ni ga'ue digyānj rian ni sij daj hua chrē. —Daj gataĵ Jesús.

²³Ngaa ni ni'yaj Jesús rian urin ni tsínj nico' sij. Ni gataĵ sij:

—Hua 'ueé rian ni tsínj acaj cuenta daj hua man'anĵ daj rún' acaj cuenta á re' ni'yaj á re' rian xi'íj. ²⁴Daj si asij ná, ni gahuin nico ni tsínj ga'mi si-nuguan' Yan'anĵ nga nico ni rey gahuin ruhua guini'í ni sí' si ni'í ni é re' acuan'. Sani nun guini'í ni sij. Ni gahuin ruhua ni sij gunun ni sij si unun ni é re'. Sani nun gunun ni sij mánj. —Daj gataĵ Jesús gunun ni sij.

El buen samaritano

²⁵Ngaa ni naxuman 'ngo tsínj digyán ley ga'mi sij nga Jesús. Ni gahuin ruhua sij xacaj sij cuenta xi'í si-nuguan' Jesús. Ni nachínj snan'anĵ sij Jesús. Ni gataĵ sij:

—Maestro, daj gui'lyā, ni gane nigān nga Yan'anĵ únj. —Daj gataĵ sij gunun Jesús.

²⁶Ngaa ni gataĵ Jesús:

—Daj ataj si-ley Yan'anĵ ayá re' únj. —Daj gataĵ Jesús.

²⁷Ni gataĵ tsínj daj:

—“Gahuin 'i ruhua né' ni'yaj né' Señor huin Dan'anĵ né' nga nin' niman né'. Ni gahuin 'i ruhua né' ni'yaj né' Yan'anĵ nga daran' si-fuerza né'. Ni gahuin 'i ruhua né' ni'yaj né' Yan'anĵ nga nin' sta'nga' né'. Ni daj rún' 'i ruhua né' ni'yaj né' man'an né', ni da'nga' daj gahuin 'i ruhua né' ni'yaj né' ni dugüi' né' nej.” —Daj gataĵ tsínj daj gunun Jesús.

²⁸Ngaa ni gataĵ Jesús:

—Dugu'naj huaj atáj re'. Sisi da'nga' daj gui'yáj re', ni gane niganĵ re' nga Yan'anĵ nánj. —Daj gataĵ Jesús.

²⁹Sanĭ man'an tsĭnj daj, nĭ gahuin ruhua sij sisi guini'i Jesús sisi tsĭnj sa' huin sij. Xi'í daj nĭ nachĭnj snan'anĭ sij Jesús. Nĭ gataj sij:

—Nĭ un tsĭnj huin dugüi'ij únĭ. —Daj gataj sij.

³⁰Ngaa nĭ nani Jesús 'ngo cuento gunun sí'. Nĭ gataj sij:

—Gahui 'ngo tsĭnj daj xuman' Jerusalén huaj sij chrej xuman' Jericó. Nĭ gahui ni tsĭnj tĭ. Nĭ ga'nej ni sí' si-gan' tsĭnj huaj daj. Nĭ ga'ui' ni sí' sij. Nĭ guiran' xi'i sij, gui'yaj ni sí'. Nĭ doj nĭ gahui' sij ngaa gan'anĭ ni sí'. ³¹Ngaa nĭ huaj 'ngo chrej niqun' rian ni tsĭnj israelita chrej daj. Sanĭ ngaa guini'i sij ngaj tsĭnj guiran' xi'i daj, nĭ gachin anéj sij rian sí' gan'anĭ sij. ³²Nĭ huaj 'ngo tsĭnj levita chrej daj nej. Nĭ ngaa guini'i sij tsĭnj daj, nĭ gachin anéj sij gan'anĭ sij nej.

³³Sanĭ huaj 'ngo tsĭnj samaritano hué gue chrej daj. Nĭ tsĭnj 'na' anéj chrej huin sí'. Nĭ ngaa guini'i sí' tsĭnj ngaj daj, nĭ gahuin 'i ruhua sí' ni'yaj sí' sij. ³⁴Nĭ gahuin nichrun' tsĭnj samaritano daj. Nĭ gui'yaj gono'o sij gasiti nga nnee vino tsĭnj guiran' xi'i daj. Nĭ gumi sij atsij rian guiran' xi'i sí'. Nĭ dagahui sij sí' xiráj dánĭ sij xucu. Nĭ nicaj sij gan'anĭ sij mesón. Nĭ dugumi sij man'an sí'. ³⁵Ngaa nĭ ango güi ngaa huin ruhua sij gan'anĭ sij, nĭ guiri sij huĭj san'anĭ huin denario ga'ui' sij ra'a tsĭnj ducua huin mesón. Nĭ gataj sij: “Dugumi re' tsĭnj nan. Nĭ sisi gutin' re' huaj, nĭ man'anj naru'ue rián re' ngaa nanica ruhua' yún ga'nāj.” —Daj nani Jesús cuento rian tsĭnj digyán ley daj.

³⁶Ngaa nĭ nachĭnj snan'anĭ Jesús sí'. Nĭ gataj sij:

—Ngaa nĭ daj hua yya ni hua'nij tsĭnj gachin daj gahuin tsĭnj nicaj dugüi' rian tsĭnj guiran' xi'i daj, ruhua man'án re' únĭ. —Daj gataj Jesús.

³⁷Ngaa nĭ gataj tsĭnj daj: —Hué tsĭnj gahuin 'i ruhua ni'ya tsĭnj guiran' xi'i, ruhuāj aj. —Daj gataj tsĭnj digyán ley daj.

Ngaa ni:

—Güĭj re' nĭ da'nga' daj gui'yaj man'án re' nej. —Daj gataj Jesús.

Jesús visita a Marta y María

³⁸Nĭ ngaa huaj Jesús chrej, nĭ guisĭj sí' 'ngo xuman' rian nun 'ngo yun'unĭj xana gu'naj Marta. Nĭ gunáj Jesús ducua ún', gui'yaj ún'. ³⁹Nĭ hua 'ngo xugüi'ij Marta gu'naj María. Nĭ gan'anĭ gane María dacój Jesús unun ún' si ataj Jesús. ⁴⁰Nĭ da nahuij ruhua Marta 'yaj sun ún'. Ngaa nĭ gahuin nichrun' ún' rian Jesús, nĭ nachĭnj snan'anĭ ún':

—Señor, un sin huin nĭ nitaj si nahuij ruhua re' sisi urĭnj duna xugüi'ij rian daran' ni rasun 'yā nan únĭ. Gataj re' gunun unĭ si chracuij unĭ yünĭ anĭ. —Daj gataj Marta gunun Jesús.

⁴¹Ngaa nĭ gataj Jesús:

—Marta, Marta, nahuij ruhua re' nga daran' ni sun 'yáj re'. Nĭ na'ue gahuin din'inĭj ruhua re' mánĭ.

⁴²Sanĭ hua urin nuguan' sa' huin si ní'yanĭ. Nĭ hua nacui María nuguan' sa' daj. Nĭ nĭ a 'ngo ni ngüi sĭ ga'ue gataj sisi sĭ gunun María sinuguan'anj mánĭ. —Daj gataj Jesús.

Jesús y la oración

11 Ngaa nĭ 'ngo yun nne Jesús 'ngo yu'uj gachĭnj jni'yaj sij rian Yan'anĭ. Nĭ ngaa ganahuij gachĭnj jni'yaj sij, nĭ gataj 'ngo tsĭnj nico' sij:

—Señor, digyán re' rian únj daj ga'mi únj ngaa gachinj jni'yaj ni únj rian Yan'anj daj rún' digyán Juan rian ni tsínj nico' sí', ruhua únj. — Daj gataj tsínj daj.

²Ngaa ni gataj Jesús:

—Ngaa gachinj jni'yaj á re' rian Yan'anj, ni gataj á re':

Chrej ni únj huín re' nné re' xata'.

Ni huin ruhua únj si ga'mi 'ueé ni ngüi xi'í si-xugüi man'án re'.

Ni huin ruhua únj si ga'na' re' guñicaj re' sun rian ni ngüi, ruhua ni únj.

Ni daj rún' dagahuin sa' ni ángel mán xata' rian man'án re', ni da'nga' daj dagahuin ni ngüi mán nica' rian man'án re', ruhua únj nej.

³Ni riqui re' si xa ni únj da' go'ngo güi.

⁴Ni guñicaj re' 'ngo niman nico xi'í si-gaquin' únj si da'nga' daj nicaj únj niman nico xi'í gaquin' 'yaj dugüi' únj rian únj nej.

Ni si duná re' si gatsij sichre niman ni únj mánj.

Sani ga'ni re' sisi si gui'yaj gana si quij rian únj.

Da'nga' daj gataj á re' ngaa gachinj jni'yaj á re' rian Yan'anj. —Daj gataj Jesús gunun ni sij.

⁵Ni gataj ruhua' yún Jesús:

—Gui'yó' cuenta sisi hua 'ngo tsínj nicaj dugüi' nga 'ngo ni é re'. Ni huaj sij yan' sa' ducuá sí'. Ni gataj sij gunun sí': “Jnanj, chraçuij re' huá'nij chrachrúnj xa 'ngo dugüi'ij na' ducuā. ⁶Ni huaj sij chrej, sani nitaj si guiri'ij ga'uij xa sij mánj.”

Daj gataj sij rian dugüi' sij. ⁷Sani gataj tsínj nne chruhua hue' gunun dugüi' sij: “Si ga'na' chran' yun'únj re' yünj mánj. Hua ránj rian hue'. Ni ngā nga ni da'ni rian nna. Si ga'ue nachicāj riquij rián re' mánj.” Daj gataj sij, ruhua á re' únj. Sé daj gataj sij mánj. ⁸Ni atā gunun a ni é re' sisi nunj si na'uej sij nachica sij ga'ui' sij xi'í si nicaj dugüi' tsínj daj nga sij, sani xi'í si ducu requé sí', ni nachica sij ga'ui' sij daran' si achínj sí'.

⁹Asíj ni atā gunun a ni é re' sisi gachinj jni'yaj á re' rian Yan'anj. Ni riqui Yan'anj rian án re'. Nāno' a ni é re' nuguan' sa', ni nari' a ni é re'. Ni gui'yaj á re' rún' 'yaj 'ngo tsínj ita ra'a rian hue', ni na'ni Yan'anj gatu a ni é re' aj. ¹⁰Daj si daran' ni ngüi achínj, ni ri' ni sij. Ni ni ngüi nāno', ni nari' ni sij nej. Ni ni ngüi ita ra'a rian hue', ni na'ni Yan'anj gatu ni sij nej. ¹¹Ni sisi da'nij ni é re' achínj chrachrúnj xaj, ni ga'ue ga'ui' a ni é re' yej ra'a ní'. Ni ngaa achin 'ngo xucuaj, ni ga'ue ga'ui' a ni é re' 'ngo xucuāj xa sij ní'. Sé daj huin mánj. ¹²Ni ga'ue ga'ui' a ni é re' 'ngo xiquin ra'a da'nij a ni é re' ngaa achin chruj ní'. Sé daj huin mánj. ¹³Tsínj xi'i huin a ni é re'. Sani ni'i a ni é re' si hua sa' ga'ui' ni é re' xa ni da'nij ni é re'. Yu'uj daj ni huaj nin' ruhua si riqui yya chrej a ni é re' nne xata' Espiritu Santo rian ni ngüi achínj Espiritu Santo rian-án'. —Daj gataj Jesús gunun ni tsínj nico' sij.

Una casa dividida contra sí misma

¹⁴Ni 'ngo güi ni guiri Jesús 'ngo nane xi'i niman 'ngo tsínj na'ue ga'mi daj. Ni gaxi'í sí' ga'mi sí'.

Ni gahuin yan'anj ruhua ni ngüi guini'i ni sij si gui'yaj Jesús. ¹⁵Saní ga'mi go'ngo ni sij xi'í Jesús. Ni gataj ni sij:

—Xi'í si-fuerza man'an sichre gu'naj Beelzebú, ni ri Jesús ni nane xi'i niman ni ngüi. —Daj gataj da'aj ni sij.

¹⁶Ni gachínj ango da'aj ni sij sisi gui'yaj Jesús 'ngo si sa' 'na' xata'. Daj si huin ruhua ni sij guta' ni sij gaquin' xiráj Jesús. ¹⁷Saní ni'i Jesús si ani ruhua ni sij. Ngaa ni gataj sij:

—Sisi unun' ni dugüi' 'ngo ducasun, ni guere' xuman' daj, gui'yaj ni man'an ni sij mán sij. Ni sisi unun' 'ngo tsínj daj nga ni dugüi' sij mán ducua' sij, ni guere' ni sij nej. ¹⁸Hué daj huin sisi unun' sichre Satanás nga ni nane xi'i, ni daj ga'tue gunucuj rian nicaj sun sichre Satanás, ruhua á re' únj. Ni da'nga' daj nachínj snan'an a ni é re' xi'í si ataj á re' si rij nane xi'i chruhua niman ni ngüi nga si-fuerza Beelzebú. Saní sé si xanga' huin mánj. ¹⁹Saní sisi rij ni nane xi'i niman ni ngüi nga si-fuerza Beelzebú, ngaa ni un tsínj riqui sisi guiri ni tsínj nico' ni é re' nane xi'i niman ni ngüi, ruhua á re' únj. A'mi ni sij nga ni nane xi'i, ruhua á re' ní'. Hué dan ni digyán ni sí' sisi nitaj si hua nica ruhua á re' mánj. ²⁰Saní sisi hua yya rij nane xi'i chruhua niman ni ngüi 'yaj ra'a man'an Yan'anj xanga', ngaa ni huin ruhuaj gata sisi ga'na' guisij si guinicaj sun Yan'anj scanij a ni é re' aj.

²¹'Gui'yo' cuenta daj 'yaj 'ngo tsínj hua nucuj nne ducuj. Ngaa hua xirúnj si chria' sij dugumi sij

ducua' sij, ni hua xitinj ruhua sij nne sij nga daran' si nara sa' sij. ²²Saní ngaa 'na' ango tsínj nucuj doj daj nga man'an sij, ni gui'yaj gana sí' rian sij. Ni ga'nej sí' xirúnj si chria' sij nga ango ni rasun nara sa' sij. Ni gura' da'aj sí' nga ni dugüi' sí'.

²³'Ni tsínj nitaj si nicaj dugüi' ngāj, ni unun' sij ngāj. Ni tsínj nitaj si naran' strigo ngāj, ni re'ej sij strigo aj. Ni 'yaj sij sisi na'ue guinico' ni ngüi man'anj. —Daj gataj Jesús.

El espíritu inmundo que vuelve

²⁴Ngaa ni gataj ruhua' yún Jesús: —Ni ngaa gahui nane xi'i niman 'ngo tsínj daj, ni chéj nane xi'i 'ngo yu'uj hua naco nano' sij ni a naranj ruhuaj. Saní nun nari' sij rian naranj ruhuaj. Ngaa ni: “Nanicā ruhua' yünj ducuj rian gahui”, ataj nane xi'i daj. ²⁵Ni ngaa nanicaj nane xi'i daj, ni nari' sij 'ngo hue' hua ní'nij. Ni hua naca' ne. Ni nagui'yaj sa' ne hue' daj. Ni da'nga' daj rún' huin hue' daj, hué daj huin niman tsínj daj. ²⁶Ngaa ni gan'anj nane xi'i daj. Ni nāno'-ó' ango ichij nane xi'i quij hua daj nga man'an sij. Ni daran' ni nane xi'i daj ganatu nuguan'an niman tsínj daj ruhua' yún gane-é'. Ni guiran' tsínj daj nico sayun daj nga si guiran' sij asij sini yan. —Daj gataj Jesús gunun ni sij.

Los que en verdad son bienaventurados

²⁷Ni diaj hua a'mi Jesús, ni gaguáj 'ngo yun'unj xana nne scanij ni ngüi. Ni gataj ún':

—Hua 'ueé rian nní re' xi'í si guchruj ún' man'an re'. Ni dugutsi

ún' man'án re' nej. —Daj gaguáj yun'unj xana daj.

²⁸Sani gataj Jesús:

—Hua 'ueé rian ni ngüi unun sinuguan' Yan'anj. Ni 'yaj ni sij daj rún' ataj Yan'anj gunun ni sij nej. —Daj gataj Jesús.

La generación perversa demanda señal

²⁹Ni gahuin nico ni ngüi nahuin yu' xi'níj Jesús. Ngaa ni gaxi'i Jesús ga'mi sij. Ni gataj sij:

—Sé ni ngüi sa' huin ni ngüi mán yyaj. Achínj ni sij 'ngo si sa' 'na' xata', gui'yā. Sani si gui'yā 'ngo si sa' guini'i ni sij mánj. Urin si guiran' tsínj gu'naj Jonás asij ná huin si guini'i ni sij aj. ³⁰Ni daj rún' gui'yaj Yan'anj 'ngo si sa' nico nga Jonás guini'i ni ngüi guimán xuman' Nínive asij ná, ni da'nga' daj gui'yaj Yan'anj nga man'ānj guini'i ni ngüi mán yyaj huínj da'níj ni ngüi.

³¹Ni ngaa guisij güi nagui'yaj yya Yan'anj nga ni ngüi, ni ganiquin' reina 'na' ne' sur gataj ún' sisi da'ui ni ngüi mán yyaj gaquin'. Daj si ga'na' ún' da' xi'í nín' xungüi gunun ún' si-nuguan' tsínj gu'naj Salomón. Ni huin chrún sí' si-nuguan' Yan'anj. Sani huin achij man'ānj daj nga Salomón rian án re'. ³²Ni güi ganahuij xungüi ngaa nagui'yaj Yan'anj xi'í si-gaquin' ni tsínj, ni naxuman ni tsínj guimán xuman' Nínive asij ná nga ni tsínj man acuan'. Ni gataj ni tsínj daj sisi da'ui ni tsínj man acuan' gaquin'. Daj si ganani ruhua ni tsínj guimán Nínive daj xi'í si-gaquin' ni sij ngaa gunun ni sij si nata' Jonás si-nuguan' Yan'anj gunun ni sij. Sani

huin achij man'ānj daj nga Jonás rian án re'.

La lámpara del cuerpo

³³Ni gataj ruhua' yún Jesús:

—Ni sé si gari hui' 'ngo candil ngaa arún' yan'an chra-á'. Ni si gune' riqui chrúnj mánj. Sani guto' xata' sisi guixiguin rian ni ngüi gatu chruhua hue'.

³⁴Rún' huin 'ngo yan'an xiguin, ni da'nga' daj huin rundij rian né'. Ni ngaa xiguin sa' rundij rian né', ni ni'yaj sa' né'. Sani sisi nitaj si xiguin sa' rundij rian né', ni na'ue nari' né' 'ngo chrej sa' gan'anj né'. Daj si hua rumi' rian né'. ³⁵Ga cuidado rian án re' sisi xiguin sa' chruhua niman án re'. Ngaa ni si ga rumi' rian nne ni é re' mánj. ³⁶Ni sisi xiguin sa' chruhua niman né', ni nitaj si hua rumi' rian nne né' mánj. Daj si xiguin sa' chruhua niman né' ni'yaj né' daj rún' 'yaj 'ngo yan'an xiguin. —Daj gataj Jesús gunun ni ngüi.

Jesús acusa a fariseos y a intérpretes de la ley

³⁷Ni ngaa ganahuij ga'mi Jesús, ni gaquínj 'ngo tsínj fariseo xa Jesús ducua sí'. Ni gatúj Jesús gan'anj gane sij rian mesa. ³⁸Ni gahuin yan'anj ruhua tsínj daj ngaa guini'i sij sisi nun nania' nico Jesús asij ngaa achin xa nungüej sij. ³⁹Sani gataj Señor gunun sij:

—Ni tsínj fariseo huin ni é re'. Ni na'nin' sa' á re' xiráj tasa nga xiráj go'o nej. Sani ne' chruhua niman án re', ni man nín' ruhua si quij hua. Daj si 'yaj tu a ni é re', ni 'yaj quij a ni é re' nej. ⁴⁰Tsínj nitaj si unun huin ín re'. Ni'i a ni é re' sisi gui'yaj

Yan'anj nnee cúj né'. Ní da'nga' daj nun ni'i a ni é re' sisi gui'yaj Yan'anj niman né' ní'. ⁴¹Sani ga'ui' a ni é re' da'aj si'yaj á re' rian ni ngüi niqui, ngaa ní xacaj á re' cuenta sisi hua sa' chrej chéj a ni é re' aj.

⁴²Sani ducu niqui niman án re' ni tsínj fariseo. Daj si guiran' ni é re' nico sayun. Aya á re' rumi coj nun stila nga coj ruda nej, daran' ni cuej nej. Ní ngaa guisíj ichi' rumi, ní a'ui' ni é re' 'ngo rumi rian Yan'anj. Sani dunáj a ni é re' si gui'yaj nica á re' rian dugüi' a ni é re'. Ní nitaj si lí ruhua á re' ni'yaj á re' Yan'anj mánj. Sani huin ruhua Yan'anj sisi gui'yaj á re' ni nuguan' nico nan. Ní na'uej ruhua Yan'anj sisi dunáj á re' nga ango nuguan' le mánj.

⁴³Ducu niqui niman ni é re' tsínj fariseo. Guiran' ni é re' nico sayun. Daj si aran' ruhua á re' gane a ni é re' chrun xila sa' doj niquin' chruhua nuhui. Ní aran' ruhua ni é re' si garun du'ua ni ngüi ra'a ni é re' rian yu'ue.

⁴⁴Ní ducu niqui niman án re' huin ín re' ni tsínj fariseo. Tsínj digya' yun'unj huin ín re'. Ní rún' hua rian achin' ni ngüi níman daj huin ín re'. Ní nun ni'i ni ngüi. Ní rún' huin ngaa xinga ni ngüi a nun ni'i ni sij ngaj níman, ní run ni sij da'nga' da huin ín re'. Daj si nun ni'i ni sij sisi quij nín' ruhua hua niman án re'. —Daj gataj Jesús gunun ni sij.

⁴⁵Ngaa ní gataj 'ngo tsínj digyán ley rian Jesús:

—Maestro, ngaa a'mí re' daj, ní a'mi quij re' rian ni únj nej. —Daj gataj sij.

⁴⁶Sani gataj Jesús:

—Ducu niqui niman án re' tsínj digyán ley. Daj si guiran' ni é re' nico sayun. Ní rún' 'yaj ni tsínj arun carga ya'í xiráj ni xucu daj, 'yaj á re' nga ni ngüi. Ní ya'í nín' ruhua carga daj. Ní na'ue gunucuaj ni sij gache ni sij. Ní a doj na'ue chracuij a ni é re' ni sij nga urin ra'a ni é re' ga mánj.

⁴⁷Ní ducu niqui niman án re' xi'í sayun guiran' án re'. Daj si 'yaj á re' ni chran rian ngaj ni níman ni tsínj ga'mi si-nuguan' Yan'anj asij ná. Ní dagahui' ni xi ni é re' ni sí'. ⁴⁸Ní xi'í si 'yaj quij ni é re', ní da'nga' daj digyán ni é re' sisi ga nica ruhua á re' nga si gui'yaj ni xi a ni é re'. Daj si hua yya dagahui' ni sij ni sí'. Sani 'yaj ni é re' ni chran rian achin' ni sij aj.

⁴⁹Ní rian ni'i sa' Yan'anj, ní gataj-á': "Ga'ní ni tsínj ga'mi si-nuguan'ánj nga ni tsínj gui'yaj sun riánj nej. Ní dagahui' ni sij go'ngo ni sí'. Ní guínico' ni sij ango ni sí'. ⁵⁰Ní asij gui'yaj Yan'anj xungüi, ní dagahui' ni sij ga'í nín' ruhua ni tsínj nata' si-nuguan' Yan'anj rian ni ngüi. Sani da'ui ni ngüi mán yyaj si-tun man'an ni sí'. ⁵¹Ní da'ui sini ni sij si-tun man'an tsínj gu'naj Abel. Ní ganahui da' si-tun man'an Zacarías huin si da'ui ni sij. Ní dagahui' ni sij sí' dani nna yej nga ducua Yan'anj." Da'nga' daj atā gunun a ni é re' sisi da'ui ni ngüi mán yyaj gaquin', gui'yaj ni tsínj daj.

⁵²Ní ducu niqui niman án re' ni tsínj digyán ley. Guiran' ni é re' nico sayun. Daj si aránj ni é re' si-chrej Yan'anj rian ni ngüi. Ní nun ga'ue gatu ni é re' chrej daj nej. Ní

ni tsínj huin ruhua gatu, ni na'uej ruhua á re' gatu ni sij mánj. —Daj gataj Jesús.

⁵³Ni ngaa ga'mi Jesús ni nuguan' daj, ni ga'man nin' ruhua ni tsínj digyán ley nga ni tsínj fariseo. Ngaa ni gaxi'i ni sij nachínj snan'anj ni sij Jesús xi'í ga'i rasun. Ni chran' yun'unj ni sij sí' nej. ⁵⁴Daj si huin ruhua ni sij sisi gache du'ua Jesús xi'í si ga'mi sí'. Ngaa ni ga'mi gaquin' ni sij xi'í sí', ruhua ni sij.

La levadura de los fariseos

12 Hué dan ni nahuin yu' ga'i mil ni ngüi rian huaj Jesús. Ni da run 'ngo run ango ni sij.

Ni gaxi'i Jesús ga'mi sí'. Ni gataj sini sí' rian ni tsínj nico' sí':

—Ga cuidado ni é re' nga si levadura ni tsínj fariseo. Daj si tsínj digya' yun'unj huin ni sij. Nitaj si 'yaj ni sij daj rún' a'mi ni sij. ²Si ga'ue gari huí ni ngüi 'ngo ni nuguan' mánj. Ni si ga'ue gari huí ni ngüi si 'yaj ni sij mánj. Sani hua 'ngo güi, ni naxira' daran' ni nuguan' gari huí ni ngüi aj. ³Hué dan ni daran' si ga'mi a ni é re' rian hua rumi', sani gunun ni ngüi ni nuguan' daj rian hua xiguin yan'an. Ni daran' ni nuguan' ga'mi huí ni é re' ngaa naránj ni é re' rian ducua' re' ngaa ga'mi huí ni é re', ni gaguaj ni sij xe' gunun daran' ni ngüi aj. —Daj gataj Jesús.

A quién se debe temer

⁴Ngaa ni gataj Jesús gunun ni sij: —Ni huin ni é re' ni tsínj nicaj dugüi' ngäj. Ni ataj snan'an gunun ni é re' sisi si guxu'ui' ni é re' rian ni tsínj ga'ue dagahui' nnee cúj

né'. Ngaa síj ni nitaj ango si gui'yaj ni sij nga né' ga mánj. ⁵Sani gatā gunun a ni é re' un sin rian guxu'ui' ni é re': Hué guxu'ui' ni é re' rian Yan'anj xanga'. Daj si ngaa gahui' ni é re', gui'yaj Yan'anj, ni gataj Yan'anj un ngüi gan'anj rian yan'an. Ngaa ni hua si xi'i xu'ui' ni é re' rian Yan'anj anj.

⁶Xanga' ane' un'un' xataj le huij san'anj moneda aj. Sani nitaj si ni'yun ruhua Yan'anj go'ngo ni xuj mánj. ⁷Hué daj nga ni é re', ni aya Yan'anj da' go'ngo hueé chra ni é re'. Xi'í daj ni si guxu'ui' ni é re' mánj. Daj si huaj ní'yanj ni é re' rian ni xataj aj. —Daj gataj Jesús gunun ni sij.

El que me confesare delante de los hombres

⁸Ngaa ni gataj Jesús: —Ataj snan'an gunun a ni é re' sisi daran' ni tsínj nata' sisi nico' ni sij yünj rian ni ngüi, ngaa ni natāj rian ni ángel nne nga Yan'anj sisi tsínj nico' man'anj huin ni sij. ⁹Sani daran' ni tsínj na'uej ruhua nata' rian ni ngüi si nico' ni sij man'anj, ni na'ue natāj rian ni ángel nne nga Yan'anj sisi tsínj nico' man'anj huin ni sij mánj.

¹⁰Ga'ue guinicaj Yan'anj 'ngo niman nico xi'í ni ngüi ga'mi quij rian da'nj ni ngüi huin man'anj. Sani si guinicaj Yan'anj niman nico xi'í ni ngüi ga'mi quij xi'í Espiritu Santo mánj.

¹¹Ni ngaa nicaj ni sij ni é re' gan'anj án re' si-nuhui ni tsínj israelita nga rian güesi nga rian ni tsínj nicaj sun, ngaa ni si gahuin ruhua á re' si daj gataj á re' ngaa

nachinj snan'anj ni sij ni é re' mánj. ¹²Daj si ngaa guisij hora ga'mi a ni é re', ni digyán man'an Espíritu Santo si ga'mi a ni é re' rian ni sí'. —Daj gataj Jesús gunun ni tsínj nico' sij.

El rico insensato

¹³Ngaa ni gataj 'ngo tsínj niquin' scanij ni ngüi gunun Jesús:

—Maestro, gataj re' gunun jnān si gura' da'aj sij si dunáj chrej nungüej únj. —Daj gataj tsínj daj.

¹⁴Ngaa ni gataj Jesús:

—Jnānj né', un sin huin ani ruhuá re' sisi gahuin man'ānj tsínj gui'yaj yya scanij ni é re' únj. Ni un sin huin ni ga'mi xi'í rasun hua rian nungüej jnānj re', ruhuá re' únj. —Daj gataj Jesús.

¹⁵Ngaa ni gataj Jesús gunun ni ngüi:

—Ga cuidado ni é re' sisi si gahuin xicoj ruhua ni é re' nga ni rasun mán chruhua xungüi nan mánj. Sisi guiri' né' nico ni rasun gahuin si'yaj né', ni sé ni rasun daj gui'yaj si xacaj né' 'ngo chrej sa' mánj. —Daj gataj Jesús.

¹⁶Ngaa ni nani Jesús 'ngo cuento si digyán sij rian ni ngüi. Ni gataj sij:

—Hua 'ngo tsínj xuru'ue. Ni sa' nin' ruhua ga'uej xina sij. ¹⁷Ngaa ni gani ruhua tsínj xuru'ue daj: “Daj gui'yā, ni nitaj rian nara sa'āj ni rasun nan mánj.” Da'nga' daj gani ruhua sij. ¹⁸Hué dan ni gataj sij gunun man'an sij: “Hua ni'inj daj gui'yā. Ga'nē ni si-gurūj, ni nagui'yaj xachij ruhua' yūnj angoj. Ni nara sa'āj daran' ni si guiri'ij nga daran' ni rasun mán nej. ¹⁹Hué

dan ni gatā gunun nimānj sisi man nico ni rasun daj riānj. Ni guisi ga'iyoyo'. Ni ga'ue naranj ruhuāj, ni xaj, ni go'ōj nej. Ni ga'ue gahuin nia' ruhuāj nej. Daj gatā gunun nimānj.” Daj gani ruhua tsínj xuru'ue daj. ²⁰Sanj gataj Yan'anj gunun sij: “Tsínj ni'yun huín re'. Hué gue ni nan gahui' re'. Ni un sin si'yaj gahuin si nara sa' re', ruhuá re' únj.” Daj gataj Yan'anj. ²¹Da'nga' daj gahuin guiran' tsínj ri' nico ni rasun ngaa huin-ín' güenda urin man'an sij. Ni niqui niman sij rian Yan'anj si nitaj ni rasun sa' nicaj sij güenda Yan'anj mánj. —Daj gataj Jesús.

El afán y la ansiedad

²²Hué dan ni gataj Jesús gunun ni tsínj nico' sij:

—Xi'í daj gatā gunun a ni é re' sisi si gahuin ruhua ni é re' nga si xa ni é re' guiman ni é re' mánj. Ni si gahuin ruhua á re' nga atsijs gunun ni é re' nej. ²³Ni'i ni é re' sisi hua ni'na' né', gui'yaj Yan'anj. Ni sisi hué daj huin, ni nucuj Yan'anj gui'ya sisi hua si xa né' nej. Ni gui'yaj Yan'anj nnee cú'. Ni sisi nucuj Yan'anj gui'ya nnee cú', ni ga'ue riqui sisi hua si-gan' né' nej. ²⁴Ni'yaj ni é re' ni xaca. Nitaj si unun xuj nna. Ni nitaj si ri xuj nna nej. Ni nitaj si-guru xuj nej. Sanj a'ui' Yan'anj si xa xuj. Ni ni'yaj doj ni é re' daj nga ni xataj nej aj. ²⁵Ni ga'ue gahuin xacan ni é re' doj xi'í si nani ruhua ni é re' ní'. Si ga'ue mánj. ²⁶Hué dan ni sisi si ga'ue gui'yaj á re' nuguan' le doj, ni daj ga'ue gui'yaj á re' nuguan' nico doj, ruhua á re' únj. ²⁷Ni'yaj á re' daj achij yaj lirio. Nitaj si 'yaj sun yaj. Ni nitaj si hua'a

yaj yu'uej nej. Sanĭ atā gunun ni é re' sisi hua niā' nin' ruhua yaj daj, daj nga tsínj gu'naj Salomón ngaa gunun sí' atsij sa' nin' ruhua. ²⁸Nĭ yyaj nĭ man coj riqui quij. Nĭ a'yoj gari yan'an ni sij coj daj. Nĭ gaca-á'. Nĭ sisi Yan'anĭ 'yaj sisi hua niā' ni coj, nĭ huaj nin' ruhua riqui-í' si-gan' ni é re' nej. Sanĭ huin ni é re' ni tsínj xuman doj ruhua ni'yaj Yan'anĭ.

²⁹Hué dan nĭ sĭ gahuin ruhua á re' nga si xa á re' nga si go'o ni é re' mánj. Nĭ sĭ guiriun ruhuá re' mánj. ³⁰Daj si hué xi'í ni rasun nan huin si nani ruhua ni ngüi nitaj si xuman ruhua ni'yaj Yan'anĭ. Sanĭ ni'í chrej ni é re' un rasun achin rian án re'. ³¹Sanĭ nano' sini a ni é re' sisi nicaj Yan'anĭ sun niman án re'. Hué dan nĭ riqui Yan'anĭ daran' rasun nan rian án re' nej.

³²Rún' huin 'ngo xi'nin' xachij dugumij daj huin ni é re'. Yu'uj daj sĭ guxu'ui' ni é re' mánj. Doj ni é re' huin, sanĭ hua ani ruhua chrej ni é re' riquij rian nicaj sun-ún' gane ni é re' nga-á'.

³³Gudu'ue ni é re' si'yaj ni é re'. Nĭ ga'ui' ni é re' rian ni ngüi yaco ran'. Ngaa nĭ ga'ue guiri' a ni é re' 'ngo nnij sa' rian gara sa' á re' si-san'anĭ ni é re'. Nĭ nitaj si xutu nnij da mánj. Nĭ san'anĭ daj huin san'anĭ nara sa' ni é re' xata' rian nitaj si sĭj tsínj tu. Nĭ nitaj si nahuij san'anĭ da mánj. ³⁴Daj si rian nara sa' ni é re' si'yaj ni é re', nĭ hué yu'uj daj nani ruhua niman ni é re' nej.

El siervo vigilante

³⁵Daj rún' nanun chrún 'ngo tsínj daj si-gan' sij, nĭ da'nga' daj ga

chrún ni é re' nej. Nĭ daj rún' arun 'ngo tsínj daj yan'an chra candil sisi xiguin chrej huaj sij, nĭ da'nga' daj gui'yaj á re' nej. ³⁶Gana'uij a ni é re' daj rún' 'yaj ni si-moso 'ngo tsínj xuru'ue. Ana'uij ni sij si numan sí' gan'anĭ sí' rian xacaj 'ngo tsínj yun'unĭ xana. Nĭ ana'uij ni moso daj sisi na'ni yoo ni sij rian hue' ngaa guita ra'a sí' natu sí' chruhua hue'. ³⁷Nĭ hua 'ueé rian ni moso daj ngaa nun ruhua ni sij ana'uij ni sij 'na' niqui tsínj ducua daj. Xanga' ataj snan'an gunun a ni é re' sisi gane ni sij rian mesa gui'yaj sí'. Nĭ gui'yaj sun sí' rian ni sij ga'ui' sí' si xa ni sij. ³⁸Nĭ hua 'ueé rian ni moso daj sisi nun ruhua ni sij ana'uij sij mán ni sij si yan' sa' si guerenga' si 'na' niqui tsínj ducua daj. ³⁹Gunun sa' á re' nan. Sisi guini'í 'ngo tsínj 'ducua daj un hora ga'na' 'ngo tsínj tu, nĭ dugumi sa' sij ducua sij. Nĭ sĭ ga'nij sij na'ni sí' gatu sí' ducua sij, gui'yaj tu sí' mánj. ⁴⁰Nĭ da'nga' daj gui'yaj a ni é re' ga chrún guiman án re'. Daj si ga'na' man'anĭ hué gue hora nitaj si ani ruhuá re' huinj da'nĭj ni ngüi. —Daj gataj Jesús gunun ni tsínj nico' sij.

El siervo infiel

⁴¹Ngaa nĭ nachínj snan'anĭ Pedro Jesús. Nĭ gataj sij:

—Señor, nanĭ re' cuento nan urin rian ni únj ní'. Asĭ rian daran' ni ngüi sa'. —Daj gataj Pedro.

⁴²Ngaa nĭ gataj Señor:

—Nĭ hua 'ngo tsínj nicaj yun'unĭ moso. Nĭ dugumi sij ni moso daj, gui'yaj xuru'ue. Nĭ a'ui' sa' sij si xa ni sí' ngaa ruhua guisĭj hora xa ni sí'. Nĭ sisi dagahuin sa' tsínj daj

si-sun sij, ni daj gui'yaj xuru'ue daj nga sij, ruhua á re' únj. ⁴³Ni ga 'ueé rian tsínj nicaj yun'unj moso daj sisi hua gacuij sij ngaa 'na' niqui xuru'ue nari' sí' sij. ⁴⁴Xanga' atā gunun a ni é re' sisi guinicaj tsínj daj sun dugumi sij daran' si'yaj xuru'ue daj, gui'yaj sí'. ⁴⁵Sani sisi gani ruhua tsínj nicaj yun'unj moso daj sisi gahuin ran 'na' niqui si-xuru'ue sij, ni gaxi'i sij ga'ui' sij ni tsínj nga ni yun'unj xana dugumi sij, ni gaxi'i sij xa nasa' sij, ni go'o nasa' sij da' gaxini sij. ⁴⁶Ni xi'í si nun ana'uij sij ga'na' si-xuru'ue sij, ni ga'na' sí' hué gue hora nitaj si ani ruhua sij si ga'na' sí'. Ni ducu gui'yaj sí' castigo sij. Ni guiran' sij sayun daj rún' guiran' ni tsínj nitaj si 'yaj gacuij, gui'yaj sí'.

⁴⁷Ni hua tsínj nicaj yun'unj ni'i si huin ruhua si-xuru'ue sij gui'yaj sij. Sani nun gui'yaj sij. Ni nitaj hua xugüi 'yaj sij ga'na' sí'. Yu'uj daj ni ducu duguayun sí' sij. ⁴⁸Sani hua ango tsínj nicaj yun'unj. Ni nun ni'i sij si huin ruhua si-xuru'ue sij gui'yaj sij. Ni sisi gui'yaj sij rasun nun ga'uej ruhua si-xuru'ue sij gui'yaj sij, sani doj gayun sij, gui'yaj sí' xi'í si nun ni'i sij.

'Ni sisi a'ui' nico Yan'anj rian 'ngo tsínj daj, ni huin ruhua Yan'anj sisi gui'yaj 'ueé sij nga si ga'ui'-í' rian sij. Tsínj nicaj sun nico dugumi sij si'yaj Yan'anj, ni nāchin' Yan'anj cuenta rian sij sisi dugumi sa' 'ueé sij si'yaj sí'.

Jesús, causa de división

⁴⁹'Yünj 'na' garün yan'an chruhua xungüi nan. Ni ducu huin ruhuāj sisi hua aca yan'an daj. ⁵⁰Hua nian

si guiran'anj 'ngo sayun nico. Ni ducu ani guitsi ruhua nimānj da guisij guiran'anj sayun daj. ⁵¹Gani ruhua á re' sisi ga' din'inj rian ni ngüi ngaa ga'nāj chruhua xungüi, ruhua á re' ní'. Sé daj huin mánj. Sani atā gunun a ni é re' sisi gunun' ni tsínj nga dugüi' ni sij, gui'yaj si-nuguan'anj. ⁵²Ni asij yyaj ni gunun' un'un' ran' ni dugüi' 'ngo tsínj daj. Ni gunun' hua'nij ran' tsínj nga yahuij ran' tsínj. Ni gunun' huij ran' tsínj nga ya'nij ran' tsínj. ⁵³Ni xi'í si-nuguan'anj, ni gunun' nungüej chrej tsínj daj. Ni gunun' nungüej da'nij sí' nej. Ni gunun' nungüej nni yun'unj xana daj. Ni gunun' nungüej da'nij unj nej. Ni gunun' nungüej nni chrej 'ngo yun'unj xana daj. Ni gunun' nungüej xaco' unj nej. —Daj gataj Jesús.

¿Cómo no reconocéis este tiempo?

⁵⁴Ngaa ni gataj Jesús gunun ni ngüi: —Ni'i sa' á re' daj xacaj ni é re' cuenta. Daj si ngaa guini'i a ni é re' sisi nasij nga rian atuj güi, ni ataj á re' sisi doj, ni gaman'. Ni da'nga' daj aman' yya. ⁵⁵Ni ngaa ahui nane ne' sur, ni ataj á re' sisi doj, ni gahuin yan'an. Ni da'nga' daj gahuin yan'an. ⁵⁶Tsínj digya' yun'unj huin a ni é re'. Sa' á re' ruhua á re', sani ani quij ruhua á re'. Ni'i a ni é re' xacaj á re' cuenta daj hua xata' nga daj hua rian yo'ój. Sani nun ni'i a ni é re' daj 'yaj Yan'anj scanij a ni é re' yyaj mánj. —Daj gataj Jesús.

Arréglate con tu adversario

⁵⁷Ni gataj Jesús: —Ni un sin huin ni na'ue xacaj a ni é re' cuenta un nuguan' hua

nica yya únj. ⁵⁸Ni sisi hua 'ngo tsínj unun' nga so', ni nicaj sij so' gan'anj sij ducuasun, sani hué gue chruhua chrej ngaa diaj huaj nungüej é re' daj, ni hué yu'uj daj nagui'yaj yya nungüej é re' xi'f nuguan' unun' nungüej é re'. Ni sisi si guiyaj yya nungüej é re', ngaa ni nicaj sí' man'án re' rian güesi. Ni naga'ui' güesi man'án re' rian caíde. Ni gari caíde man'án re' ducuaqa'. ⁵⁹Ni ataj snan'án gunun re' sisi nitaj si huaj gahui re' yu'uj daj da guisij ganahuij naru'ue re' daran' gaquin' guiyáj re', da ni gahui re' aj. —Daj gataj Jesús gunun ni ngüi.

Arrepentíos o perceréis

13 Ni hué güi daj ni niquin' 'ngo ni tsínj rian nne Jesús. Ni nata' ni sí' daj guiran' go'ngo ni tsínj 'na' estado Galilea rian Jesús. Daj si dagahui' tsínj gu'naj Pilato. Ni nachej Pilato si-tun man'an ni tsínj daj nga si-tun ni xucu dagahui' ni sij ga'ui' ni sij rian Yan'anj. ²Ngaa ni gataj Jesús rian ni tsínj niquin' daj: —Xi'f si da'nga' daj guiran' ni tsínj daj, ni da'ui ni sij doj gaquin' daj nga ango ni ngüi nne estado Galilea, ruhua ni é re' ní'. ³Sé daj huin mánj. Ni atá gunun a ni é re' sisi nitaj si nanicaj ruhua ni é re' nanico' a ni é re' Yan'anj, ni da'nga' daj guiran' a ni é re' nej.

⁴Ni hua gunun ni é re' sisi gahui' xinun' hua'nij ran' ni ngüi ngaa gane 'ngo hue' xxi xacan gataj xiráj ni ngüi daj xuman' Siloé. Ni da'ui ni sij doj gaquin' daj nga ni ngüi man xuman' Jerusalén, ruhua á re' ní'. ⁵Sé daj huin mánj. Ni atá gunun a ni é re' sisi nitaj si nanicaj ruhua

á re' nanico' a ni é re' Yan'anj, ni da'nga' daj guiran' a ni é re' nej. —Daj gataj Jesús.

Parábola de la higuera estéril

⁶Ngaa ni nani Jesús 'ngo cuento digyán sij rian ni ngüi. Ni gataj sij: —Nicaj 'ngo tsínj daj 'ngo chrun ayu higo mán riqui do'ój sij rian man coj uva. Ni gan'anj ni'yaj sij sisi ayu higo chra-á'. Sani a 'ngo-ó' nun guiri' sij mánj. ⁷Ngaa ni gataj sij gunun tsínj dugumi coj uva daj: “Ni'yaj re' sí' hua'nij yo' 'nā' 'na' na'uij chruj higo, sani a 'ngo nun guirij mánj. Ga'nin' náj re' si 'yaj chru niquinj rian do'ój aj.” Daj gataj sij gunun sí'. ⁸Sani gataj tsínj dugumi yo'ój daj: “Señor, dunáj acuán' re' si guiniquin' acuanj ango yo' nan. Ni nachē yo'ój, ngaa ni garāj yo'ój ya'nduj xi'ij aj. ⁹Ni sisi guiniquinj gayu higo chraj, ni dugu'naj huaj. Ni sisi nitaj gayu chraj, ni ga'nin' náj re' nánj.” Daj gataj moso daj gunun tsínj do'oj. —Daj gataj Jesús digyán sij rian ni ngüi.

Jesús sana a una mujer en el día de reposo

¹⁰Hué dan ni 'ngo güi naránj ruhua ni ngüi israelita, ni digyán Jesús rian ni ngüi man chruhua si-nuhui ni sí'. ¹¹Ni nne 'ngo yun'unj xana a'nan', guiyaj 'ngo nane xi'i. Ni guisíj xinun' hua'nij yo' achéj nitu ún', 'yaj nane xi'i daj. Ni na'ue nucua xiráj ún' gache ún' mánj. ¹²Ni ngaa guini'i Jesús yun'unj daj, ni gaquinj sij ún'. Ni gataj sij: —Guisíj nahuín re', 'yaj xi'i a'nán' re' yyaj, xica'uij. —Daj gataj Jesús.

¹³Ngaa n̄i guta' Jesús ra'a sij rian ún'. N̄i 'ngo hora daj, n̄i nahuin n̄ica xiráj ún'. N̄i gax̄i'i ún' ga'mi sa' ún' rian Yan'an̄j.

¹⁴Sani ga'man ruhua tsínj a'nin' chruhua nuhui xi'í si nahuin yun'unj xana daj 'ngo güi naránj ruhua ni sij, gui'yaj Jesús. N̄i gataj tsínj daj gunun ni ngüi:

—Hua huatan' güi gui'yaj sun né' go'ngo semana. Ngaa n̄i ga'na' á re' ni güi daj nahuin a ni é re'. N̄i sé güi naránj ruhua né' ga'na' ni é re' nahuin a ni é re' mánj. —Daj gataj tsínj a'nin' daj.

¹⁵Ngaa n̄i gataj Señor Jesús:

—Sa' á re', ruhua á re'. Sani ani quij ruhua á re'. Tsínj digya' yun'unj huin a ni é re'. Nitaj si nachi go'ngo ni é re' dán re' sicuj nga dán re' urruj yu'uj numi xuj gan'an̄j dogo' o a ni é re' nnee xuj güi naránj ruhua á re' mí'. ¹⁶N̄i yun'unj xana nan huin da'n̄j xi' gu'naj Abraham. N̄i s̄j x̄inun' huá'nij yo' numij sichre Satanás ún'. N̄i nunj si güi naránj ruhua né' huin güi yyaj, sani da'ui né' jnachri né' man'an ún' ra'a sichre Satanás. —Daj gataj Jesús gunun tsínj a'nin' daj.

¹⁷N̄i ngaa guis̄j ga'mi sij daj, n̄i gahuin na'aj ni tsínj unun' nga sij. Sani gahuin n̄ia' ruhua daran' ni ngüi ngaa guini'i ni sij ni si sa' na' xata', gui'yaj Jesús.

Parábola de la semilla de mostaza

¹⁸Ngaa n̄i gataj Jesús:

—Daj hua rian nicaj sun Yan'an̄j, ruhua á re' únj. ¹⁹Hué dan n̄i daj rún' achij can cuej nasa huaj. N̄i dagaman' 'ngo tsínj daj riqui yo'ój. N̄i x̄ira' can daj. N̄i gachi gahuin

'ngo chrun. N̄i 'na' ni xataj chéj xata' gui'yaj xú' si-gaca' xú' chra' coj daj. —Daj gataj Jesús.

Parábola de la levadura

²⁰Ngaa n̄i gataj ruhua' yún Jesús:

—Daj hua rian nicaj sun Yan'an̄j, ruhua á re' únj. ²¹Hué dan n̄i daj rún' levadura huaj. N̄i nachéj hui 'ngo yun'unj xana levadura daj scanij chru harina si nachej-é', gui'yaj unj chrachrúnj. N̄i gari unj quinj daj chruhua hua'nij rio. Ngaa n̄i nara nane riqui quinj daj, 'yaj levadura. N̄i daj rún' 'yaj levadura daj, da'nga' daj gaxa'ni si-nuguan' Yan'an̄j n̄in' gachra' xungüi nej. —Daj gataj Jesús.

La puerta estrecha

²²N̄i gachin Jesús ni xuman' nico nga ni rancho ngaa huaj sij gan'an̄j sij xuman' Jerusalén. N̄i digyán sij si-nuguan' sij rian ni ngüi. ²³N̄i nachínj snan'an̄j 'ngo tsínj daj Jesús. N̄i gataj sij:

—N̄i doj ni ngüi ga'ue guinani, gui'yaj Yan'an̄j ní'. —Daj gataj sij.

Ngaa n̄i gataj Jesús:

²⁴—Gui'yaj fuerza á re' gatu a ni é re' rian hue' chruj huin rian nicaj sun Yan'an̄j. Ataj snan'an̄j gunun a ni é re' sisi gahuin nico ni ngüi gahuin ruhua gatu yu'uj daj. Sani s̄i ga'ue gatu ni sij mánj. ²⁵Ngaa guis̄j naxuman tsínj ducua naránj sij rian ducua sij, n̄i gax̄i'i ni é re' gaquinj ni é re' máx xe'. N̄i gataj ni é re' gunun sij: “Señor, na'ni re' gatu ni únj.” Gataj á re'. Sani gataj tsínj ducua daj gunun a ni é re': “Nun ni'inj n̄i a 'na' ni é re' mánj.” Daj gataj Señor daj huin man'an̄j.

²⁶Ngaa n̄i gaxi'i ni é re' gataj á re' gun̄unj: “Xa ni únj, go'o ni únj nga man'án re'. N̄i digyán re' nuguan' ga'mí re' rian ni únj rian yu'ue.” Gataj á re' nej. ²⁷Sani gataj man'ánj rian án re': “Nun ni'inj n̄i a 'na' ni é re'. Guxun anéj daran' ni é re' riānj si huin ni é re' tsínj 'yaj gaquin'.” Daj gatā gunun a ni é re'.

²⁸N̄i yu'uj daj guiman ni é re'. N̄i ducu gaco ni ngüi man yu'uj daj. N̄i da xa ruj yan' ni ngüi nej. N̄i guini'i ni é re' ni xi a ni é re' tsínj gu'naj Abraham nej, tsínj gu'naj Isaac nga tsínj gu'naj Jacob nej, daran' ango ni tsínj ga'mi si-nuguan' Yan'anj. N̄i guini'i ni é re' sisi nne ni sí' rian nicaj sun Yan'anj. Sani guiri Yan'anj ne' xe' guiman ni é re' aj. ²⁹N̄i ga'na' ni ngüi mán ne' síj güi nga ni ngüi mán ne' rian atuj güi nej, ni ngüi mán ne' norte nej, nga ni ngüi mán ne' sur nej. N̄i gane ni ngüi daj xa ni sij rian mesa rian nicaj sun Yan'anj. ³⁰N̄i hua ni ngüi nun gahuin achij xungüi nan. N̄i hué ni sij gahuin achij ango xungüi ganahuin naca. N̄i hua ni ngüi gahuin achij xungüi nan. N̄i hué ni sij n̄ico' ne' rucu ango xungüi ganahuin naca daj. —Daj gataj Jesús.

Lamento de Jesús sobre Jerusalén

³¹N̄i güi daj guisíj go'ngo ni tsínj fariseo rian nne Jesús. N̄i gataj ni sí' gunun sij:

—Hué yu'uj nan guxun re' man'án re' si huin ruhua rey Herodes dagahui' so' aj. —Daj gataj ni sí'.

³²Ngaa n̄i gataj Jesús:

—Güij n̄i gataj á re' gunun xune daj: “N̄i'yaj re', yyaj nga a'yoj rij

nane x̄i'i chruhua niman ni ngüi. N̄i nahuin ni ngüi a'nan', 'yā nej. N̄i xiráj hua'nij güi, n̄i nahuuj si-sünj, gui'yā.” ³³Sani hua nian si gahuí gan'án yyaj nga a'yoj nga ataj nej si nitaj si huaj gahui' 'ngo tsínj a'mi si-nuguan' Yan'anj ne' xe' xuman' Jerusalén mánj.

³⁴Ducu nani ruhuāj xi'í a ni é re' ni tsínj man xuman' Jerusalén. Daj si gahui' ni tsínj ga'mi si-nuguan' Yan'anj, gui'yaj á re'. N̄i a'ui' ni é re' yej ni tsínj nicaj nuguan' huaj ga'níj Yan'anj rian án re'. Síj undaj huin ruhuāj nagui'yaj yu'uj ni é re' dugumij ni é re'. N̄i daj rún' 'yaj 'ngo xuchre nagui'yaj yu'uj xuj da'níj xuj riqui si-gachi xuj, n̄i da'nga' daj ruhuāj gui'yā nga á re'. Sani nun ga'uej ruhua á re' mánj. ³⁵N̄i'yaj á re'. Daj si guere' xánj án re' nga ducúá á re'. N̄i ataj snan'án gunun a ni é re' sisi si guini'i ruhua' yún ni é re' yünj da guisij ga'na' ruhua' yünj chruhua xungüi nan. N̄i gataj ni é re': “Hua 'ueé tsínj 'na' rian si-xugüi Señor.” Gataj ni é re' aj. —Daj gataj Jesús gunun ni tsínj man xuman' Jerusalén.

Jesús sana a un hidrópico

14 Hué dan n̄i 'ngo güi naránj ruhua ni sij, n̄i gatúj Jesús chruhua ducúá 'ngo tsínj fariseo a'nin'. N̄i xa sí' nga ni sij. N̄i naga'na' ango ni tsínj fariseo Jesús si gui'yaj sí'. ²N̄i nne 'ngo tsínj 'nij gu'man rian Jesús. ³N̄i nachínj snan'anj Jesús ni tsínj digyán ley nga ni tsínj fariseo. N̄i gataj sij: —A'uej si-ley Yan'anj sisi nahuín ni ngüi a'nan', gui'yaj né' güi naránj ruhua né', ruhua á re' ní'. —Daj gataj Jesús.

Saní dínj gahuin du'ua ni sij.

⁴Ngaa n̄i guida'a Jesús tsínj daj. N̄i nahuin sí', gui'yaj sij. N̄i na'n̄íj sij nan' sí'. ⁵Ngaa n̄i gataj sij gunun ni tsínj fariseo:

—Sisi guinij 'ngo dán án re' urruj, asi 'ngo dán án re' sicuj guinij chruhua pozo nnee nunj huin si güi naránj ruhua né', n̄i s̄i gan'anj guiri yoo ni é re' xucu guinij chruhua nnee da ga mí'. —Daj gataj Jesús.

⁶N̄i nun ga'ue danicaj ni sij nuguan' rian Jesús ga mánj.

Los convidados a las bodas

⁷N̄i ngaa guini'i Jesús daj nano' ni tsínj 'na' ducuá tsínj fariseo daj chrun xila niquin' ne' rian gane ni sij rian mesa, ngaa n̄i nani sij 'ngo cuento digyán sij rian ni sí'. N̄i gataj sij:

⁸—Ngaa gaquinj 'ngo tsínj daj gan'anj re' rian gahuin 'ngo gui'yanj nara'a ne, n̄i s̄i gané re' chrun xila niquin' ne' chrej rian mánj. Ga'ue si guisij ango tsínj huin achij doj daj nga man'án re' ga aj.

⁹N̄i ga'ue si ga'na' tsínj gaquinj nungüej é re', n̄i gataj sí' gunun re': “Ga'ui' re' chrun xila nan gane tsínj nan anj.” Gataj sí' si ruhuaj. Ngaa n̄i gahuin na'aj re', n̄i gan'anj gané re' chrun xila niquin' da rucu. ¹⁰Hué dan n̄i ngaa gaquínj sij ga'na' re', n̄i gané re' da rucu. Hué dan n̄i ngaa ga'na' tsínj gaquinj re', n̄i gataj sij gunún re': “Amigo, gachin gané re' chrun xila niquin' ne' rian.” Gataj sij. Ngaa n̄i gahuin 'ueé re' rian ni tsínj nne rian mesa nga re' aj. ¹¹Daj si un tsínj huin ruhua gahuin rian, n̄i guna sij da ne' rucu. Saní un tsínj ga'uej ruhua guna da ne' rucu,

n̄i gahuin rian sij. —Daj gataj Jesús gunun ni tsínj man ducuá tsínj fariseo daj.

¹²Ngaa n̄i gataj Jesús gunun tsínj gaquínj ga'na' sij ducuá sí':

—Ngaa gui'yáj re' 'ngo nún ducuá re', n̄i ga'ui' re' xa ni ngüi, n̄i s̄i gaquínj re' ga'na' ni tsínj nicaj dugüi' nga re' nga ni jnánj re' nej, ni tsínj xuru'ue mán riqui xuman' nej. Daj si ga'ue gaquinj ni sij man'án re' xa re' nga ni sij. N̄i da'nga' daj naru'ue ni sij rián re'. ¹³Saní ngaa gui'yáj re' 'ngo gui'yanj ducuá re', n̄i gaquinj re' ga'na' ni ngüi niqui nga ni ngüi nachran' ra'a nej, ni ngüi yacuan nej, ni ngüi duri nej. ¹⁴Ngaa n̄i ga 'ueé rián re'. Daj si s̄i ga'ue naru'ue ni ngüi daj rián re'. Saní naru'ue sa' Yan'anj rián re' ngaa gana'nij ni níman huin ni sij ni ngüi hua nica niman. —Daj gataj Jesús gunun tsínj gaquínj daj.

Parábola de la gran cena

¹⁵N̄i ngaa gunun 'ngo ni tsínj nne nga Jesús rian mesa, n̄i gataj sí' gunun Jesús:

—Hua 'ueé rian tsínj gan'anj nún rian nicaj sun Yan'anj. —Daj gataj sí'.

¹⁶Ngaa n̄i gataj Jesús gunun sí': —N̄i gui'yaj 'ngo xuru'ue 'ngo nún nico ducuá sij. N̄i gaquínj sij ga'na' nico ni ngüi. ¹⁷N̄i ngaa s̄ij gahuin chrun si xa ni ngüi, 'yaj sij, n̄i ga'n̄íj sij 'ngo moso gan'anj gataj sí' rian ni ngüi daj: “Ga'na' a ni é re' si a hua chrun si xa á re'.” Daj gataj moso daj gunun ni ngüi, gui'yaj xuru'ue. ¹⁸Saní gaxi'i ni sij gataj ni sij rian moso daj sisi s̄i ga'ue guisij ni sij xa ni sij. N̄i gataj 'ngo tsínj

daj: “Guirān 'ngo yo'ój, nī hua nian si gan'anj ni'yā. Achínj jni'yā rían re' si guinicaj re' 'ngo niman nico ngāj si si ga'ue gan'ān nga re' mánj.” Daj gataj sij. ¹⁹Nī gataj ango sij: “Guirān un'un' inta sicúj, nī gan'anj xacāj cuenta sisi a hua xuj gui'yaj sun xuj. Nī guinicaj re' 'ngo niman nico ngāj xi'í si nun ga'ue gan'ān nga re' mánj.” Daj gataj sí'. ²⁰Nī gataj ango sij: “Da guisj xacā 'ngo yun'unj xāna, nī si ga'ue gan'ān mánj.” Daj gataj hua'nij ran' tsínj gunun moso daj.

²¹Ngaa nī nanicaj si-moso tsínj ducua daj. Nī nata' sij nuguan' ga'mi go'ngo ni sí' gunun xuru'ue daj. Hué dan nī ga'man ruhua xuru'ue daj. Nī gataj sij gunun moso: “Gan'anj yoo re' rian yu'ue nga chruhua chrej man riqui xuman' nan. Nī nicaj re' ni ngüi niqui nga ni ngüi nachran' ra'a nej, ni ngüi yacuan nej, ni ngüi duri nej ga'na' re'.” Daj gataj xuru'ue daj gunun moso. ²²Ngaa nī gataj moso daj gunun xuru'ue: “Señor, hua sīj gui'yā si ga'nij re' yūnj. Sanī hua luga ga' aj.” Daj gataj moso daj. ²³Ngaa nī gataj xuru'ue daj gunun moso: “Güij re' chruhua chrej gan'an nga chrej gatin nej. Nī gui'yaj fuerzá re' si ga'na' ni ngüi gatu ni sij chruhua ducuaḡ gara guiman ni sij. ²⁴Daj si xānga' atā gunun re' sisi si gahuin sti'nij nga nī a 'ngo ni ngüi gaquínj sinij mánj.” Gataj xuru'ue daj gunun si-moso sij. —Daj gataj Jesús gunun tsínj nne rian mesa nga sij.

Lo que cuesta seguir a Cristo

²⁵Nī huaj nico ni ngüi nga Jesús. Nī nanicaj sij gataj sij gunun ni sí':

²⁶—Sisi hua 'ngo tsínj daj huin ruhua ga'na' riānj, nī hua nian si gahuin 'i ruhua sij ni'yaj sij yūnj daj nga si 'i ruhua sij ni'yaj sij chrej sij nga nni sij nej, man'an sij nej. Nī sisi na'uej ruhua sij daj, nī si ga'ue gahuin sij tsínj guinico' man'ānj mánj. ²⁷Nī sisi na'uej ruhua 'ngo tsínj daj gata sij rugutsi guiran' sij sayun ngāj, nī si ga'ue gahuin sij tsínj guinico' man'ānj mánj.

²⁸Nī sisi huin ruhua 'ngo ni é re' gui'yaj 'ngo hue' xxi nata', nī nani sini ruhua tsínj daj ni'yaj sij undaj gutin' sij du'ue hue' daj. Ngaa nī xacaj sij cuenta sisi guisj si-san'anj sij. ²⁹Nī sisi nitaj si nani sini ruhua sij, hué dan nī ngaa guruj sij daqui hue', nī na'ue guisi-í', gui'yaj sij. Nī gaxi'i ni ngüi ga'mi ducu ni sij xi'í sij. ³⁰Nī gataj ni sij: “Gaxi'i tsínj nan gui'yaj sij hue'. Sanī nun gunucuj sij guisi, gui'yaj sij mánj.” Daj gataj ni ngüi daj.

³¹Nī sisi hua 'ngo rey nicaj ichi' mil snado, nī huaj sij gan'anj gunun' sij nga ango rey 'na' nga cō mí snado, ngaa nī gan'anj gane sij xacaj sij cuenta sisi ga'ue gunucuj sij gui'yaj gana sij rian ango rey nicaj cō mil snado daj. ³²Nī sisi ani ruhua sij sisi na'ue gunucuj sij gunun' sij nga ango rey, nī ngaa hua gan' 'na' ango rey, nī a'nij sij ni tsínj nicaj nuguan' gan'anj gataj snan'anj ni sí' sisi na'mi nungüej rey daj.

³³Nī hué ducuanj daj tsínj na'uej ruhua duna daran' si nicaj sij, ngaa nī si ga'ue gahuin sij tsínj guinico' man'ānj mánj. —Daj gataj Jesús.

Cuando la sal pierde su sabor

³⁴Nī gataj ruhua' yún Jesús:

—Hua sa' yan. Ni daj rún' huin yan, ni da'nga' daj huin a ni é re' chruhua xungüi. Sani sisi nitaj si 'nin' yan daj, ni si ga'ue gui'yaj ne' nahuin 'nin' manj. ³⁵Ni nitaj si ni'yanj yan daj rian yo'ój. Ni nitaj si ni'yan gahuin yo'ój ya'nduj nej. Sani guere'ej ne' xe' yan daj.

Hué dan ni tsínj nun chraquij, ni hua nian si gunun sij nuguan' nan anj.

Parábola de la oveja perdida

15 Ngaa ni nahuin yu' daran' ni tsínj a'nej pesto nga ni ngüi 'yaj gaquin' rian Jesús gunun ni sij si gataj sí'. ²Ngaa ni ga'mi hui ni tsínj fariseo nga ni tsínj digyán ley xi'í si gui'yaj Jesús. Ni gataj ni sí':

—A'nin' ruhua tsínj daj nicaj dugüi' sij nga ni tsínj 'yaj gaquin'. Ni xa nuguan'an sij nga ni sí' nej. — Daj gataj ni sij.

³Ngaa ni nani Jesús 'ngo cuento digyán sij rian ni sí'. Ni gataj sij:

⁴—Ni sisi nicaj 'ngo dugüi' ni é re' 'ngo ciento xachij, ni gan'anj ni'ya 'ngo xuj, ni daj gui'yaj tsínj dan daj, ruhua ni é re' únj. Gara sij gan'anj xia xínun' gan'anj xachij riqui quij. Ni gan'anj nana'ui' sij xachij gan'anj ni'ya daj. Ni dayun nari' sij. ⁵Ni ngaa nari' sij, ni nia' ruhua sij guta' sij dacan xicój sij. ⁶Ni ngaa nasíj sij ducua' sij, ni naran' sij ni tsínj nicaj dugüi' nga sij nga ni tsínj nne xánj sij. Ni gataj sij gunun ni sí': “Gahuin nia' ruhua á re' ngāj si hua nari'ij xachij gan'anj ni'ya daj.” Daj gataj tsínj daj. ⁷Ni ataj snan'an gunun a ni é re' sisi nia' ruhua ni tsínj man xata' ni'yaj ni sij 'ngo tsínj 'yaj

gaquin' ngaa nani ruhua sí' xi'í si-gaquin' sí'. Ni gahuin nia' ruhua ni sij ni'yaj ni sij doj nga tsínj daj, daj nga ango gan'anj xia xínun' gan'anj ni tsínj na'uej ruhua si ganani ruhua ni sij xi'í si-gaquin' ni sij. Daj si hua nica niman ni sij, ruhua ni sij. —Daj gataj Jesús.

Parábola de la moneda perdida

⁸Ngaa ni gataj ruhua' yún Jesús:

—Ni sisi nicaj 'ngo yun'unj xana ichi' moneda san'anj, ni gan'anj ni'ya 'ngo moneda daj, ni daj gui'yaj ún', ruhua á re' únj. Garun ún' yan'an candil. Ni naca' ún' chruhua hue'. Ni nana'ui' 'uee ún' da nari' ún'. ⁹Ni ngaa nari' ún', ni gaquin' ún' ni ngüi nicaj dugüi' nga ún' nga ni dugüi' ún' man xánj ún' nej. Ni gataj ún': “Gahuin nia' ruhua á re' ngāj si hua nari'ij moneda gan'anj ni'ya daj.” Daj gataj ún' gunun ne. ¹⁰Ni ataj snan'an gunun ni é re' sisi daj rún' gahuin nia' ruhua ún', ni da'nga' daj hua nia' ruhua si-ángel Yan'anj ni'yaj-á' ngaa nanicaj ruhua 'ngo tsínj xi'í si-gaquin' sij. —Daj gataj Jesús.

Parábola del hijo pródigo

¹¹Ni gataj ruhua' yún Jesús:

—Hua huij da'níj 'ngo tsínj daj. ¹²Ni gataj da'níj sij tsínj hua lij doj gunun chrej sij: “Tata chré', huin ruhuāj sisi gura' da'áj re' si'yáj re'. Ni riqui re' da'áj si'yáj re' gahuinj.” Daj gataj sij gunun chrej sij. Ngaa ni gura' da'áj chrej sij si'yaj sí' ga'ui' sí' rian nungüej da'níj sí'. ¹³Doj güi gachin ni naran' tsínj hua lij daj daran' si'yaj sij. Ni gahui sij gan'anj gan' sij ango xuman'. Ni ganahuij

si-san'anj sij gutin' yun sij daj rún' garan' ruhua sij. ¹⁴Ni ngaa ganahuij gutin' sij san'anj nicaj sij, ni ducu gahuin xi'ná xuman' daj. Ni ga'naj gachin xi'ná riqui sij. ¹⁵Ngaa ni gan'anj gachinj sij sun gui'yaj sun sij rian 'ngo tsínj nne yu'uj daj. Ni ga'nj s' gan'anj sij quij gan'anj dugumi sij dán s' xacáj. ¹⁶Ni huin ruhua sij gara riqui sij nga si xa xacáj. Sani a 'ngo ni s' nun ga'ui' ni s' si xa sij mánj.

¹⁷Ngaa ni nanicaj ruhua sij, ni gataj sij gunun man'an sij: "Ni moso mán 'yaj sun rian chrē, ni hua nico si xa ni sij. Ni yu'uj nan nnēj. Ni gahuij, gui'yaj xi'ná. ¹⁸Nanicā nan'ānj ducua chrē, ni gatā gunun s': Tata chré', gui'yā gaquin' rian Yan'anj nga rian man'án re' nej. ¹⁹Nitaj hua si-chrej si gataj re' si da'nj re' huinj ga mánj. Maan si gui'yáj re' si gahuinj 'ngo tsínj 'yaj sun rián re', gatā gunun chrē." Daj gataj sij gunun man'an sij.

²⁰Hué dan ni naxuman sij, ni nanicaj sij nan' sij ducua chrej sij. Ni ngaa guini'i chrej sij huaj sij gan', ni ducu gahuin yaco ruhua s' ni'yaj s' sij. Ni gunánj s' gan'anj s' rian huaj da'nj sij. Ni gananan s' man'an sij. Ni garun du'ua s' man'an sij nej. ²¹Ngaa ni gataj sij gunun s': "Tata chré', gui'yā gaquin' rian Yan'anj nga rian man'án re' nej. Ni nitaj hua si-chrej si gataj re' si da'nj re' huinj ga mánj." Daj gataj sij gunun chrej sij. ²²Sani gataj chrej sij gunun ni si-moso s': "Güj xacaj yoo ni é re' atsi sa'. Ni ga'nij a ni é re' xa sij gunun sij. Ni ga'nij ni é re' 'ngo se'ej ra'a sij. Ni nari ni é re' zapato dacój sij nej. ²³Ni

nicaj á re' sicuj namij ga'na' á re'. Ni dagahui' a ni é re' nej. Ni gui'yaj né' gui'yanj gahuin nia' ruhua né'. ²⁴Daj si rún' ganá'nij 'ngo níman, da'nga' daj nasj ruhua' yún da'ní riánj. Hua gani'ya sij. Sani nari' ruhua' yún sij." Daj gataj chrej sij. Ni gaxi'i ni sij gahuin nia' ruhua ni sij.

²⁵Ni da'nj sij tsínj xahua', ni hua gan'anj s' riqui quij. Ni ngaa nanicaj s', ni gahuin nichrun' s' rian hue'. Ni gunun s' sisi man ni tsínj a'yanj nga ni ngüi chran'anj nej. ²⁶Ngaa ni gaquínj s' 'ngo ni tsínj 'yaj sun rian chrej sij. Ni nachínj snan'anj s' moso daj un sin gahuin nga gui'yanj daj.

²⁷Ngaa ni gataj moso daj: "Hua nasj jnánj re'. Ni ga'nj chréj re' sun sisi dagahui' ni únj sicuj hua namij. Daj si nucuj sij nasj sa' sij." Daj gataj moso gunun tsínj xahua' daj.

²⁸Sani ga'man ruhua tsínj xahua' daj. Ni nun ga'uej sij gatu sij chruhua hue'. Xi'f daj, ni gahuí chrej nungüej tsínj daj. Ni ga'mi yaco s' si gatu sij chruhua hue'. ²⁹Ni gataj sij gunun chrej sij: "Ni' man'án re' undaj yo' s' 'yaj sünj rián re'. Ni dagahuin sa'áj rián re'. Ni nitaj aman riquí re' 'ngo stane le'ej gui'yā gui'yanj nga ni tsínj nicaj dugüi' ngáj mánj. ³⁰Sani ngaa nasj da'nj re' nan gutin' sij si-san'ánj re' nga ni yun'unj xana achéj man'an, ni dagahuí re' sicuj namij xi'f sij." Daj gataj tsínj xahua' gunun chrej sij.

³¹Ngaa ni gataj chrej sij gunun sij: "Da'ni huín re'. Ni ya'yoj nné re' ngáj. Ni daran' si man riánj huin si'yáj re' aj. ³²Sani hua nian

si gui'yaj né' gui'yanj gahuin niā' ruhua né' si nasíj jnánj re'. Ni rún' huin 'ngo níman gahuin sij riānj. Sani ganá'nij sij. Ni ga ni'ya sij. Sani nari'ij sij nánj." Daj gataj chrej sij gunun sij. —Ni da'nga' daj gataj Jesús nani sij cuento rian ni tsínj daj.

El ejemplo del mayordomo infiel

16 Hué dan ni nani Jesús 'ngo cuento digyán sij rian ni tsínj nico' sij. Ni gataj sij:

—Hua 'ngo tsínj xuru'ue. Ni rian sí' nun 'ngo tsínj dugumi si'yaj sí'. Ngaa ni gan'anj ga'mi gaquin' ango ni tsínj rian xuru'ue sisi ducu gutin' tsínj daj si'yaj sí'. ²Ngaa ni gaquínj xuru'ue daj si ga'na' sij. Ni gataj sí': "Ni un sin huin nan si a'mi ni sij xi'í re' únj. Nariqui re' cuenta daj gui'yaj sún re' riānj dugumí re' si'yā si na'uej ruhuāj si gahuín re' tsínj dugumi si'yā riānj ga mánj." Daj gataj xuru'ue daj.

³Ngaa ni gataj tsínj daj gunun man'an sí': "Ni un sin huin gui'yā yyaj, ni ga'nej si-patrōnj sun riānj únj. Daj si nitaj fuerza gui'yaj sūnj rian yo'ój. Ni huin na'ā gui'yā caridad nej. ⁴Yyaj ni hua ni'inj si gui'yā. Ngaa ni ga'ue chracuij ni sij ducua' ni sij ganēj ngaa nitaj sun gui'yaj sūnj." Da'nga' daj gani ruhua sij.

⁵Ngaa ni gaquínj sij ga'na' go'ngo ni tsínj da'ui rian xuru'ue daj. Ni gataj sij rian tsínj ga'na' sini daj: "Ni undaj huin si da'uíj re' rian si-patrōnj únj." Daj gataj sij. ⁶Ngaa ni gataj sí': "Da'uij 'ngo ciento tambo gasiti rian si-patrón re' aj." Daj gataj sí'. Ngaa ni gataj tsínj daj: "Nícaj

re' dánj re' yanj rí re' cuenta. Ni gane yoo re' garun re' huij xia chi' gue aj." Daj gataj sij. ⁷Ngaa ni gataj sij gunun ango sí': "Ni undaj huin da'ui man'án so' únj." Daj gataj sij. Ni: "Da'uij 'ngo ciento nnánj strigo aj." Daj gataj sí' gunun sij. Ngaa ni gataj sí': "Nícaj re' dánj re' yanj rí re' cuenta nan. Ni garun re' rian yanj sisi da'uíj re' gan'anj xia gue aj." Daj gataj sij gunun sí'.

⁸Hué dan ni xacaj xuru'ue daj cuenta sisi gui'yaj xi'i tsínj daj xi'í sí'. Sani ga'mi sa' sí' xi'í sij. Daj si nagui'yaj yoo sij nuguan' xi'í man'an sij. Ni ni tsínj man xungüi gaquin' nan, ni hua yoo ni sij ngaa nagui'yaj ni sij 'ngo nuguan' nga ni dugüi' ni sij. Ni hua yoo ni sij doj daj nga ni tsínj achéj rian xiguin hua.

⁹Ngaa ni gataj snan'an gunun a ni é re' sisi ga'ui' ni é re' rasun man rian án re' ra'a ni ngüi. Ngaa ni gahuin ni ngüi daj ni ngüi guinicaj dugüi' nga ni é re'. Daj si rasun man rian xungüi nan, ni nun hua sa' nico. Hué dan ni ngaa ganahuij ni rasun man rian ni é re', ngaa ni xata' nahuin ra'a ni sij ni é re' gane niganj ni é re' nga Yan'anj. ¹⁰Ni un tsínj hua gacuij, ni dugumi sa' sij doj rasun, ni hué daj hua gacuij sij ngaa dugumi sij nico rasun nej. Ni un tsínj 'yaj xi'i dugumi sij doj rasun, ni gui'yaj xi'i sij ngaa dugumi sij nico rasun nej. ¹¹Ni hué ducuanj daj sisi nitaj si hua gacuij ni é re' dugumi a ni é re' ni rasun xi'i man chruhua xungüi gaquin' nan, ngaa ni nitaj tsínj gahuin ruhua riqui ni rasun yya rian án re' mánj. ¹²Ni sisi nitaj si ga gacuij ni é

re' dugumi ni é re' ni rasun sé si'yaj ni é re' huin ni rasun man rian xungüi nan, ngaa ni un tsínj gahuin ruhua riqui rasun gahuin si'yaj ni é re' ne' xata', ruhua á re' únj.

¹³Ni nitaj 'ngo tsínj gahuin nucuj dagahuin rian huij xuru'ue mánj. Sisi guiyaj sun né' rian huij xuru'ue, ni nun huin xan' ruhua né' ni'yaj né' 'ngo xuru'ue daj. Ni gahuin 'i ruhua né' ni'yaj né' ango sí'. Ni huin ruhua né' guinicaj dugüi né' nga 'ngo xuru'ue daj. Sani nitaj si a'mi sa' né' nga ango sí'. Hué ducúanj daj, ni sisi ducu aran' ruhua né' ni'yaj né' ni rasun man chruhua xungüi, ni na'ue dagahuin né' rian Yan'anj mánj. —Daj gataj Jesús gunun ni sij.

¹⁴Ni ducu garan' ruhua ni tsínj fariseo ni'yaj ni sij san'anj. Ni ngaa gunun ni sij nuguan' daj, ni ga'mi ducu ni sij ni'yaj ni sij Jesús. ¹⁵Ngaa ni gataj Jesús gunun ni sij:

—Ni 'yaj ni é re' sisi tsínj sa' huin a ni é re' rian ni ngüi. Sani ni'i Yan'anj niman ni é re'. Ni nuguan' ni'yanj nico rian ni ngüi, sani nuguan' xi'i huin rian Yan'anj anj.

¹⁶Ni asij ná ni digyán Moisés si-ley Yan'anj rian ni ngüi. Ni digyán ni tsínj ga'mi si-nuguan' Yan'anj rian ni ngüi. Sani ngaa guisij ga'na' Juan, ni unun ni ngüi nuguan' sa' xi'f si nicaj sun Yan'anj rian né'. Ni daran' ni sij 'yaj fuerza si gatu ni sij rian nicaj sun Yan'anj. ¹⁷Ni ga'ue sisi ganahuij xata' nga xungüi. Sani si ga'ue ganahuij ni a 'ngo nuguan' le'ej 'na' rian si-ley Yan'anj mánj. —Daj gataj Jesús.

Jesús enseña sobre el divorcio

¹⁸Ngaa ni gataj Jesús:

—Ni sisi hua 'ngo tsínj guere'ej nica, ni nacaj sij ango yun'unj xana, ni da'ui sij gaquin'. Ni sisi nacaj ango tsínj yun'unj xana guere' daj, ni da'ui sí' gaquin' nej. —Daj gataj Jesús gunun ni tsínj fariseo.

El rico y Lázaro

¹⁹Ngaa ni nani Jesús 'ngo cuento. Ni gataj sij:

—Ni hua 'ngo tsínj xuru'ue. Ni nun sij atsj sa' du'ue. Ni ya'yoj guiyaj sij 'ngo nún nico ducua sij. ²⁰Ni hua 'ngo tsínj yaco ran' gu'naj sí' Lázaro. Ni ngaj sí' rian yo'ój rian ducua xuru'ue daj. Ni man siqui nin' gachra' nnee cúj sí'. ²¹Ni huin ruhua tsínj daj gara riqui sij nga si ayu rian mesa, 'yaj xuru'ue daj. Ni 'na' xuhue ahui xuj rian siqui daj.

²²Hué dan ni 'ngo güi, ni gahui' tsínj niqui daj. Ni nicaj ni ángel gan'anj-án' sij rian nne tsínj gu'naj Abraham xata'. Ni nanan Abraham man'an sij. Ni gahui' xuru'ue nej. Ni gan'anj gachin' ni sij sí'. ²³Ni ngaa ran' xuru'ue daj sayun nico rian gan'anj ni niman, ni nachi nicaj sij rian sij guini'i sij sisi gan' nne Abraham. Ni yu'uj daj nanan Abraham tsínj gu'naj Lázaro.

²⁴Ngaa ni gaguáj sij: “Tata chré' Abraham, nahuin 'i ruhuá re' ni'yaj re' man'anj. Ni ga'nij re' Lázaro ga'na' sí' yu'uj nan. Ni ga'nij sí' chra ra'a sí' chruhua nnee. Ni guta' sí' nnee daj rian yyā si yaco ran'anj nūnj rian yan'an nan.” Daj gataj xuru'ue gunun Abraham.

²⁵Sani gataj Abraham gunun xuru'ue: “Da'ní, ganun ruhua re' sisi ngaa gané re' chruhua xungüi, ni nicaj re' nico rasun sa' rián re'.

Ni nicaj Lázaro ni rasun xi'i. Yyaj ni nahuin nia' ruhua sij yu'uj nan. Ni ran' man'án re' sayun nun re' yu'uj daj. ²⁶Ango nuguan' huin sisi hua 'ngo xinéj xachij dani nungüe'. Ni si ga'ue gachin ni ngüi mán yu'uj nan guisij ni sij rian nné re'. Ni na'ue gachin ni ngüi mán yu'uj daj nga re' ga'na' ni sij yu'uj nan mánj.” Daj gataj Abraham gunun sí'.

²⁷Ngaa ni gataj xuru'ue daj: “Achínj jni'yā rián re' tata chré' Abraham sisi na'nij re' Lázaro nan' sij ducua' chrē ²⁸rian hua un'un' jnān. Ni gan'anj sij nata' sij rian ni sí' sisi si ga'na' ni sí' rian hua sayun nico nan mánj.” Daj gataj xuru'ue. ²⁹Ngaa ni gataj Abraham: “Hua nicaj ni sí' si garun Moisés nga ni tsínj ga'mi si-nuguan' Yan'anj asij ná. Ga'ue gunun sa' ni sí' ni nuguan' daj.” Daj gataj Abraham. ³⁰Ngaa ni gataj xuru'ue: “Tata chré' Abraham, xanga' ni si gunun ni sí'. Sani sisi gana'nij 'ngo níman gurugüi' scanij ni sí', ngaa ni nanicaj ruhua ni sí' xi'í si-gaquin' ni sí', ruhuāj aj.” Daj gataj xuru'ue.

³¹Sani gataj Abraham: “Sisi nun gunun ni sí' si gataj Moisés nga ni tsínj ga'mi si-nuguan' Yan'anj asij ná, ngaa ni si guxuman ruhua ni sí' ni'yaj ni sí' si-nuguan' 'ngo tsínj ganán'ij scanij ni níman mánj.” Daj gataj Abraham gunun xuru'ue daj. —Ni hué daj huin cuento nani Jesús rian ni ngüi.

Ocasiones de caer

17 Ngaa ni gataj Jesús gunun ni tsínj nico' sij:
—Xungüi nan, ni hua nico ni rasun 'yaj sisi guínico' ni ngüi chrej

xi'i. Sani niqui niman 'ngo tsínj a'ui' 'ngo chrej xi'i riqui dugüi' sij. Daj si guiran' sij castigo, gui'yaj Yan'anj. ²Ni asij nun ga'ui' sij 'ngo chrej xi'i riqui dugüi' sij, ni dugüej naj ni sij 'ngo yej to anumi xá sij gan'anj sij chruhua nnee yan'anj nga a'. Daj si quij 'yaj 'ngo tsínj ngaa a'ui' sij 'ngo chrej xi'i riqui 'ngo tsínj ngaa naca natu sí' si-chrej Yan'anj.

³Ga cuidado a ni é re' daj gui'yaj ni é re'. Sisi gui'yaj jnánj re' gaquin' rián re', ngaa ni nata' re' si-gaquin' sij rian man'an sij. Ni sisi nani ruhua sij xi'í si-gaquin' sij, ngaa ni nicaj re' 'ngo niman nico nga sij. ⁴Ni nunj si gui'yaj jnánj re' ichij gaquin' rián re' 'ngo güi, ni hua nian si nicaj re' 'ngo niman nico nga sij sisi ga'na' nata' sij yun yun rián re' sisi si gui'yaj sij gaquin' da ga mánj. —Daj gataj Jesús gunun ni tsínj nico' sij.

Aumentanos la fe

⁵Ngaa ni gataj ni tsínj apóstol gunun Señor Jesús huin ni tsínj ga'mi si-nuguan' Jesús rian ni ngüi:
—Riqui re' sisi guxuman nico ruhua ni'yaj ni únj Yan'anj anj. — Daj gataj ni sij.

⁶Ngaa ni gataj Señor Jesús:
—Ni sisi guxuman ruhua ni é re' daj rún' 'yaj 'ngo can cuej nasa, ngaa ni ga'ue gataj á re' gunun chrun nan sisi guxun man'an gan'anj-án' chruhua nnee yan'anj. Ni gunun chrun rian án re' aj.

El deber del siervo

⁷Ni ngaa gan'anj si-moso 'ngo ni é re' quij nachej sij do'ój re' si dugumi sij dán re' xucu, ni daj

gataj re' gunun sij ngaa 'na' niqui sij gan'anj sij quij únj. Atáj re' rian sij sisi gachin sij gane sij rian mesa xa sij ní'. Sé daj huin atáj re' mánj. ⁸Sani atáj re' gunun sij: “Gui'yaj xugúí re' gahuin sti'ni man'ánj. Gui'yaj sun acuan' re' riánj si xāj, ni go'ój. Asíj ni xa, ni go'o man'án re' nej.” Daj atáj re' rian sij nánj. ⁹Ni ngaa dagahuin si-mosó re' daran' si a'nín' re' sun rian sij, ni gataj re' si guruhua rian moso daj ní'. Sé daj huin gataj re' mánj. ¹⁰Ni da'nga' daj gui'yaj á re' nga Yan'anj. Ni ngaa ganahuij gui'yaj á re' daran' nuguan' a'nin' Yan'anj sun rian án re', ngaa ni gataj á re': “Nitaj si ní'yanj ni únj si maan si gui'yaj únj rún' hua si-sun ni únj.” Daj gataj á re'. —Gataj Jesús gunun ni sí'.

Diez leprosos son limpiados

¹¹Ni ngaa huaj Jesús gan'anj sij xuman' Jerusalén, ni gachin sij rian ata dugúí' estado Samaria nga estado Galilea. ¹²Ni guisíj sij 'ngo rancho rian gahui ichi' tsínj ran' xi'i nnij. Ni gan' ganiquin' ni sij. ¹³Ni gaguáj ni sij gataj ni sij:

—Jesús, Maestro, gahuin 'i ruhuá re' ni'yaj re' ni únj. —Daj gataj ni sij.

¹⁴Ni ngaa guini'i Jesús ni sí', ni gataj sij:

—Güij digyán ni é re' man'an án re' rian ni chrej. —Daj gataj Jesús.

Hué dan ni ngaa huaj ni sij chruhua chrej, ni ganahuin sa' ni sij. ¹⁵Ni ngaa guini'i 'ngo tsínj daj sisi ganahuin sa' sij, ni nanicaj sij ga'mi nucaj sij si hua 'ueé gui'yaj Yan'anj nga sij. ¹⁶Ni ganiquin' ráj dajoj sij rian Jesús. Ni ga' rian sij

rian yo'ój. Ni naga'ui' sij guruhua Jesús. Ni tsínj daj huin 'ngo tsínj samaritano.

¹⁷Ngaa ni gataj Jesús:

—Sé ichi' ran' ni é re' huin si ganahuin sa', gui'yā a'. Ni a gan'anj ango un ran' ni sij únj. ¹⁸Urin tsínj 'na' anéj chrej nan nanicaj ga'mi sa' rian Yan'anj ní'. —Daj gataj Jesús.

¹⁹Ngaa ni gataj Jesús gunun tsínj daj:

—Nachica re', ni gan'anj re' xi'í si guxuman ruhuá re' ni'yáj re' man'ánj, ni nahuín re' aj. —Daj gataj Jesús.

La venida del reino

²⁰Ngaa ni nachínj snan'anj ni tsínj fariseo Jesús aman guinicaj Yan'anj sun rian ni ngüi. Ni gataj Jesús:

—Nitaj si ní'yanj sisi ducu ni'yaj ni é re'. Daj si si ga'ue guini'i ni ngüi ngaa ga'na' guinicaj sun Yan'anj mánj. ²¹Ni nitaj si gataj ni ngüi: “Nan huin rian nicaj sun Yan'anj, asi yu'uj daj huin rian nicaj sun Yan'anj.” Sé daj huin mánj. Daj si hua ga'na' guinicaj sun Yan'anj scanij ni é re' aj. —Daj gataj Jesús rian ni tsínj fariseo.

²²Ngaa ni gataj Jesús gunun ni tsínj nico' sij:

—Guisij 'ngo güi ngaa gahuin ruhua ni é re' guini'i ni é re' güi nan ngaa huaj man'ánj scanij a ni é re' huinj da'níj ni ngüi. Sani si guini'i ni é re' mánj. ²³Ni gataj go'ngo ni ngüi gunun a ni é re': “Nan nne Cristo aj.” Asi gataj ni sij: “Yu'uj daj nne Cristo aj.” Gataj ni ngüi gunun a ni é re'. Sani si gan'anj án re' mánj. Ni si guinico' a ni é re' ni tsínj da mánj. ²⁴Daj si daj

rún' huin ngaa ran 'yaj du'ui, n̄i 'ngo xiguin̄ n̄in' rian xungüi, n̄i da'nga' daj yoo gahuin güi nanicaj da'n̄ij ni ngüi huin man'anj. ²⁵San̄i hua n̄ian sisi guiran'anj sini nico sayun. N̄i hua n̄ian si danicaj ni ngüi man chruhua xungüi nan man'anj nej.

²⁶N̄i daj rún' gui'yaj ni ngüi yo' gane tsínj gu'naj Noé, n̄i da'nga' daj gui'yaj ni ngüi güi ngaa ga'na' da'n̄ij ni ngüi huin man'anj. ²⁷Daj si ngaa gane Noé, n̄i xa ni sij go'lo ni sij. N̄i xacaj ni sij yun'unj xana. N̄i n̄inanj daj gui'yaj ni sij da' güi gatúj Noé chruhua rio chéj rian nnee. Ngaa n̄i 'ngo gaman' guman huee xxi nun güi nigan'. N̄i gara n̄in' nnee n̄in' gachra' chruhua xungüi. N̄i gahui' daran' ni ngüi, gui'yaj nnee. ²⁸N̄i daj rún' gui'yaj ni ngüi ngaa gane tsínj gu'naj Lot, n̄i da'nga' daj gui'yaj ni ngüi güi ga'na' man'anj. Daj si ránj ni sij rasun nej, gudu'uej ni sij rasun nej, gunun ni sij nna nej, gui'yaj ni sij hue' nej aj. ²⁹San̄i ngaa gahui tsínj gu'naj Lot xuman' Sodoma gan'anj sij, n̄i guinij yan'an nga yo'ój sufre xata'. N̄i gahui' daran' ni ngüi mán xuman' daj. ³⁰N̄i daj rún' nun xacaj ni ngüi daj cuenta si guiran' ni sij sayun, n̄i da'nga' daj gahuin güi gurugüi' da'n̄ij ni ngüi huin man'anj.

³¹N̄i sisi taj re' chra hue' güi daj, n̄i si nanij re' guiri re' si'yáj re' chruhua ducúa re' mánj. N̄i sisi nun 'ngo tsínj quij 'yaj sun sij, n̄i si nanicaj sij ducúa sij mánj. ³²N̄i gan̄anun ruhua á re' daj guiran' nica tsínj gu'naj Lot asij ná.

³³N̄i un tsínj huin ruhua nacaj man'an sij, n̄i gahui' sij. San̄i un

tsínj ga'ue gahui' rian xi'ij, n̄i nacaj sij man'an sij.

³⁴Ataj snan'an gunun a ni é re' sisi 'ngo n̄i daj, n̄i gatoj nungüej nica 'ngo tsínj daj rian nna. Hué dan n̄i nicā gan'an 'ngo nungüej sij. N̄i angó nungüej sij guna. ³⁵N̄i gunun nuguan'an huij yun'unj xana gaj ún'. N̄i nicā 'ngo ún' gan'an. N̄i angó ún' guna. ³⁶N̄i gunun huij tsínj gui'yaj sun riqui quij. N̄i nicā gan'an 'ngo sij. N̄i angó sij guna. —Daj gataj Jesús gunun ni sij.

³⁷Ngaa n̄i nachínj snan'anj ni sij Jesús. N̄i gataj ni sij:

—N̄i a huin gahuin daj Señor. — Daj gataj ni sij.

N̄i gataj Jesús:

—Rian ngaj ni níman yu'uj daj nahuin yu' ni xarúj. —Daj gataj Jesús rian ni sij.

Parábola de la viuda y el juez injusto

18 Ngaa n̄i nani Jesús 'ngo cuento digyán sij rian ni tsínj nico' sij sisi niganj gachinj jni'yaj ni sij rian Yan'anj. N̄i si gahuin nichre ni sij mánj. ²N̄i gataj Jesús:

—N̄i hua 'ngo güesi nicaj sun nne riqui 'ngo xuman' daj. N̄i nitaj si xu'ui' sij rian Yan'anj. N̄i nitaj si ní'yanj sij rian ni ngüi nej. ³N̄i hué riqui xuman' daj nne 'ngo yun'unj mmij. N̄i a'n̄ij 'ngo tsínj letu nga ún'. N̄i gan'anj ún' rian güesi nicaj sun daj sisi gui'yaj yya sí' si-gaquin' ún' nga tsínj unun' nga ún' daj. ⁴N̄i gachin güi n̄i nun ga'uej ruhua güesi daj gui'yaj yya sij nga gaquin' daj. Ngaa n̄i nani ruhua sij, n̄i gataj sij gunun man'an sij: “Nun̄j si nitaj si xu'uij rian Yan'anj, n̄i nitaj si

ni'yān rian ni ngüi nej, ⁵sani rian nun dunáj yun'unj mmij daj si chran' yun'unj ún' yünj, ni gan'anj gui'yaj yyāj nga gaquin' daj. Ngaa ni si ga'na' chran' yun'unj ún' yünj ga mánj. Daj si sisi nitaj, ni guinan' ruhuāj ni'yā ún' nánj.” Daj gataj tsínj daj gunun man'an sij. —Gataj Jesús gunun ni sij.

⁶Ngaa ni gataj Señor Jesús rian ni sij:
—Xacaj á re' cuenta daj ga'mi güesi xi'i daj. ⁷Ngaa achínj jni'yaj ni ngüi rian Yan'anj huin ni sij ni ngüi hua nacui Yan'anj, ni huin ruhua ni sij sisi gui'yaj yya Yan'anj 'ngo gaquin', ni si gui'yaj yya Yan'anj nga ni sij ga a'. Gahuin ran Yan'anj, ruhua á re' ní'. Sé daj huin mánj. ⁸Ni ataj snan'ān gunun a ni é re' sisi rá'yanj gui'yaj yya Yan'anj nga ni ngüi daj. Sani ngaa ga'na' yünj huinj da'níj ni ngüi, ni ní' si nari'ij ni ngüi xuman ruhua ni'yaj Yan'anj. —Daj gataj Jesús gunun ni sij.

Parábola del fariseo y el publicano

⁹Ngaa ni nani Jesús ango cuento digyán sij rian go'ngo ni tsínj daj. Daj si ani ruhua ni sí' sisi hua nica niman ni sí'. Sani a'mi quij ni sí' xi'i ni ngüi. Ngaa ni gataj Jesús:

¹⁰—Gan'anj huij ran' tsínj daj gatúj nungüej sij chruhua nuhui nico gachinj jni'yaj nungüej sij rian Yan'anj. Ni 'ngo sij daj huin tsínj fariseo. Ni ango sij huin tsínj a'nej pesto.

¹¹Ni niquin' tsínj fariseo daj achínj jni'yaj sij. Ni gataj sij rian Yan'anj: “Hué re' huin Yan'anj. Ni guruhua re' sisi nitaj si huinj daj rún' huin ango ni ngüi. Daj si 'yaj

tü ni sij. Ni 'yaj xi'i ni sij. Ni a'mi ni sij nga nica 'ngo dugüi' ni sij nej. Ni guruhua re' sisi nitaj si 'yā daj rún' 'yaj tsínj a'nej pesto nan mánj. ¹²Huij 'yā ayuno da nan síj semana. Ni a'nē ichi' rian go'ngo ciento daran' si 'yaj ganāj riquij rián re'.” Daj gataj tsínj fariseo daj gunun Yan'anj.

¹³Sani gunáj tsínj a'nej pesto daj gan' niquin' sij. Ni xi'i si na'aj sij a doj nun ga'uej ruhua sij nachi nicaj sij rian sij ni'yaj sij xata'. Maan sij guita ra'a sij xi'yanj sij. Ni gataj sij gunun Yan'anj: “Yan'anj, nahuin 'i ruhua re' ni'yaj re' yünj si huinj 'ngo tsínj 'yaj gaquin'.” Daj gataj tsínj daj.

¹⁴Ni ataj snan'ān gunun a ni é re' sisi ngaa nan' tsínj a'nej pesto daj ducua sij, ni hua guinicaj Yan'anj 'ngo niman nico xi'i si-gaquin' sij. Sani nun guinicaj Yan'anj niman nico xi'i ango tsínj daj. Daj si un tsínj huin ruhua gahuin achij rian dugüi' sij, ni gunaj sij da rucu. Sani un tsínj huin ruhua gunaj da rucu, ni gahuin achij sij. —Daj gataj Jesús rian ni tsínj daj.

Jesús bendice a los niños

¹⁵Ngaa ni nicaj ni yun'unj xana ni tsin' ga'na' ne rian Jesús sisi guta' sí' ra'a sí'. Sani ngaa guini'i ni tsínj nico' Jesús, ni gax'i' ni sij chran' ni sij ni yun'unj xana nicaj ga'na' da aj. ¹⁶Ngaa ni gaquinj Jesús si ga'na' ni tsin' rian sij. Ni gataj sij:

—Ra'a á re' si ga'na' ni tsin' da riánj. Ni si chran' án re' si ga'na' ni tsin' riánj mánj. Daj si rún' huin ni tsin' le nan, ni da'nga' daj huin ni ngüi man rian nicaj sun Yan'anj. ¹⁷Xanga' atā gunun a ni é

re' sisi na'uej ruhua 'ngo tsínj daj si guinicaj sun Yan'anj niman sij daj rún' 'yaj ni tsin', ni si ga'ue gatu sij rian nicaj sun Yan'anj mánj. —Daj gataj Jesús.

El joven rico

¹⁸Ngaa ni nachínj snan'anj 'ngo tsínj a'nin' rian ni ngüi Jesús. Ni gataj sij:

—Maestro sa!. Ni un sun gui'yā, ni ga'ue gane nigān, ruhuá re' únj. —Daj gataj sij gunun Jesús.

¹⁹Ngaa ni gataj Jesús:

—Ni un sin huin ni atáj re' sisi sa! man'ānj únj. Urin Yan'anj huin si sa' nánj. ²⁰Hua ni'í re' ni nuguan' ga'nin' Yan'anj sun rián re': “Si ga'mi re' nga nica dugüi' re' mánj. Ni si dagahuí' re' ngüi mánj. Si gui'yaj tu re' mánj. Si ga'mi re' nuguan' snan'anj xi'í dugüi' re' mánj. Guñun yan'anj re' chréj re' nga nní re' nej.” Nan huin ni nuguan' dagahuín re'. —Daj gataj Jesús gunun sij.

²¹Ngaa ni gataj tsínj daj:

—Daran' ni nuguan' daj ráj xināj asij hua lí. —Daj gataj sij gunun Jesús.

²²Ni ngaa gunun Jesús si gataj sij, ni gataj sí':

—Achín 'ngo nuguan' rián re' rún' huaj. Guđu'ue re' daran' si'yáj re'. Ni san'anj guiri' re' daj ga'ui' re' rian ni ngüi niqui ran'. Hué dan ni guiman nico si'yáj re' xata' gui'yaj Yan'anj anj. Ngaa ni ga'na' re' guinico' re' yünj anj. —Daj gataj Jesús.

²³Sani ngaa gunun tsínj daj si gataj Jesús, ni nani nico ruhua sij. Daj si hua nico san'anj rian sij.

²⁴Ngaa guini'í Jesús si nani nico ruhua sij, ni gataj sí':

—Ni 'í huaj gatu 'ngo tsínj xuru'ue rian nicaj sun Yan'anj anj. ²⁵Ni 'í huaj gatu 'ngo tsínj xuru'ue rian nicaj sun Yan'anj daj nga si gachin 'ngo xucu camello yu'uj taj cúj nuhua aj. —Daj gataj Jesús.

²⁶Ngaa ni nachínj snan'anj ni tsínj gunun si gataj Jesús. Ni gataj ni sij:

—Sisi hué daj huin ni un tsínj ga'ue nacaj man'an sij sisi gatu sij rian nicaj Yan'anj sun únj. —Daj gataj ni sij.

²⁷Ngaa ni gataj Jesús:

—Yan'anj ga'ue gui'yaj si na'ue gui'yaj ni ngüi. —Daj gataj Jesús.

²⁸Ngaa ni gataj Pedro gunun Jesús:

—Hua duna únj daran' si'yaj únj. Ni nico' únj man'án re' aj. —Daj gataj Pedro.

²⁹Hué dan ni gataj Jesús:

—Xanga' atā gunun a ni é re' sisi un tsínj dunáj ducua' sij, nica sij nej, jnánj sij nej, da'níj sij nej, chrej sij nej, nni sij nej, ngaa ni gui'yaj sa' Yan'anj nga tsínj daj ngaa da'nga' daj 'yaj sij xi'í sun nicaj Yan'anj rian né'. ³⁰Ni ni tsínj dunáj daran' ni rasun daj, ni xungüi nan nahuin ra'a sij doj daj nga daran' si dunáj sij. Ni ango xungüi ga'na', ni gane niganj sij nga Yan'anj. —Daj gataj Jesús.

Nuevamente Jesús anuncia su muerte

³¹Ni gaquínj Jesús xuhuij ni tsínj nico' sij. Ni gataj sij:

—Yyaj ni gan'anj né' xuman' Jerusalén. Ni daj rún' garun ni tsínj ga'mi si-nuguan' Yan'anj asij

ná xi'í man'ānj huīnj da'níj ni ngüi, ni da'nga' daj guiran'ānj nánj. ³²Ni naga'ui' ni sij yūnj rian ni tsínj 'na' anéj chrej. Ni ga'mi ducu ni sij xi'íj. Ni ga'mi quij ni sij riānj nej. Ni gara sta'nunj ni sij man'ānj nej. ³³Ni duguayun ni sij nne' xirā. Ni dagahui' ni sij man'ānj nej. Sani xiráj hua'nij güi, ni gana'nī aj. — Daj gataj Jesús.

³⁴Sani nun gunun ni sij si gataj Jesús. Ni nun xacaj cuenta ni sij si ga'mi sí'. Daj si a'mi sí' nuguan' na'ue gara da'nga' ruhua ni sij.

Un ciego de Jericó recibe la vista

³⁵Ni ngaa huaj guisij Jesús nichrun' xuman' Jericó, ni nne 'ngo tsínj duri du'ua chrej 'yaj sij caridad. ³⁶Ni ngaa gunun sij gachin nico ni ngüi, ni nachínj snan'anj sij un sin huin si gahuin. ³⁷Ngaa ni gataj ni tsínj daj sisi Jesús nazareno huin si gachin. ³⁸Ngaa ni gaguáj nucuj sij. Ni gataj sij:

—Jesús, da'níj David huín re'. Nahuin 'i ruhua re' ni'yaj re' yūnj anj. —Daj gataj tsínj duri daj.

³⁹Sani ni ngüi hua ne' rian, ni chran' yun'unj sisi dínj gane du'ua sij. Sani ganari' nucuj sij doj gaguáj sij. Ni gataj sij:

—Da'níj David, nahuin 'i ruhua re' ni'yaj re' yūnj anj. —Daj gaguáj sij.

⁴⁰Ngaa ni guiniquin' Jesús. Ni ga'nin' sij sun sisi nīcaj ni sí' ga'na' ni sí' sij. Ni ngaa gahuin nichrun' sij, ni nachínj snan'anj Jesús sij.

⁴¹Ni gataj sí':

—Ni un sin huin ruhua re' si gui'yā nga re' únj. —Daj gataj Jesús. Ngaa ni gataj tsínj duri daj:

—Señor, huin ruhuāj sisi naxiguin riānj, gui'yáj re' aj. —Gataj tsínj daj.

⁴²Ngaa ni gataj Jesús:

—Hua naxiguin rián re' xi'í si guxuman ruhua re' ni'yáj re' yūnj anj. —Daj gataj Jesús gunun tsínj duri daj.

⁴³Ni 'ngo hora daj naxiguin rian sij. Ni guinico' sij Jesús. Ni ga'mi sa' 'ueé sij rian Yan'anj. Ni daran' ni ngüi guini'i si gui'yaj Jesús, ni ga'mi sa' ni sij rian Yan'anj nej.

Jesús y Zaqueo

19 Ni gatúj Jesús xuman' Jericó. Ni huaj sij gachin sij xuman' daj. ²Ni yu'uj daj nne 'ngo xuru'ue gu'naj Zaqueo. Ni huin sí' 'ngo tsínj a'nin' rian ni tsínj a'nej pesto. ³Ni gahuin ruhua sij guini'i sij Jesús. Sani rian huaj nico ni ngüi nga sí', ni nun ga'ue guini'i sij sí'. Daj si chre' Zaqueo daj. ⁴Xi'í daj ni gunánj sij gan'anj sij da rian si huin ruhua sij guisij sij guini'i sij Jesús. Ni gahui sij chra 'ngo chrun gu'naj sicómoro rian gachin Jesús. ⁵Ni ngaa huaj gachin Jesús yu'uj daj, ni ni'yaj sí' chra chrun xata'. Ni gataj sí':

—Zaqueo, nanij yoo re' si acuan' nan huin si gunā ducua re', ruhuāj aj. —Daj gataj Jesús gunun Zaqueo.

⁶Ngaa ni nanij yoo sij. Ni gahuin niā' ruhua sij si guxuman Jesús ducua sij.

⁷Ni ngaa guini'i ni ngüi si gui'yaj Jesús, ni gaxi'i ni sij ga'mi quij ni sij xi'í Jesús. Ni gataj ni sij:

—Ni un sin huin ni gatúj Jesús ducua 'ngo tsínj 'yaj gaquin' guna sí' únj, ataj ni sij.

⁸Ngaa n̄i naxuman Zaqueo, n̄i gataj sij gunun Señor Jesús:

—N̄i'yaj re' Señor. Yyaj n̄i ga'uij da'aj si'yā rian ni ngüi yaco ran'. N̄i ngaa ga'nej xacānj san'anj rian ni ngüi, n̄i naru'uē yacuan'anj peso chra go'ngo peso ga'nej xacānj anj. —Daj gataj Zaqueo.

⁹Ngaa n̄i gataj Jesús:

—Guisíj Yan'anj 'na' naca ni ducua tsínj nan yyaj. Daj si tsínj nan huin 'ngo da'níj Abraham nej. ¹⁰N̄i ga'na' da'níj ni ngüi huin man'ānj. N̄i 'na' nana'uij ni tsínj ga ni'ya. N̄i ganacā ni sij, ruhuāj aj. —Daj gataj Jesús.

Parábola de las diez minas

¹¹N̄i gunun ni ngüi si gataj Jesús. N̄i hua guisíj sij nichrun' du'ua xuman' Jerusalén. N̄i gani ruhua ni ngüi sisi ga'na' yoo Yan'anj guinica' sun-ún' chruhua xungüi nan guini'i ni sij, ruhua ni sij. Xi'í daj nani Jesús 'ngo cuento digyán sij rian ni sí'. ¹²Ngaa n̄i gataj Jesús:

—N̄i hua 'ngo tsínj huin achij gan'anj 'ngo xuman' ngaj gan' si garij sun ni sij gahuin sí' rey xánj sí'. Da' síj da nanicaj sí' xánj sí', ruhua sí'. ¹³Ngaa n̄i gaquínj tsínj daj ga'na' ichi' ran' tsínj 'yaj sun rian sij. N̄i ga'ui' sij 'ngo san'anj gu'naj mina rian go'ngo ni sí'. N̄i ducu du'uej san'anj gu'naj mina daj. N̄i gataj snan'anj sij gunun ni sí': "Gui'yaj gana á re' nga san'anj nan da nanica." Daj gataj sij. N̄i gan'anj sij.

¹⁴'Sani nun huin xan' ruhua ni tsínj xanj daj ni'yaj ni sí' sij. Xi'í daj ga'níj ni sí' ni tsínj nicaj sun gan'anj gataj snan'anj rian tsínj huin achij daj sisi nun aran' ruhua ni sí' ni'yaj ni sí' sij. N̄i s̄i ga'ue gahuin sij tsínj a'nin' rian ni sij xánj ni sij ga mánj.

¹⁵'Sani ngaa guisíj ganacaj sij sun daj, n̄i nanicaj sij xánj sij. Ngaa nasíj sij xánj sij, n̄i ga'nin' sij sun sisi ga'na' ni tsínj 'yaj sun rian sij huin ni tsínj rian ga'ui' sij san'anj daj. N̄i huin ruhua sij guini'i sij undaj gui'yaj gana go'ngo sí' nga san'anj daj.

¹⁶'Ngaa n̄i gataj tsínj guisíj sini rian sij: "Señor, riquí re' 'ngo san'anj mina riānj. N̄i nga mina daj n̄i gui'yaj ganāj ichi' mina aj." Daj gataj tsínj daj. ¹⁷Ngaa n̄i gataj rey daj gunun sí': "Dugu'naj gui'yáj re'. Huín re' 'ngo tsínj 'yaj sun sa'. N̄i rian hua gacuíj re' nga doj rasun nan, n̄i gahuín re' tsínj a'nin' rian ichi' xuman' gui'yā." Daj gataj tsínj huin achij daj.

¹⁸'Ngaa n̄i ga'na' ango tsínj daj. N̄i gataj sí': "Señor, riquí re' 'ngo san'anj mina riānj. N̄i nga mina daj n̄i gui'yaj ganāj yun'un' mina aj." Daj gataj sí'. ¹⁹N̄i gataj tsínj huin achij daj gunun sí': "Gahuín re' tsínj a'nin' rian un'un' xuman', gui'yā." Daj gataj sij rian ango tsínj daj.

²⁰'Ngaa n̄i guisíj ángo tsínj daj. N̄i gataj sí': "Nan 'na' niqúi si-san'ánj re'. Na'níj sa'āj chruhua 'ngo paño. ²¹Daj si xu'uij ni'yā re' si huín re' 'ngo tsínj huee. N̄i nacáj re' si sé si'yáj re' huin. N̄i rian unun ango tsínj daj can, n̄i hué yu'uj daj rí re' nnaa." Daj gataj tsínj 'yaj sun rian tsínj huin achij daj.

²²'Ngaa n̄i gataj tsínj huin achij gunun tsínj 'yaj sun daj: "N̄i 'ngo moso xi'i huín re'. Si-nuguan' man'án re' ataj sisi da'uí re' gaquin'. Hua guini'í re' sisi huínj 'ngo tsínj huee. N̄i guini'í re' sisi nacā si sé si'yā huin. N̄i guini'í re' sisi ri man'ánj nnaa rian nun gunünj nej.

²³Xi'í daj nì un sin huin nun nicáj re' si-san'ān gan'anj re' banco únj. Ngaa nì ngaa nanicā, nì nacā si-san'ān nga san'anj nūta' chra banco nej únj.” Daj gataj tsínj a'nin' rian moso daj. ²⁴Ngaa nì gataj sij rian ni tsínj niquin' nga sij: “Ga'ne a ni é re' san'anj ra'a sí'. Nì ga'ui' a ni é re' ra'a tsínj guí'yaj gana ichi' mina chra go'ngo mina aj.” Daj gataj sij. ²⁵“Sanì hua nicaj sí' ichi' mina.” Gataj ni tsínj daj. ²⁶Ngaa nì: “Ataj snan'ān gunun a ni é re' sisi tsínj nicaj, nì ga'ui' né' nico rian sij. Nì tsínj nitaj si nicaj, nì nunj si doj nicaj sij, sanì ga'ne né' aj.” Daj gataj tsínj huin achij daj. ²⁷Ngaa nì gataj ruhua' yún sij: “Ni tsínj unun' ngāj huin ni sij ni tsínj na'uej ruhua sisi gahuin achì rian ni sij. Sanì guñicaj ni é re' ni sij ga'na' á re' nan dagahui' ni é re' riānj.” Daj gataj tsínj huin achij daj. —Nì hué daj guisij cuento nani Jesús.

La entrada triunfal en Jerusalén

²⁸Ngaa guisij nani Jesús cuento daj, nì huaj sij guisij sij xuman' Jerusalén. Nì tāj dian sij rian ni tsínj nico' sij. ²⁹Nì huaj sij guisij sij xuman' Betfagé nga xuman' Betania. Nì ngaj nūguan'an nungüej xuman' daj nìchrun' dacan gu'naj Olivos. Nì ga'nìj sij huij tsínj nico' sij gan'anj nungüej sí'. ³⁰Nì gataj sij gunun nungüej sí':

—Gan'anj nungüej é re' xuman' ngaj ne' rian doj aj. Nì ngaa huaj gatu nungüej é re', nì nari' nungüej é re' 'ngo urruj anumi. Nì a 'ngo tsínj nitaj si taj mánj. Hué dan nì nachi nungüej é re' xú' nìcay á re' ga'na' á re' riānj. ³¹Nì sisi hua

tsínj nāchinj snan'anj rian nungüej é re' un sin nì nachi nungüej é re' urruj daj, ngaa nì gataj nungüej é re' gunun sij: “Man'an Señor ní'yanj xuj aj.” Daj gataj Jesús gunun nungüej sij.

³²Ngaa nì gan'anj nungüej sij xuman' daj. Nì nari' nungüej sij urruj daj daj rún' gataj snan'anj Jesús gunun nungüej sij. ³³Nì ngaa nachi nungüej sij urruj, nì gataj ni tsínj dan xucu daj rian nungüej sij: —Nì un sin huin nì nachi nungüej é re' urruj daj únj. —Daj gataj ni sí'.

³⁴Ngaa nì gataj nungüej sij: —Ní'yanj Señor xuj. —Daj gataj nungüej sij.

³⁵Hué dan nì nicaj nungüej sij urruj ga'na' nungüej sij rian Jesús. Nì guta' nungüej sij si-gan' nungüej sij xirāj urruj. Ngaa nì guitāj Jesús xuj, guí'yaj nungüej sij. ³⁶Nì gurúj ni ngüi si-gan' ni sij chruhua chrej ne' huaj Jesús. ³⁷Nì ngaa huaj gahuin nìchrun' ni sij guisij ni sij dacuj dacan Olivos, nì gaxì'i gahuin niā' ruhua daran' ni tsínj nico' Jesús xi'í daran' si sa' guini'i ni sij, guí'yaj Jesús. Nì gaguáj ni sij. Nì ga'mi sa' ni sij rian Yan'anj nej. ³⁸Nì gataj ni sij:

—Hua 'ueé rian rey 'nā' nga si-xugüi man'an Señor. Gahuin din'inj ni si mán xata'. Nì ga sa' 'ueé xata' aj. —Daj gaguáj ni sij xi'í Jesús.

³⁹Ngaa nì gataj go'ngo ni tsínj fariseo man scanij ni ngüi gunun Jesús:

—Maestro, gataj re' rian ni tsínj nicó' re' sisi dínj guñiquin' du'ua ni sij. —Daj gataj ni sí'.

⁴⁰Sanì gataj Jesús:

—Sisi dínj guñiquin' du'ua ni sij, nì gaguaj ni yej ngaj rian yo'ój aj. —Daj gataj Jesús.

⁴¹Ni ngaa huaj guisíj Jesús nichrun' xuman' Jerusalén, ni guini'i sij xuman' daj. Ni gaco sij xi'l' xuman' daj. ⁴²Ni gataj sij: —Maan si huin ruhuāj sisi guini'i ni é re' yyaj daj gui'yaj á re', ngaa ni gahuin din'inj rian án re' aj. Sani hua ránj rian án re', ni na'ue gara da'nga' ruhua á re' mánj. ⁴³Ni guisij 'ngo güi, ni guiran' án re' sayun. Daj si ga'na' ni tsínj unun' nga á re'. Ni gui'yaj ni sij 'ngo xingá ganicaj nin' xi'níj ni é re'. Ni si ga'ue gahui ni é re' mánj. ⁴⁴Ni duguane ni sij daran' ni hue' man xánj án re'. Ni dagahui' ni sij ni ngüi nej. Ni ni a 'ngo yej si dunáj ni sij rian dugüi' ni yej ga mánj. Hué daj guiran' ni é re' si nun xacaj á re' cuenta ngaa ga'na' Yan'anj ganacaj á re' mánj. —Daj gataj Jesús rian ni ngüi man xuman' Jerusalén.

Purificación del templo

⁴⁵Hué daj síj ni gatúj Jesús chruhua nuhui nico. Ni gaxi'i sij guiri sij ne' chrej xe' ni tsínj du'uej rasun mán yu'uj daj. ⁴⁶Ni gataj sij: —Gataj si-nuguan' Yan'anj: “Ducuāj huin rian gachinj jni'yaj ni ngüi rian Yan'anj anj. Sani nuhui nan gahuin 'ngo huej man ni tsínj tu, 'yaj á re' aj.” Daj gataj si-nuguan' Yan'anj. —Daj gataj Jesús. ⁴⁷Ni daran' ni güi digyán Jesús rian ni ngüi chruhua nuhui daj. Sani ni chrej a'nin' nga ni tsínj digyán ley nga ni tsínj huin achij chruhua xuman' daj, ni nana'ui' ni sij daj dagahui' ni sij Jesús. ⁴⁸Sani nun ri' ruhua ni sij daj gui'yaj ni sij si gahui' Jesús. Daj si daran' ni ngüi mán unun sa' daj digyán Jesús rian ni sij.

La autoridad de Jesús

20 Ni 'ngo güi ngaa nne Jesús chruhua nuhui nico, ni digyán sij rian ni ngüi. Ni ga'mi sij nuguan' sa' rian ni sij. Ngaa ni guisíj ni chrej a'nin' nga ni tsínj digyán ley nej, ni tsínj huin achij nej. ²Ngaa ni gataj ni sij gunun Jesús:

—Gataj re' gunun únj un sun huin sun nicáj re', ni 'yáj re' nan únj. Ni un tsínj riqui sun, ni 'yáj re' nan únj. —Daj gataj ni sij.

³Ngaa ni gataj Jesús gunun ni sij: —Hué daj ruhuāj ganachin' snan'an 'ngo nuguan' da man'an án re'. Ni gataj á re' riānj, ruhuāj aj. ⁴Ni un tsínj ga'níj sun rian tsínj gu'naj Juan sisi gata' nnee sí' ni ngüi únj. Yan'anj gataj rian sij ní'. Asi hua ango tsínj gataj rian sij sa'. —Daj gataj Jesús.

⁵Ngaa ni gani guitsi ruhua ni dugüi' ni sij. Ni gataj ni sij: —Sisi gataj né' sisi Yan'anj ga'nin' sun rian Juan, ngaa ni gataj Jesús gunun né': “Ni un sin huin nun guxuman ruhua á re' ni'yaj á re' man'an sij únj.” ⁶Ni sisi gataj né' sisi ni tsínj ga'níj ga'na' Juan, sani ga'ui' daran' ni ngüi yej yun'. Daj si hua nica ruhua daran' ni ngüi mán nan sisi Juan gahuin 'ngo tsínj ga'mi si-nuguan' Yan'anj anj. —Daj gataj ni sij gani guitsi ruhua ni dugüi' ni sij.

⁷Ngaa ni gataj ni sij gunun Jesús sisi nun guini'i ni sij un tsínj ga'nin' sun rian Juan gata' nnee sí' ni ngüi aj.

⁸Ngaa ni gataj Jesús:

—Ngaa ni si gatā gunun a ni é re' un sin huin sun 'ya aj. —Daj gataj Jesús.

Los labradores malvados

⁹Ngaa n̄i gaxi'i Jesús nani sij 'ngo cuento digyán sij rian ni ngüi. N̄i gataj sij:

—Hua 'ngo xuru'ue gunun coj uva. Ngaa n̄i naga'ui' sij si-coj sij coj chruj uva rian go'ngo ni tsínj daj sisi dugumi ni sí' si'yaj sij. N̄i gahui sij gan'anj sij gan' ga'i yahui. ¹⁰N̄i ngaa guisíj güi gane uva daj, n̄i ga'níj sij si-moso sij gan'anj gachinj sí' rian ni tsínj mán 'yaj sun daj chruj si huin si'yaj sij. Sani ga'ui' ni sí' chrun tsínj daj. N̄i na'níj ni sí' nan' yun sij. ¹¹Hué dan n̄i ga'níj ruhua' yún tsínj do'oj daj ango si-moso sij. Sani ga'ui' ni tsínj daj sí' nej. N̄i gui'yaj quij ni sij nga sí'. N̄i na'níj ni sij nan' yun sí' nej. ¹²Ngaa n̄i ga'níj ruhua' yún tsínj do'oj daj ango si-moso sij. Sani guiran' xi'i sí', gui'yaj ni sij. N̄i guiri ni sij sí' ne' chrej xe' rian man coj uva daj.

¹³Ngaa n̄i gataj xuru'ue daj gunun man'an sij: “N̄i un sin gui'yā únj. Ga'ní da'ní 'i ruhuāj gan'anj. Ga ní'yanj ni sij nga man'an da'ní aj.” Daj gataj xuru'ue daj gunun man'an sij. N̄i ga'níj sij da'níj sij gan'anj sí'. ¹⁴Sani ngaa guini'i ni tsínj daj da'níj sij, n̄i gataj ni sij gunun ni dugüi' ni sij: “Tsínj nan gunánj do'ój chrej sij si sa' gahui' chrej sij. Dagahui' né' tsínj nan, ngaa n̄i gūna né' gahuin do'ój né' nan anj.” Daj gataj ni sij. ¹⁵Ngaa n̄i guere'ej ni sij sí' chrej xe' du'ua rian man coj uva daj. N̄i dagahui' ni sij sí'. Hué dan n̄i daj gui'yaj tsínj do'oj daj nga ni tsínj dugumi daj, ruhua ni é re' únj. ¹⁶Ga'na' sij rian ngaj do'ój sij. N̄i dagahui' sij ni tsínj 'yaj sun daj.

Ngaa n̄i naga'ui' sij coj chruj uva daj huin si-coj sij rian ango ni tsínj sisi dugumi ni sí' si'yaj sij. —Daj gataj Jesús gunun ni ngüi.

N̄i ngaa gunun ni ngüi nuguan' daj, n̄i gataj ni sij:

—Sé daj huin ruhua únj si gui'yaj Yan'anj mánj. —Daj gataj ni sij.

¹⁷Sani guini'yaj Jesús rian ni sij. N̄i gachínj snan'anj sí' ni sij gataj sí':

—Un sin huin n̄i garun ni sij nuguan' nan asij ná, ruhua á re' únj: Yej guere'ej ni tsínj 'yaj sun hue', gahuin-ín' 'ngo yej sa' doj gane, n̄i ran-án' dugu'nun' squina hue' niganj nin' anj.

Da'nga' daj garun ni sij rian libro huin si-nuguan' Yan'anj. ¹⁸N̄i huéj huin yej daj. N̄i sisi ganatu 'ngo ngüi rian yej daj, n̄i garan' ni sij, gui'yā. N̄i sisi guinij yej daj rian 'ngo ni ngüi, n̄i guixitin' ni sij, gui'yā. — Daj gataj Jesús gunun ni sij.

La cuestión del tributo

¹⁹Ngaa n̄i hué gue hora daj huin ruhua ni chrej huin achij nga ni tsínj digyán ley guida'a ni sij Jesús. Daj si xacaj ni sij cuenta sisi nuna Jesús cuento daj xi'f man'an ni sij. Sani xu'ui' ni sij rian ni ngüi.

²⁰Ngaa n̄i ni'yaj ni sij Jesús. N̄i ga'níj ni sij ni tsínj gan'anj naga'naj. N̄i gui'yaj ni sí' sisi tsínj 'yaj n̄ica huin ni sí'. Daj si huin ruhua ni sí' sisi gache ga'mi Jesús. Ngaa n̄i ga'ue naga'ui' ni sí' Jesús rian gobernado, ruhua ni sij. ²¹Ngaa n̄i gachínj snan'anj ni tsínj digya' yun'unj daj Jesús. N̄i gataj ni sij:

—Maestro, ni'i ni únj sisi a'mí re' nuguan' n̄ica. N̄i xanga' digyán

nica re' rian ni ngüi nej. Ni nitaj si gui'yaj re' sisi tsínj huin rian, asi tsínj ga niqui huin 'ngo tsínj daj. Ni digyán xanga' re' sisi daj gui'yaj né' guinico' né' Yan'anj. ²²Ngaa ni: Sa' huin sisi ga'ui' né' san'anj a'nej rey César, ruhua re' ní'. Ga'ui' né' ní'. Asi si ga'ui' né' sa'. —Daj gataj ni sij gunun Jesús.

²³Sani xacaj Jesús cuenta sisi ani quij ruhua ni sij. Ngaa ni gataj sí' gunun ni sij:

—Ni un sin huin ni huin ruhua á re' gui'yaj re' xi' ngáj únj.

²⁴Digyán án re' 'ngo san'anj denario riānj. Ni un tsínj rian nun rian san'anj nan únj. Ni un tsínj si-xugüi nun rian san'anj nan únj. —Daj gataj Jesús gunun ni sij. Ngaa ni:

—Hué César huin. —Gataj ni sij.

²⁵Hué dan ni gataj Jesús:

—Ngaa ni ga'ui' a ni é re' si'yaj rey César rian sij. Ni ga'ui' ni é re' si'yaj Yan'anj rian Yan'anj anj. —Daj gataj Jesús.

²⁶Ngaa ni nun ga'ue gui'yaj ni sij sisi gache ruhua Jesús ga'mi sí' rian ni ngüi. Sani garáj yan'anj ruhua ni sij nga nuguan' gataj Jesús gunun ni sij. Ni dínj ganiquin' du'ua ni sij.

La pregunta sobre la resurrección

²⁷Hué dan ni guisj go'ngo ni tsínj saduceo rian nne Jesús. Ni ni tsínj saduceo daj ataj sisi nitaj si gana'nij ni níman mánj. ²⁸Ni nachínj snan'anj ni sij Jesús. Ni gataj ni sij:

—Maestro, garun Moisés nuguan' gunun né'. Ni gataj si-nuguan' sí' sisi gahui' 'ngo tsínj hua nica, ni nitaj da'nij sij nga nica sij, ngaa ni nacaj jnánj tsínj gahui' daj nica níman

daj. Da'nga' daj gui'yaj sij ga'ui' sij si ga'nga lij nagane-é' yan du'ua chrej-é'. Daj gataj Moisés. ²⁹Ni hua ichij jnanj 'ngo tsínj daj. Ni xacaj tsínj xahua' nica sij. Ni gahui' sij. Ni nitaj da'nij sij nga ún' mánj.

³⁰Ni nacaj ango jnánj sij tsínj ga'na' rian man'an sij nica sij. Ni hué daj gahui' sí'. ³¹Ni hué dan nan guiran' ango jnánj sij síj hua'nij jnanj sij aj. Ni hué daj guiran' ichij jnanj sij. Ni a 'ngo lij nun ga'nga, gui'yaj ni sij nga yun'unj xana daj. Ni gahui' daran' ni sij. ³²Da' guisj daj gahui' man'an yun'unj xana da nej. ³³Hué dan ni ngaa gana'nij ni níman ngaa guiman ruhua' yún ichij jnánj sij, ni daj hua yya tsínj gahuin nica yun'unj xana daj, ruhua re' únj. Daran' ni sij xacaj ún' nánj. —Da'nga' daj gataj ni tsínj saduceo gunun Jesús.

³⁴Ngaa ni gataj Jesús gunun ni sij: —Ni tsínj man xungüi nan, ni acaj ni sij ni ngüi xana. Ni hué daj hua nica ni ngüi xana nej. ³⁵Sani nini gui'yaj ni ngüi guiman xungüi naca. Ni gana'nij ni sij gane ni sij xata' xi' si ni' Yan'anj sisi hua nica niman ni sij. Ni ngaa gane ni sij xata', ni si xacaj ni tsínj ni yun'unj xana mánj. Ni si ga nica ni yun'unj xana mánj. ³⁶Daj si si ga'ue gahui' ni ngüi xata' mánj. Ni uyan huin ni sij nga ni ángel. Ni huin ni sij da'nij Yan'anj xi' si ganá'nij ni sij scanij ni níman.

³⁷Ni garun Moisés xi' 'ngo coj anun. Ni xi' daj digyán sij sisi gana'nij xanga' ni níman. Daj si a'mi sij sisi Señor huin Dan'anj tsínj gu'naj Abraham nga tsínj gu'naj Isaac nga tsínj gu'naj Jacob nej.

³⁸Hué dan n̄ sé níman huin ni tsínj guinico' Yan'an̄j asij ná mánj. Hua n̄'na' ni sij nánj. Daj si hua n̄'na' daran' ni ngüi rian Yan'an̄j. —Daj gataj Jesús.

³⁹O Ngaa n̄ gataj go'ngo ni tsínj digyán ley gunun Jesús:

—Maestro, dugu'naj huaj gatáj re'.

—Daj gataj ni sij.

⁴⁰N̄i nun guisij ruhua ni sij gachinj snan'an̄j ni sij rian Jesús ga mánj.

¿De quién es hijo el Cristo?

⁴¹Ngaa n̄ gataj Jesús gunun ni sij:

—N̄i un sin huin n̄i ataj ni sij sisi

Cristo huin da'n̄j xí' David únj.

⁴²⁻⁴³Daj si gataj David rian libro gu'naj Salmos: “Yan'an̄j gataj gunun Señor nicaj sun riánj sisi gane sí' chrej ra'a sa' Yan'an̄j da' guisij gui'yaj gana Yan'an̄j rian ni tsínj unun' nga Señor nicaj sun riánj.”

Daj gataj Yan'an̄j gunun Señor.

Gataj xí' David. ⁴⁴Ngaa n̄i asa' ga'ue gahuin Cristo da'n̄j David sisi dugu'naj sí' Señor man'an̄j Cristo únj. —Daj gataj Jesús.

Jesús acusa a los escribas

⁴⁵Ngaa n̄i gataj Jesús gunun ni tsínj nico' sij. N̄i gunun daran' ni ngüi daj gataj sij:

⁴⁶—Gagudadu a ni é re' sisi si gui'yaj á re' daj rún' 'yaj ni tsínj digyán ley. Daj si niá' ruhua ni sij gache ni sij nga atsij xacan nun ni sij huin si-gan' ni tsínj huin achij. N̄i huin ruhua ni sij sisi ga'mi sa' ni ngüi nga ni sij ngaa achéj ni sij rian yu'ue. N̄i nana'ui' ni sij 'ngo chrun xila sa' doj gane ni sij chruhua nuhui. N̄i nana'ui' ni sij 'ngo yu'uj

sa' gane ni sij rian 'yaj ni sij 'ngo gui'yaj. ⁴⁷N̄i a'nej ni sij ducua yun'unj xana mmij. N̄i achínj jni'yaj ná ni sij rian Yan'an̄j sisi sa' 'yaj ni sij gani ruhua ni ngüi, ruhua ni sij. Xacan guiran' ni sij castigo, gui'yaj Yan'an̄j. —Daj gataj Jesús gunun ni sij.

La ofrenda de la viuda

21 Ngaa n̄i ni'yaj Jesús sisi daj a'n̄j ni xuru'ue san'an̄j ofrenda chruhua chrúnj. ²N̄i hué daj guini'i sij sisi ga'n̄j 'ngo yun'unj niqui mmij huij san'an̄j niqui chruhua chrúnj nej. ³Ngaa n̄i gataj sij:

—Xanga' ataj snan'an̄j gunun a ni é re' sisi yun'unj xana niqui nan, sani a'n̄j nico ún' doj san'an̄j daj nga daran' ni sij. ⁴Daran' ni ngüi nan a'ui' san'an̄j gunáj rian ni sij. Sani yun'unj niqui mmij nan a'ui' ún' daran' san'an̄j nicaj ún' san'an̄j guiran ún' si xa ún' nánj. —Daj gataj Jesús gunun ni sij.

Jesús predice la destrucción del templo

⁵Hué dan n̄i ga'mi go'ngo ni tsínj daj sisi 'ueé hua nuhui. Daj si nne yej niá'. N̄i xacan ga'ui' ni ngüi ofrenda, ngaa n̄i ga'ue gahuin niá' nuhui daj.

⁶Ngaa n̄i gataj Jesús gunun ni sij:

—N̄i'yaj á re' nuhui xachij nan. Sani hua 'ngo güi, n̄i si gunáj n̄i a 'ngo yej rian dugüi' mánj. Duguane n̄in' ni sij nuhui nan anj. —Daj gataj Jesús gunun ni sij.

Señales antes del fin

⁷Ngaa n̄i nachínj snan'an̄j ni sij Jesús. N̄i gataj ni sij:

—Maestro, un güi gahuin yya ni nuguan' nan únj. Ni un da'nga' daj hua 'ngo ga'na' guini'i únj, ngaa ni gahuin daran' nuguan' nan únj. — Daj gataj ni sij gunun Jesús.

⁸Ngaa ni gataj Jesús:

—Ga cuidado ni é re' sisi nitaj 'ngo tsínj digya' yun'unj ni é re'. Daj si ga'na' nico ni tsínj rian si-xugüi man'anj. Ni gataj ni sij: “Hué man'anj huin Cristo aj.” Ni: “Yyaj guisij güi ga'na' Señor.” Gataj ni sij. Sani si guinico' ni é re' ni tsínj da mánj.

⁹Ni ngaa gunun a ni é re' nuguan' sisi hua guerra, ni sisi unun' ni ngüi nga gobierno, ngaa ni si guxu'ui' ni é re' mánj. Hua nian si hué daj gahuin sini. Sani achin ganahuij rá'yanj xungüi ga aj. —Daj gataj Jesús.

¹⁰Ni gataj ruhua' yún Jesús:

—Gunun' ni ngüi man 'ngo xuman' nico nga ni ngüi man ango xuman' nico. Ni gunun' 'ngo gobierno daj nga ango gobierno ga'i yu'uj. ¹¹Ni ga'na' yún nucaj. Ni ga xi'na nej. Ni ga'na' xi'i rian go'ngo xungüi nej. Ni guxu'ui' ni ngüi xi'i si guini'i ni sij da'nga' xxi xata'.

¹²Sani hua sini ngaa nun güin gahuin ni nuguan' nan, ni güida'a ni sij a ni é re'. Ni chran' yun'unj ni sij ni é re'. Ni naga'ui' ni sij ni é re' rian tsínj man chruhua nuhui nico nga rian ducuaga' nej. Ni nıcaj ni sij ni é re' gan'anj ni sij rian ni rey nga rian ni gobernado xi'i si nico' ni é re' man'anj. ¹³Ngaa ni ga'ue ga'mi a ni é re' nuguan' sa' xi'ij rian ni tsínj daj. ¹⁴Ni si gani sini ruhua á re' daj ga'mi ni é re' rian ni sij mánj. ¹⁵Daj si riquij nuguan' ga'mi

ni é re'. Ni riquij si gahuin chrún ni é re' ngaa ga'mi ni é re'. Hué dan ni si ga'ue nanicaj ni tsínj unun' nga ni é re' ga'mi ni sij mánj. Daj si si gahuin nucaj ni sij guiri ruhua ni sij si gataj ni sij gunun a ni é re' mánj. ¹⁶Ni naga'ui' da chrej ni é re' man'an ni é re' rian tsínj nicaj sun. Ni hué daj guı'ıyaj jnánj ni é re' nga dugüi' ni é re' nej, ni tsínj nicaj dugüi' nga ni é re' nej. Ni dagahui' ni sij da'aj á re'. ¹⁷Ni si gahuin sa' ruhua daran' ni ngüi niı'ıyaj ni sij ni é re' xi'i si nicaj dugüi' ni é re' ngáj. ¹⁸Sani ni a 'ngo hué chra ni é re' si ga ni'ya mánj. ¹⁹Xi'i si nico' ran ni é re' man'anj, ni ga'ue gane niganj ni é re' nga Yan'anj.

²⁰Sani ngaa guini'i a ni é re' si ganıcaj ni snado du'ua xuman' Jerusalén, ngaa ni xacaj á re' cuenta sisi guere' rá'yanj xuman' daj. ²¹Hué dan ni ngaa guini'i ni é re' daj, ngaa ni gunánj ni ngüi mán estado Judea gan'anj ni sij riqui quij. Ni gahui ni ngüi man chruhua xuman' daj gan'anj ni sij. Ni ni ngüi man riqui quij, ni si gatuj ni sij chruhua xuman' da mánj. ²²Daj si hué ni güi daj, ni guı'ıyaj Yan'anj castigo ni ngüi sisi gahuin yya daj rún' hua nıca rian si-nuguan' Yan'anj. ²³Ni nıqui nıman ni ngüi xana nun riqui nga ni ngüi xana utsi gue da'nıj si gahuin ni güi daj. Daj si guıran' ni ngüi man chruhua xungüi nico sayun. Ni ga'man ruhua Yan'anj ni'ya ni ngüi man xuman' nan. ²⁴Ni gahui' ga'i ni sij, guı'ıyaj espada. Ni gunumi ni sı' ango ni sij. Ni nıcaj ni sı' ni sij gan'anj ni sı' nın' gachra' chruhua xungüi. Ni guı'ıyaj quij ni tsínj 'na'

anéj chrej nga xuman' Jerusalén. Ni hué daj gui'yaj ni sij da guisij güi ga'ne Yan'anj sun ra'a ni sij.

La venida del Hijo del Hombre

²⁵Ni guini'i ni ngüi da'nga' rian güi nga rian yahui nej, rian ni yati' nej. Ni ducu guxu'ui' ni ngüi man chruhua xungüi. Ni nun guiri' ruhua ni sij si gui'yaj ni sij. Daj si gunun ni sij si garin gui'yaj nnee yan'anj. Ni hué daj garin si naxuman nnee yan'anj, gui'yaj nane. ²⁶Ni gahuin nichre ni tsínj xi'í si ducu guxu'ui' ni sij. Ni da'nga' daj gahuin xi'í si nun ni'i ni sij daj hua sayun ga'na' xungüi nan. Daj si nagunanj ni fuerza man xata'. ²⁷Asíj ni guini'i ni ngüi ga'na' man'anj rian nga huinj da'nj ni ngüi. Ni ga'naj nga daran' fuerza. Ni nahuin 'ueé nin'inj ga'naj nej aj. ²⁸Ngaa ni ngaa hué daj gaxi'i gahuin, ni duguachre rian an re'. Ni nachica ni é re' chra ni é re' nej. Daj si gahuin nichrun' güi nacaj Yan'anj ni é re'.

²⁹Ngaa ni nani Jesús 'ngo cuento digyan sij rian ni sí'. Ni gataj sij: —Ni'yaj á re' daj 'yaj chrun higuero nga daran' ni chrun. ³⁰Ni ngaa naxira' ra'a coj ni'yaj á re', ni ni'i a ni é re' sisi hua gahuin nichrun' yahui gahuin yan'an anj. ³¹Ni hué gue ducuanj daj ngaa guini'i a ni é re' sisi hua gahuin yya daran' nuguan' nan, ngaa ni guini'i ni é re' sisi rá'yanj ga'na' guinicaj sun Yan'anj rian an re'. ³²Xanga' atā gunun a ni é re' sisi si gahui' ni ngüi man yyaj da gahuin yya daran' ni nuguan' nan anj. ³³Ga ni'ya xata' nga yo'ój. Sanj si-nuguan'anj nitaj aman ganahuij manj.

³⁴Ni ga cuidado ni é re' nga man'an an re' sisi si xa nasa' ni é re'. Ni si ga xini ni é re'. Ni si gahuin ruhua á re' nga ni rasun man chruhua xungüi nan manj. Daj si sisi da'nga' daj gui'yaj ni é re', ngaa ni 'ngo hora ga'na' güi ga'na' man'anj. ³⁵Daj si daj rún' na'man xe', ni da'nga' daj ga'na' güi daj rian daran' ni ngüi man chruhua xungüi nan. ³⁶Ngaa ni 'ngo ni'yaj á re'. Ni niganj gachinj jni'yaj á re' rian Yan'anj. Ngaa ni ga'ue gataj Yan'anj sisi si guiran' ni é re' sayun daj. Ni ga'ue ganiquin' a ni é re' rian da'nj ni ngüi huin man'anj. —Daj gataj Jesús gunun ni sij.

³⁷Ni ne' guni'yanj digyan Jesús chruhua nuhui nico. Ngaa ni ne' ni, ni gahui sij xuman' daj gan'anj gunaj sij dacan gu'naj Olivos. ³⁸Ni hua nigan' acuan', ni gan'anj daran' ni ngüi nuhui sisi gunun ni sí' si gataj sij.

El complot para matar a Jesús

22 Ngaa ni 'na' gahuin nichrun' gahuin gui'yanj ngaa xa ni sij chrachrúnj nitaj si nachrej levadura. Ni pascua gu'naj gui'yanj daj. ²Ni nano' ni chrej a'nin' nga ni tsínj digyan ley sisi daj dagahui' ni sij Jesús. Daj si xu'ui' ni sij rian ni ngüi.

³Ngaa ni gatúj sichre Satanás chruhua niman tsínj gu'naj Judas gu'naj sí' Iscariote. Ni huin sij 'ngo ni xuhuij ni tsínj nico' Jesús. ⁴Ni gan'anj sij ga'mi sij nga ni chrej a'nin' nga ni snado huin achij rian ni snado dugumi nuhui sisi daj gui'yaj sij naga'ui' sij Jesús rian ni sí'. ⁵Ngaa ni gahuin ni' ruhua ni

tsínj daj. Ní gataj ni sij sisi ga'ui' ni sij san'anj rian Judas. ⁶Ngaa ní garáj xina Judas. Ní nano' sij hora sa' ga'ue naga'ui' sij Jesús rian ni sí' ngaa nitaj ni ngüi mán.

Institución de la Cena del Señor

⁷Ngaa ní guisíj güi gahuin gui'yanj ngaa gui'yaj ni sij chrachrúnj nitaj si 'nij levadura xa ni sij. Ní hua nian dagahui' ni sij xachij 'nij xi'í pascua gui'yanj daj. ⁸Ní ga'níj Jesús gan'anj Pedro nga Juan. Ní gataj sij gunun nungüej sí': —Gan'anj gui'yaj xugüi nungüej é re' si xa né' güenda pascua aj. —Daj gataj Jesús.

⁹Ngaa ní gataj nungüej sij: —Ní a gui'yaj xugüi nungüej únj si xa né' únj. —Daj gataj nungüej sij.

¹⁰Ní gataj Jesús: —Ngaa gatu nungüej é re' xuman', ní nari' dugüi' nungüej é re' nga 'ngo tsínj ata cucuaj nun nnee chruhua. Ní guínico' nungüej é re' tsínj daj gan'anj gatu nungüej é re' hue' gatu sí'. ¹¹Ní gataj nungüej é re' gunun tsínj ducua daj: “Nachínj snan'anj Maestro man'án re' un cuarto huin xa sti'ní sij pascua nga ni tsínj nico' sij únj.” Daj gataj nungüej é re' gunun tsínj ducua daj. ¹²Ngaa ní gan'anj digyán sí' 'ngo cuarto xachij xata' niquin' mesa nga chrun xila chruhua cuarto daj. Ní yu'uj daj gui'yaj xugüi nungüej é re' xa sti'ní né'. —Daj gataj Jesús gunun nungüej sij.

¹³Ngaa ní gan'anj nungüej sij. Ní nari' nungüej sij daj rún' gataj Jesús gunun nungüej sij. Ní gui'yaj xugüi nungüej sij si xa sti'ní ni sij xi'í gui'yanj pascua. ¹⁴Ní ngaa guisíj

hora daj, ní gane Jesús nga ni tsínj nico' sij rian mesa huin ni tsínj gan'anj ga'mi si-nuguan' sij rian ni ngüi. ¹⁵Ní gataj Jesús gunun ni sij: —Nín' ruhua gahuin ruhuāj xa sti'nij xi'í gui'yanj pascua nga á re' ngaa achin guiran'anj sayun. ¹⁶Daj si ataj snan'an gunun a ni é re' sisi si xa yünj xi'í gui'yanj pascua nga á re' da gahuin gui'yanj pascua naca rian nicaj sun Yan'anj. —Daj gataj Jesús gunun ni sij.

¹⁷Ngaa ní guida'a sij tasa. Ní naga'ui' sij si guruhua Yan'anj. Ngaa ní gataj sij gunun ni sí': —Guida'a á re' tasa nan. Ní da'nga' á re' go'o dugüi' a ni é re' aj. ¹⁸Ní ataj snan'an gunun a ni é re' sisi si go'oj ruhua' yünj nnee uva nan da ga'na' guínica' sun Yan'anj rian án re'. —Daj gataj Jesús.

¹⁹Ngaa ní guida'a sij chrachrúnj. Ní naga'ui' sij si guruhua Yan'anj. Ngaa ní gura' da'aj sij. Ní ga'ui' sij xa ni sí'. Ní gataj sij gunun ni sí': —Chrachrúnj nan huin nnee cü aj. Ní gahuíj xi'í si-gaquin' a ni é re'. Ní xa ni é re' chrachrúnj nan sisi nānun ruhua á re' ni'yaj á re' man'anj. —Daj gataj Jesús.

²⁰Ní ngaa ganahuij gahuin sti'ní ni sij, ní guida'a Jesús tasa daj rún' guida'a sij chrachrúnj. Ngaa ní gataj sij gunun ni sí':

—Hué nnee uva nan huin nuguan' nagui'yaj naca yya Yan'anj nga á re'. Ní gayanj si-tun man'anj xi'í si-gaquin' a ni é re'.

²¹Saní ni'yaj á re' sisi taj ra'a tsínj naga'ui' man'anj rian ni tsínj nicaj sun rian mesa ngāj. ²²Ní daj rún' ani ruhua Yan'anj, ní da'nga' daj guiran'anj sayun huinj da'níj ni

ngüi. Sanı niqui niman nın' ruhua tsínj naga'ui' man'anj rian ni tsínj nicaj sun. Daj si gahuin nico castigo guıran' sij. —Daj gataj Jesús gunun ni sij.

²³Ngaa nı gaxi'i ni sij nachínj snan'anj ni sij go'ngo ni dugüi' ni sij sisi un tsínj gui'yaj daj, ruhua ni sij.

La grandeza en el servicio

²⁴Nı gani guitsi ruhua ni dugüi' ni man'an ni sij sisi daj hua tsínj gahuin achij scanij ni sij, ruhua ni sij. ²⁵Ngaa nı gataj Jesús gunun ni sij:

—Ni rey nicaj sun rian ni tsínj 'na' anéj chrej, nı ducu a'nin' ni sij sun rian ni tsínj daj. Nı ataj ni rey daj sisi dugu'naj 'yaj ni sij rian ni ngüi. ²⁶Sanı si gui'yaj á re' da mánj. Sisi hua 'ngo tsínj huin achij scanij ni é re', nı da'ui sij gui'yaj sij si hua lij sij. Nı sisi hua 'ngo tsínj a'nin' sun scanij a ni é re', nı da'ui sij gui'yaj sun sij rian ni dugüi' sij. ²⁷Nı un tsínj huin achij ruhua á re' únj. Tsínj nne rian mesa ní'. Ası tsínj 'yaj sun rian tsínj nne rian mesa sa'. Sé tsínj nne rian mesa daj huin ruhuá re' a'. Sanı yünj huin si niquin' 'yaj sun rian án re' aj.

²⁸Sanı hué man'an án re' huin ni tsínj guinicaj dugüi' ngáj ngaa guıran'anj sayun. ²⁹Ngaa nı daj rún' riqui chré nicaj sünj, nı da'nga' daj rıquıj guınicaj sun a ni é re' ngáj nej aj. ³⁰Ngaa nı xa á re' go'o a ni é re' rian si-mesáj ngaa guınicaj sünj xungüi ga'na'. Nı gane a ni é re' rian chrun xila sa' guınicaj sun a ni é re'. Nı nagui'yaj yya á re' rian xuhuij ni xi'nin' ni tsínj israelita. —Daj gataj Jesús gunun ni tsínj nico' sij.

Jesús anuncia la negación de Pedro

³¹Ngaa nı gataj Señor Jesús gunun Simón Pedro:

—Simón, Simón, gunún re' nuguan' ga'mı rián re'. Daj si gachínj sichre Satanás permiso sisi chrán' yun'unj sij a ni é re' daj rún' 'yaj 'ngo tsínj nagunan' strigo sisi gahui yaco riqui strigo daj. Da'nga' daj huin ruhua sichre Satanás. ³²Sanı gachínj jni'yā rian Yan'anj xi'ı re' sisi si ga'nin' ruhuá re' si guxuman ruhuá re' ni'yaj re' man'anj mánj. Nı ngaa nanico' re' man'anj, nı chracuij re' ni jnánj re' sisi gahuin nıca ruhua ni sij aj. —Daj gataj Jesús gunun Simón Pedro.

³³Ngaa nı gataj Pedro gunun Jesús: —Señor, hua ruhuáj gan'ān nga re' ducuaga'. Nı da'nga' daj hua ruhuáj gahuij nga re' nej. —Daj gataj Pedro gunun Jesús.

³⁴Ngaa nı gataj Jesús: —Pedro, atā gunún re' sisi asij nun gaguaj do'loj du'ua xı' yan' nan, nı gataj re' huaj'nij sisi nun ni'ı re' man'anj. —Daj gataj Jesús.

Bolsa, alforja y espada

³⁵Ngaa nı nachínj snan'anj Jesús ni tsínj nico' sij. Nı gataj sij:

—Nı ngaa ga'nı gan'anj án re', nı nitaj si nicaj á re' nnánj nga nniij nun san'anj nej, canj nej, gan'anj án re' mánj. Nı ngaa gan'anj án re', nı hua a 'ngo rasun gachin rian án re' ní'. —Daj gataj Jesús gunun ni sij.

—Nitaj a 'ngo rasun gachin rian únj mánj. —Daj gataj ni sij.

³⁶Ngaa nı gataj Jesús:

—Sanı yyaj nı sisi nicaj á re' 'ngo nnánj, nı nıcaj á re' gan'anj án re'

nga nnij nun san'anj nej. Ni tsínj nitaj si nicaj espada, ni gudu'ue sij reto nun sij, ni guiran sij 'ngo aj. ³⁷Atā gunun a ni é re' sisi daj rún' hua nica rian si-nuguan' Yan'anj, ni da'nga' daj hua nian dagahuinj ni nuguan' daj. Ni ataj 'ngo nuguan' daj: “Guta' ni sij si-xugüi sí' nga si-xugüi ni tsínj 'yaj gaquin'.” Daj ataj si-nuguan' Yan'anj xi'í man'ānj. Daran'anj hua nica rian xi'ij. Ni hua nian gahuin yya nánj. —Daj gataj Jesús gunun ni sij.

³⁸Ngaa ni:

—Nan niquin' huij espada. —Daj gataj ni sij gunun Jesús.

—Hué daj síj gaj. —Gataj Jesús gunun ni sij.

Jesús ora en Getsemaní

³⁹Ngaa ni gahui Jesús gan'anj sij 'ngo dacan gu'naj Olivos daj rún' gu'yun sij huan'anj sij. Ni guinico' ni tsínj nico' sij gan'anj ni sí' nga sij nej. ⁴⁰Ni ngaa guisíj sij yu'uj daj, ni gataj sij gunun ni sí':

—Gachinj jni'yaj á re' rian Yan'anj, ngaa ni sí guinij a ni é re' rian gaquin' ngaa gatsij sichre a ni é re' mánj. —Daj gataj Jesús.

⁴¹Ngaa ni gahuin anéj sij. Ni gan'anj gan' sij doj rún' 'yó' ngaa ga'ui' 'ngo yej daj, gui'yaj sij guxun anéj sij man'an sij. Ni guiniquin' ráj dacoj sij gachínj jni'yaj sij rian Yan'anj. ⁴²Ni gataj sij:

—Tata chré'. Sisi ga'uej man'án re', ni ga'ne re' sayun ran'ānj nan. Saní sí gui'yáj re' rún' huin ruhua man'ānj mánj. Maan si gui'yáj re' rún' huin ruhua man'án re' aj. —Daj gataj Jesús gunun Yan'anj.

⁴³Ngaa ni gurugüi' 'ngo ángel 'na' xata' rian Jesús. Ni nari' fuerza Jesús, gui'yaj ángel daj. ⁴⁴Ni ducu nani ruhua Jesús. Ni nucuaj gachínj jni'yaj sij rian Yan'anj nej. Ni da' síj nico nia sij achínj jni'yaj sij rian Yan'anj. Ni nia nico' rian sij daj nij rian yo'ój. Ni rún' hua tun hua nia daj. ⁴⁵Ni ngaa guisíj gachínj jni'yaj sij rian Yan'anj, ni naxuman sij gan'anj sij rian man ni tsínj nico' sij. Ni man ni sí' atoj ni sí' nari' sij. ⁴⁶Ni gataj Jesús:

—Ni un sin huin ni atoj ni é re' únj. Nachica á re' gachinj jni'yaj á re' rian Yan'anj sisi sí guinij ni é re' rian gaquin' ngaa gatsij sichre niman án re' mánj. —Daj gataj Jesús gunun ni sí'.

Arresto de Jesús

⁴⁷Daj a'mi gue Jesús ngaa guisíj nico ni tsínj daj. Ni digyán 'ngo tsínj gu'naj Judas chrej rian ni tsínj huaj nga sí'. Ni hué sí' huin 'ngo dugüi' ni xuhuij ran' ni tsínj nico' Jesús. Ni gahuin nichrun' Judas rian nne Jesús sisi garun du'ua sij sí'. ⁴⁸Saní gataj Jesús gunun sij: —Judas, huin ruhuá re' garun du'ua re' man'ānj huinj da'níj ni ngüi ní'. Ni da'nga' daj naga'ui' re' man'ānj rian ni tsínj 'na' guida'a yünj, ruhuá re' ní'. —Daj gataj Jesús gunun Judas.

⁴⁹Ni ngaa guini' ni tsínj niquin' nga Jesús un sin gahuin, ni nachínj snan'anj ni sij Jesús. Ni gataj ni sij: —Señor, ga'ui' únj nga espada, ruhuá re' ní'. —Daj gataj ni sij.

⁵⁰Ngaa ni ga'ui' 'ngo tsínj daj tsínj 'yaj sun rian chrej a'nin'. Ni güéj

nin' chraquij sí' ne' chrej ra'a sa' sí',
gui'yaj sij. ⁵¹Ngaa ni gataj Jesús:

—Ga'nin' ruhua á re' yyaj aj. —
Daj gataj sij.

Ngaa ni ganun ra'a sij chraquij sí'.
Ni ganahuin chraquij sí', gui'yaj sij.
⁵²Hué dan ni gataj Jesús gunun ni
chrej a'nin' nga ni snado huin achij
dugumi rian nuhui nga ni tsínj huin
achij huin ni sij ni tsínj 'na' guida'a
Jesús. Ni gataj Jesús:

—Ni un sin huin ni ata á re'
espada nga chrun 'na' á re' guida'a
á re' yünj únj. Huē huin 'ngo tsínj
tu ruhua á re' ní'. ⁵³Ya'yoj niqünj
chruhua nuhui nga á re'. Sani nun
guida'a á re' man'ánj mánj. Sani
yyaj guisíj hora ga'ue gui'yaj á
re' daj rún' huin ruhua á re'. Daj
si hora nan nicaj sun sichre huin
si nne rian hua rumi'. —Daj gataj
Jesús gunun ni tsínj daj.

Pedro niega a Jesús

⁵⁴Ngaa ni guida'a ni sij Jesús. Ni
nicaj ni sij sí' gan'anj ni sij ducua
chrej huin achij nin'. Ni nico' gan'
huaj Pedro nico' sí' rucu Jesús. ⁵⁵Ni
naran' ni sij yan'an rian hue' daj. Ni
man ni sij ganicaj ni sij xi'níj yan'an
daj. Ni gan'anj gane Pedro scanij ni
sij. ⁵⁶Ngaa ni guini'i 'ngo yun'unj
xana 'yaj sun daj nne Pedro xi'níj
yan'an. Ni guini'yaj sa' ún' rian sij.
Ni gataj ún':

—Hué tsínj nan nicaj dugüi' nga
Jesús. —Daj gataj ún'.

⁵⁷Sani nun ga'uej Pedro. Ni gataj
sij gunun ún':

—Xica'ui, nun ni'inj sij mánj. —
Daj gataj Pedro.

⁵⁸Ni ngaa gachin doj, ni guini'i
ango tsínj Pedro. Ni gataj sí':

—Hué re' huin 'ngo ni tsínj nicaj
dugüi' nga Jesús aj. —Daj gataj sí'.

—Jnān, sēj huin mánj. —Gataj
Pedro.

⁵⁹Ngaa ni ango hora, ni gataj
ango tsínj daj:

—Xanga' sisi hué sij huin 'ngo tsínj
nicaj dugüi' nga sí'. Daj si 'na' sij
estado Galilea. —Daj gataj sí'.

⁶⁰Sani:

—Nun ni'inj un sin xi'i a'mí re'
nan jnanj. —Gataj Pedro.

Ni ngaa hua gue a'mi Pedro, ni
gaguáj do'loj 'ngo du'ua xú'. ⁶¹Ngaa
ni nanicaj Señor ni'yaj sij rian
Pedro. Ngaa ni nanun ruhua Pedro
si gataj Señor gunun sij: “Asij nun
güin gahuin gaguaj do'loj yan',
ni gataj re' si hua'nij si nun ni'í
re' man'ánj.” Hué daj gataj Jesús
gunun Pedro asij sini yan. ⁶²Ni
ducu gaco Pedro gahui sij xe'.

Jesús escarnecido y azotado

⁶³Ni ni tsínj man dugumi Jesús,
ni ga'mi ducu ni sij rian sí'. Ni ga'ui'
ni sij sí'. ⁶⁴Ni guiránj ni sij rundij
rian Jesús. Ngaa ni ga'ui' ni sij sí'. Ni
gataj ni sij:

—Yyaj ni gataj so' un tsínj ga'ui'
so' aj. —Daj gataj ni sij ga'mi ducu
ni sij.

⁶⁵Ni da'nga' daj ga'mi quij ni sij
ga'i' ango nuguan' rian Jesús nej.

Jesús ante el concilio

⁶⁶Ni ngaa guixiguin ni nahuin
yu' ni tsínj huin achij rian ni tsínj
israelita nga ni tsínj a'nin' rian ni
chrej nej, ni tsínj digyán ley nej.
Ni nicaj ni sij Jesús gan'anj ni sij
rian junta daj. Hué dan ni nachínj
snan'anj ni sij Jesús. Ni gataj ni sij:

⁶⁷—Sisi hué re' huin Cristo, ni gataj yá re' gunun únj. —Daj gataj ni sij gunun Jesús.

Nгаа ni:

—Sisi gatā si huēj huin, sani si guxuman ruhua á re' si-nuguan'ānj mánj. ⁶⁸Ni sisi nachin' snan'ān 'ngo nuguan' ni é re', sani nitaj nunj gataj á re' gunūnj mánj. Ni na'uej ruhua á re' nachi ni é re' man'ānj mánj.

⁶⁹Sani asij acuan' ni ganēj ra'a sa' Yan'anj nucuj nne xata' huinj da'níj ni ngüi. —Daj gataj Jesús.

⁷⁰Nгаа ni nachínj snan'anj daran' ni sij Jesús. Ni gataj ni sij:

—Hué yá re' huin da'níj Yan'anj, ruhua re' ní'. —Daj gataj ni sij.

Nгаа ni:

—Hué ni man'an án re' ataj sisi huēj huin. —Daj gataj Jesús.

⁷¹Nгаа ni gataj ni sij gunun ni dugüi' ni sij:

—Nitaj si guí'yó' testigo ga mánj. Ni hua gunun chraquij ni man'an né' si gataj sij xi'í gaquin' da'ui sij. —Daj gataj ni sij.

Jesús ante Pilato

23 Nгаа ni naxuman daran' ni sij. Ni nicaj ni sij Jesús gan'anj ni sij rian Pilato. ²Nгаа ni gaxi'i ni sij ga'mi gaquin' ni sij xi'í Jesús. Ni gataj ni sij:

—Hué tsínj nan huin 'ngo tsínj quij hua. Daj si ataj sij gunun ni ngüi sisi sī ga'ui' né' pesto rian rey César. Ni ataj sij sisi hué sij huin Cristo 'ngo rey, ataj sij. —Daj gataj ni sij xi'í Jesús.

³Nгаа ni nachínj snan'anj Pilato Jesús. Ni gataj sij:

—Hué re' huin rey rian ni tsínj israelita ní'. —Daj gataj Pilato.

—Hué re' ataj nánj. —Daj gataj Jesús.

⁴Nгаа ni gataj Pilato rian ni tsínj a'nin' rian ni chrej nga rian ni ngüi nej:

—Güendāj ni a 'ngo gaquin' nitaj da'ui tsínj nan mánj. —Daj gataj Pilato.

⁵Sani ducu gui'yaj ni sij fuerza, ni gataj ni sij:

—Nгаа digyán tsínj nan rian ni ngüi, ni gahuin xa'ue du'ua daran' ni ngüi. Ni huaj sij digyán sij si-nuguan' sij nin' gachra' estado Judea. Ni gaxi'i sij digyán sij estado Galilea. Ni 'na' sij yu'uj nan digyán sij rian ni ngüi nej. —Daj gataj ni sij gunun Pilato.

Jesús ante Herodes

⁶Ni nгаа gunun Pilato si gataj ni sij, ni nachínj snan'anj sí' sisi Jesús huin tsínj 'na' estado Galilea. ⁷Ni nгаа guini'i Pilato sisi 'na' Jesús estado Galilea, ni ga'níj sij gan'anj sí' rian rey gu'naj Herodes huin sí' gobernado nicaj sun ne' estado Galilea. Daj si nne sí' xuman' Jerusalén ni güi daj.

⁸Ni nгаа guini'i Herodes Jesús, ni gahuin nia' ruhua sij si guisíj ga'l güi huin ruhua sij guini'i sij Jesús. Daj si gunun sij ga'mi ni ngüi daj gui'yaj Jesús. Ni gahuin ruhua sij sisi gui'yaj Jesús 'ngo si sa' nico guini'i sij. ⁹Ni ducu nachínj snan'anj sij Jesús. Sani ni a 'ngo nuguan' nun danicaj Jesús rian sij mánj. ¹⁰Ni man ni tsínj a'nin' rian ni chrej nga ni tsínj digyán ley nej. Ni ducu garun gaquin' ni sí' Jesús. ¹¹Nгаа ni ga'mi quij Herodes rian Jesús. Ni hué daj ga'mi ni snado

niquin' nga sij nej. Ní ga'níj ni sij atsiy niá' xá Jesús gunun sí' güenda gahuin ducu ruhua ni sij ni'yaj ni sij sí'. Ní rún' si-gan' rey hua-á'. Ngaa ní ga'níj Herodes ruhua' yún Jesús rian Pilato. ¹²Xi'í daj ní na'mi Pilato nga Herodes güi daj si asij sini, ní gunun' nungüej sij.

Jesús sentenciado a muerte

¹³Ngaa ní nahuin yu' ni tsínj a'nin' rian ni chrej nga ni tsínj nicaj sun nga ni ngüi nej, gui'yaj Pilato. ¹⁴Ní gataj sí' gunun ni sij:

—Nicaj á re' tsínj nan ga'na' á re' nánj. Ní ataj á re' sisi digyán sij 'ngo chrej xi'i rian ni ngüi. Ní natāj rian án re' sisi hua nachínj snan'ān sij. Sani nitaj 'ngo gaquin' gui'yaj sij nari'ij xi'í si a'ui' a ni é re' gaquin' sij mánj. ¹⁵Ní ga'ní Jesús gan'anj sij rian nne rey Herodes. Ní nun nari' Herodes gaquin' da'ui sij mánj. Nitaj nunj gui'yaj sij si gahui' sij mánj. ¹⁶Ngaa ní gui'yā castigo sij, asíj ní na'nij ra'āj sij gan'anj sij aj. — Daj gataj Pilato.

¹⁷Ní hua nian si guiri Pilato 'ngo tsínj nun ducuaga' go'ngo gui'yanj pascua si daj hua si-costumbre ni sij.

¹⁸Sani gaxi'i ni sij gaguáj nucuaj nuguan'an daran' ni sij. Ní gataj ni sij:

—Dagahuí' re' tsínj nan. Ní na'nij ra'á re' tsínj gu'naj Barrabás aj. — Daj gataj ni sij gaguáj ni sij.

¹⁹Ní hué Barrabás huin 'ngo tsínj nun ducuaga' si gunun' ni dugüi' sí' nga ni tsínj nicaj sun chruhua xuman' daj. Ní dagahui' sí' 'ngo níman nej.

²⁰Ní huin ruhua Pilato guiri sij Jesús gan'anj sí'. Xi'í daj ní ga'mi ruhua' yún sij rian ni sí'.

²¹Sani gaguáj nucuaj ni sij. Ní gataj ni sij:

—Gari re' gaguáj Jesús guinico' sij rian rugutsi. Gari re' gaguáj Jesús guinico' sij rian rugutsi. —Daj gataj ni sij.

²²Ngaa ní gataj Pilato guisíj hua'nij:

—Daj hua gaquin' gui'yaj sij únj. Nitaj gaquin' gui'yaj sij nari'ij sisi gahui' sij mánj. Gui'yā castigo sij, asíj ní na'nij ra'āj sij gan'anj sij aj. — Daj gataj Pilato.

²³Sani ni tsínj daj nga ni chrej a'nin' gui'yaj fuerza ni sij gaguáj ni sij sisi gari Pilato gaguáj Jesús guinico' sí' rian rugutsi. Ní rian gaguáj nucuaj ni sij, ní guiri' ni sij si huin ruhua ni sij. ²⁴Ní gataj Pilato sisi gui'yaj ni sij si huin ruhua ni sij. ²⁵Ngaa ní guiri Pilato tsínj nun ducuaga' daj huin sí' tsínj gunun' nga ni tsínj nicaj sun. Ní huin sí' tsínj dagahui' níman nej. Ngaa ní naga'ui' Pilato man'an Jesús rian ni sij sisi gui'yaj ni sij si huin ruhua ni sij.

Crucifixión y muerte de Jesús

²⁶Ní ngaa nicaj ni sij Jesús gan'anj ni sij, ní guida'a ni sij 'ngo tsínj 'na' xuman' Cirene gu'naj sí' Simón. Ní 'na' niqui sí' gan'anj sí' rian sun. Ní gui'yaj ni sij gata sí' rugutsi guinico' sí' rucú Jesús. ²⁷Ní nico' nico ni ngüi huaj ni sij rucú Jesús. Ní ducu aco ni yun'unj xana nico' huaj rucú sij. Ní nani ruhua ne ni'yaj ne xi'í sij. ²⁸Sani nanicaj Jesús ní gataj sij gunun ni yun'unj xana daj:

—Gunun ni é re' huin a ni é re' ni ngüi 'na' xuman' Jerusalén. Sij gaco

ni é re' xi'ij mánj. Saní gaco ni é re' xi'í man'an ni é re' nga xi'í ni da'níj ni é re' nej. ²⁹Daj si ga'na' ni güi guíran' ni é re' sayun. Ní gataj ni ngüi: “Hua 'ueé rian ni ngüi yatin nga ni ngüi nun ri' lij nej, ni ngüi nun guinico' lij xi'yanj nej.” Daj gataj ni ngüi. ³⁰Daj si güi daj ni gaxi'i ni ngüi gataj sisi gane ni quij, ni naxij ni sij riqui quij gane daj, gataj ni sij. ³¹Ní sisi ran' man'anj nico sayun 'yaj ni sij acuan', saní ni güi ga'na', ni ducu ga'na' doj sayun rian ni sij aj. —Daj gataj Jesús rian ni yun'unj daj.

³²Ní hué daj nicaj ni sij huij tsínj da'ui gaquin' gan'anj ni sij sisi gahui' nuguan'an nungüej sí' nga Jesús. ³³Ní ngaa guisíj ni sij 'ngo yu'uj gu'naj cúj chra níman, ni gari ni sij gaquíj Jesús doco' ni sij rian rugutsi sí' yu'uj daj. Ní hué daj doco' ni sij huij tsínj da'ui gaquin' daj rian yahuij rugutsi. Ní nico' 'ngoj ra'a sa' Jesús, ni angoj ra'a rotsi sij. ³⁴Hué dan ní gataj Jesús gunun Yan'anj:

—Tata chré', nícaj re' 'ngo niman nico nga ni sij. Daj si nun ni'i ni sij si 'yaj ni sij. —Daj gataj Jesús gunun Yan'anj.

Ní ducu ni snado sisi un tsínj gahui sa' nícaj ni sij si-gan' Jesús gan'anj sij.

³⁵Ní niquin' ni ngüi ni'yaj ni sij. Saní gui'yaj ducu ni tsínj nicaj sun. Ní gataj ni sij:

—Nacaj sij ango ni ngüi. Ngaa ní sisi hué sij huin Cristo tsínj nacui Yan'anj, ngaa ní ganacaj sij man'an sij nánj. —Daj gataj ni sij.

³⁶Ní hué daj ga'mi ducu ni snado nej. Ní gahuin nìchrun' ni sij. Ní

reque ni sij nnee yu go'o sí'. ³⁷Ní gataj ni sij:

—Sisi hué re' huin si-rey ni tsínj israelita, ní ganacaj re' man'an re' aj. —Gataj ni sij.

³⁸Ní garun ni sij letra chra rugutsi. Ní letra daj huin griego nga latín nej, hebreo nej. Ní letra daj gataj: “tsínj nan huin si-rey ni tsínj judíos.” Daj garun ni sij. ³⁹Ngaa ní ga'mi quij 'ngo tsínj da'ui gaquin' daj gunun Jesús. Ní gataj sí':

—Sisi hué re' huin Cristo, ní ganacaj re' man'an re' nga nungüej únj nej. —Daj gataj sí' gunun Jesús.

⁴⁰Saní chran' yun'unj ango tsínj nico' yu'uj daj dugüi' sij huin sij 'ngo tsínj da'ui gaquin' nej. Ní gataj sij:

—Uyan huin si-castigo man'an re' nga si-castigo tsínj nan nej. Ní un sin huin ní nitaj si xu'uí' re' ni'yáj re' Yan'anj únj. ⁴¹Ní hua nian xanga' ran' nungüej únj sayun xi'í si da'ui nungüej únj gaquin'. Saní nitaj si da'ui tsínj nan gaquin' mánj. —Daj gataj ango tsínj da'ui gaquin' gunun dugüi' sij.

⁴²Ngaa ní gataj sij rian Jesús:

—Gananun ruhua' re' ni'yaj re' yünj ngaa gaxi'i guinicaj sún re'. —Daj gataj sij.

⁴³Ngaa ní:

—Xanga' ataj yyáj gunun re' sisi asij yyáj, ní hua nné re' ngáj xánj Yan'anj. —Gataj Jesús gunun tsínj da'ui gaquin' daj.

⁴⁴Ní ngaa guisíj gaxuj, ní gahuin rumi' rian daran' xungüi. Ní gahuin rumi' da' ga hua'nij di'ni. ⁴⁵Ní gahuin rumi' rian güi. Ní tsitsi' da'aj atsij nico' chruhua nuhui nico.

⁴⁶Ngaa ní gaguáj nucaj Jesús. Ní gataj sij:

—Tata chré', nariquij nimānj
nahuin ra'á re'. —Gataj Jesús.

Ni ngaa da'nga' daj gataj sij, ni
gahui' sij.

⁴⁷Ni ngaa guini'i snado centurión
si gahuin, ni ga'mi sa' sij rian
Yan'anj. Ni gataj sij:

—Xanga' hua nica niman tsínj nan
anj. —Daj gataj sij.

⁴⁸Ni ngaa guini'i daran' ni
ngüi mán yu'uj daj daj gahuin, ni
namicaj ni sij nan' ni sij ducua' ni
sij. Ni guita ra'a ni sij niman ni sij
si nun nari' ruhua ni sij si guiyaj ni
sij. ⁴⁹Ni daran' ni tsínj nicaj dugüi'
nga Jesús nga ni yun'unj xana nico'
Jesús asij estado Galilea, ni guna
gan' ni sij ni'yaj ni sij daran' si
gahuin.

Jesús es sepultado

⁵⁰Ni hua 'ngo tsínj nne rian junta
nico daj. Ni gu'naj sí' José. Ni 'na'
sij xuman' Arimatea xuman' ngaj
estado Judea. Ni hua sa' niman sij.
Ni 'yaj nica sij nej. ⁵¹Ni ana'uij sij
si ga'na' guinicaj sun Yan'anj rian
né'. Ni nun garan' ruhua sij si ga'mi
ni tsínj man junta daj xi'í Jesús.
Ni hué daj nun garan' ruhua sij si
gui'yaj ni sij nga sí' nej.

⁵²Ni gan'anj sij rian Pilato. Ni
gachínj sij níman Jesús. ⁵³Ngaa ni
nanij sij níman Jesús rian rugutsi. Ni
chri'yanj sij atsij xiráj níman daj. Ni
gurúj sij níman chruhua 'ngo huej.
Sanj ni a 'ngo ni níman nun gachin'
ni sij riqui yu'uj da mánj.

⁵⁴Ni güi daj huin güi 'yaj xugüi ni
sij güi naránj ruhua ni sij. Ni achin
doj si guisij güi naránj ruhua ni
sij daj. ⁵⁵Ni nico' ni yun'unj xana
gahui estado Galilea nga Jesús

rucú tsínj gu'naj José. Ni guini'i
ne rian gachin' ni sij níman
Jesús. Ni guini'i ne daj gurúj ni sij
níman daj chruhua yu'uj nej. ⁵⁶Ni
ngaa namicaj ne nan' ne ducua'
ne, ni nachej ne gasiti guin' daj
nga gono'ó guin' daj. Ni naránj
ruhua ne güi naránj ruhua ni ngüi
israelita daj rún' a'nin' ley rian ni
sij.

La resurrección

24 Ni ngaa ruhua guere'nga'
nigan' acuan' güi gudungu,
ngaa ni gan'anj ni yun'unj xana
daj rian yu'uj gachin' ni sij níman.
Ni nicaj ne gasiti guin' daj hua
nagui'yaj ne gan'anj ne. Ni gan'anj
ango ni yun'unj xana nga ne nej. ²Ni
nari' ne sisi nitaj si ngaj yej xachij
hua ránj rian huej daj. ³Ni gatúj
ne chruhua huej. Sanj nun nari' ne
níman Señor Jesús mánj. ⁴Ni nun
nari' ruhua ne un sin gahuin. Ngaa
ni niquin' nuguan'an huij tsínj rian
ne. Ni ran atsij nun nungüej sí'. ⁵Ni
guxu'ui' ne. Ni ga' nitu rian ne rian
yo'ój. Xi'í daj ni gataj nungüej tsínj
daj gunun ne:

—Ni un sin huin ni nana'ui' a
ni é re' tsínj hua ni'na' scanij ni
níman únj. ⁶Nitaj si ngaj sij yu'uj
nan ga mánj. Daj si hua ganá'nij sij.
Nanun ruhua á re' si gataj sij rian
án re' ngaa gane sij estado Galilea.
⁷Ni gataj sij gunun a ni é re': "Hua
njan sisi naga'ui' ni sij man'anj ra'a
ni tsínj 'yaj gaquin'. Ni gari ni sij
gaquj man'anj rian rugutsi. Ngaa ni
gana'ni ngaa guisij hua'nij güi huinj
da'nij ni ngüi." Hué daj gataj Jesús
gunun a ni é re'. —Daj gataj nungüej
tsínj daj gunun ni yun'unj xana.

⁸Ngaa n̄i nanun ruhua ne ni'yaj ne nuguan' ga'mi Jesús. ⁹Ngaa n̄i nanicaj ne rian huej daj. N̄i nata' ne ni nuguan' daj rian ni x̄an ni tsínj a'mi si-nuguan' Yan'anj nga rian angó ni ngüi nej. ¹⁰N̄i ni yun'unj xana daj huin María Magdalena nga Juana nej, María nni Jacobo nej, angó ni yun'unj xana nej. N̄i nata' ne nuguan' daj rian ni tsínj ga'mi si-nuguan' Jesús rian ni ngüi. ¹¹Sani ngaa gunun ni sij nuguan' daj, n̄i gani ruhua ni sij sisi a'mi sinúnj ni yun'unj daj. N̄i nun guxuman ruhua ni sij si gataj ne. ¹²Sani naxuman Pedro gunánj sij gan'anj sij rian huej. N̄i ga' nitu sij ni'yaj sij chruhua yu'uj daj. N̄i ngaj urin atsij chruhua huej daj guini'i sij. Ngaa n̄i nanicaj sij nan' sij ducua' sij. Sani nun ri' ruhua sij un sin gui'yaj sij nga si guini'i sij.

En el camino a Emaús

¹³N̄i hué güi daj n̄i huaj huij tsínj nico' Jesús gan'anj nungüej sij 'ngo xuman' gu'naj Emaús. N̄i huin ngaj-á' xuman' Jerusalén 'ngo si x̄an kilómetro. ¹⁴N̄i nari snan'anj nungüej sij huaj sij xi'í si gahuin guiran' Jesús. ¹⁵N̄i diaj hua gue a'mi nungüej sij, n̄i gahuin nichrun' Jesús rian nungüej sij. N̄i chéj Jesús nga nungüej sij. ¹⁶Sani nunj si ni'yaj nungüej sij man'an sí', sani nun ga'ui' Yan'anj sisi nani'i nungüej sij sisi Jesús huin huaj nga nungüej sij. ¹⁷Ngaa n̄i nachínj snan'anj Jesús nungüej sij. N̄i gataj sij:

—N̄i un sin huin si a'mi nungüej é re' huaj á re' chrej únj. N̄i un sin huin n̄i nani ruhua á re' únj. —Daj gataj Jesús.

¹⁸Ngaa n̄i gataj 'ngo tsínj daj 'ngo tsínj gu'naj Cleofas:

—Hua ga'í tsínj 'na' anéj chrej nne xuman' Jerusalén ni güi nan. N̄i un sin huin n̄i urin man'án re' nun ni'í daj gahuin ni güi gachin nan únj. —Daj gataj Cleofas.

¹⁹Ngaa n̄i:

—N̄i un sin gahuin únj. —Gataj Jesús.

Ngaa n̄i gataj nungüej sij:

—Hué Jesús nazareno gahuin 'ngo tsínj ga'mi si-nuguan' Yan'anj rian ni ngüi. N̄i gui'yaj sa' sij. N̄i ducu nucuj si-nuguan' sij rian Yan'anj nga rian daran' ni ngüi nej. ²⁰N̄i ga'nin' sun ni chrej a'nin' nga ni tsínj nicaj sun sisi gahui' Jesús guínico' sij rian rugutsi. ²¹N̄i gana'uuj ni únj sisi hué sij huin tsínj 'na' nacaj ni ngüi israelita. Sani guiran' sij sayun daj. N̄i yyaj guisíj hua'nij güi si gahui' sij. ²²N̄i guixiguin gan'anj go'ngo yun'unj xana nicaj dugüi' nga ni únj rian gachin' Jesús. N̄i gara yan'anj ruhua ni únj xi'í si gataj ne gunun únj. ²³N̄i rian nun nari' ne Jesús, n̄i nanicaj ne rian ni únj. N̄i nata' ne gunun ni únj sisi gurugüi' huij ángel rian ne. N̄i gataj nungüej ángel daj gunun ne sisi hua ni'na' Jesús. ²⁴Hué dan n̄i gan'anj go'ngo ni dugüi' ni únj rian gachin' Jesús. N̄i nari' anin' sij daj rún' gataj ni yun'unj daj. Sani nun guini'i anin' sij man'an Jesús mánj. —Daj gataj nungüej sij.

²⁵Ngaa n̄i gataj Jesús gunun nungüej sij:

—Tsínj nun acaj cuenta huin nungüej é re'. N̄i na'ue guxuman yoo ruhua nungüej é re' nga si garun

ni tsínj ga'mi si-nuguan' Yan'anj asij ná. ²⁶Sé si xanga' si hua nian guiran' Cristo sayun ngaa achin natu sij rian hua 'ueé xata' gane sij únj. —Daj gataj Jesús.

²⁷Ngaa ni gaxi'i sij ga'mi sij xi'í si-nuguan' Moisés nga si-nuguan' ango ni tsínj ga'mi si-nuguan' Yan'anj asij ná. Ni gataj sij gunun nungüej sí' daran' si ataj si-nuguan' Yan'anj xi'í man'an sij.

²⁸Ni ngaa guisíj nungüej sij xuman' huaj nungüej sij, ni guiyaj Jesús sisi gata' dian sí' gan'anj sí' rian nungüej sij. ²⁹Saní guereque nungüej sij sisi gunaj sí'. Ni gataj nungüej sij:

—Guná re' nga únj si hua gahuin di'ni, ni hua guini nej. —Gataj nungüej sij gunun Jesús.

Ngaa ni gatúj Jesús guna sí' nga nungüej sij.

³⁰Ni ngaa nne Jesús rian mesa nga nungüej sij, ni guida'a sí' chrachrúnj. Ni ga'ui' sí' si guruhua Yan'anj. Ni gura' da'aj sí' ga'ui' sí' ra'a nungüej sij. ³¹Ngaa ni hué gue hora daj xacaj cuenta nungüej sij guini'i nungüej sij sisi Jesús huin. Saní hué hora daj ni gan'anj ni'ya yan'anj sí' rian nungüej sij. ³²Ngaa ni nachínj snan'anj nungüej man'an sij dugüi' sij. Ni gataj nungüej sij:

—Xanga' ni gahuin nia' ró' ngaa ga'mi sij nga né' ngaa huaj né' chruhua chrej. Ni gahuin nia' ruhua né' ngaa digyán sij si-nuguan' Yan'anj riún' nej. —Daj gataj nungüej sij.

³³Ngaa ni hué hora daj, ni naxuman nungüej sij gan'anj nungüej sij xuman' Jerusalén. Ni nari' nungüej sij xan ni tsínj mán

nahuin yu' nga ni dugüi' ni sí' nej.

³⁴Ni gataj ni sí':

—Xanga' ni ganánj Señor. Ni gurugüi' sij rian Simón. —Daj gataj ni sij.

³⁵Ngaa ni nata' nungüej sij daj gahuin guini'i nungüej sij Jesús chruhua chrej. Ni nata' nungüej sij daj nani'i nungüej sij Jesús ngaa gura' da'aj sí' chrachrúnj ga'ui' sí' xa nungüej sij.

Jesús se aparece a los discípulos

³⁶Ni ngaa hua gue a'mi ni sij nuguan' daj, ni gurugüi' Jesús ganiquin' sij scanij ni sij. Ni gataj sí' gunun ni sij:

—Gahuin din'inj ruhua á re' aj. —Daj gataj Jesús.

³⁷Ngaa ni ducu guxu'ui' ni sij. Ni gani ruhua ni sij sisi guini'i ni sij 'ngo sta'naj. ³⁸Saní gataj Jesús:

—Ni un sin huin ni nani ruhua á re' únj. Ni un sin huin ni nitaj si mán yya ruhua niman án re' únj.

³⁹Ni'yaj á re' ra'áj nga dacō. Ni xacaj á re' cuenta sisi hué man'anj huin. Guida'a á re', ni ni'yaj á re'. Daj si 'ngo sta'naj nitaj nne cúj daj rún' hua man'anj nan mánj. —Daj gataj Jesús.

⁴⁰Ni ngaa guisíj ga'mi Jesús nuguan' daj, ni digyán sij ra'a sij nga dacój sij rian ni sí'.

⁴¹Saní nun guxuman ruhua ni sij xi'í si ducu huin nia' ruhua ni sij. Ni garáj yan'anj ruhua ni sij nej. Ngaa ni nachínj snan'anj Jesús ni sij. Ni gataj sí':

—Nícaj á re' si xo' ní'. —Daj gataj Jesús.

⁴²Ngaa ni ga'ui' ni sij doj nnee xucuaj nitin nga doj gatsi' xutan xa

sí'. ⁴³Ni guida'a sij, ni xa sij rian ni sí'. ⁴⁴Ngaa ni gataj sij:

—Hué nan huin nuguan' ga'mi nga ni é re' ngaa ganēj nga á re'. Ni gatā gunun a ni é re' sisi hua nian gahuin yya ni nuguan' xi'ij daj rún' garun Moisés nga ni tsínj ga'mi si-nuguan' Yan'anj asij ná nga ni tsínj garun libro Salmo nej. —Daj gataj Jesús.

⁴⁵Hué dan ni gara da'nga' ruhua ni sij si ataj si-nuguan' Yan'anj, gui'yaj Jesús. ⁴⁶Ni gataj Jesús:

—Gataj si-nuguan' Yan'anj sisi guiran'anj sayun, huinj Cristo. Ni gahuinj. Sani gana'nī chra hua'nij güi. ⁴⁷Ngaa ni ga'mi ni sij ni nuguan' sa' xi'ij rian daran' ni ngüi man chruhua xungüi. Ngaa ni ganani ruhua ni sij xi'í si-gaquin' ni sij nanico' ni sij Yan'anj. Hué dan ni guinicaj Yan'anj 'ngo niman nico xi'í si-gaquin' ni sij. Ni gaxi'i ni sij xuman' Jerusalén nata' ni sij nuguan' da aj. ⁴⁸Ni huin a ni é

re' ni tsínj guini'i daran' si gui'yā. Ngaa ni ga'ue guiniquin' a ni é re' nata' a ni é re' xi'í ni nuguan' sa' nan. ⁴⁹Ngaa ni riquij Espíritu Santo rian ni é re' daj rún' gataj yya chrē rian án re'. Sani guna á re' xuman' Jerusalén nan da nahuin ra'a nari' nucuaj niman án re', gui'yaj Yan'anj. —Daj gataj Jesús gunun ni sij.

La ascensión

⁵⁰Ngaa ni nicaj Jesús ni sij gan'anj sí' xuman' Betania. Ngaa ni nachi nicaj sí' ra'a sí'. Ni gachínj jni'yaj sí' rian Yan'anj sisi gui'yaj sa' Yan'anj nga ni sij. ⁵¹Ni diaj hua gue a'mi sa' sí' daj, ni gahuin nini sí' rian ni sij. Ni nan' sí' xata', gui'yaj Yan'anj. ⁵²Ngaa guisíj ga'mi sa' 'ueé ni sij xi'í Jesús, ni nanicaj ni sij gan'anj ni sij xuman' Jerusalén. Ni ducu gahuin nia' ruhua ni sij. ⁵³Ni niganj mán ni sij nuhui nico ga'mi sa' ni sij rian Yan'anj. Ni gataj ni sij sisi sa' 'yaj Yan'anj anj. Amén.